

**NATIONAL ASSEMBLY OF
SEYCHELLES**

Tuesday 22nd July 2025

The Assembly met at 09am

National Anthem

Moment of Reflection

Mr Speaker in the Chair

MR SPEAKER

Bonzour tou Manm Onorab. Bonzour nou bann zofisye Lasanble ki pe akonpanny nou e bonzour nou piblik ki pe swiv nou an deor. Mersi zot tou pou zot partisipasyon dan travay lasemenn.

Mon a donn laparol Onorab Uranie pou en mesaz.

HON ROCKY URANIE

Mersi Mr Speaker. Bonzour tou koleg Onorab, bonzour tou viziter dan Galeri. En bonzour spesyal pou tou zabitan Zil Pros ki a lekout.

Lo mon non personnel e lo lapar *United Seychelles*, mon oule senserman senpatiz avek lafanmir Adrienne, Tirant, Ernesta e Uranie konsernan sa sityasyon trazik ki ti arive Dimans e kot en zenn fiy Joycina Adrienne in perdi son lavi. Joycina ti ranpli avek lazwa de viv e sirman nou tou La Digue nou ti kontan li e

alor i pou an mank pou nou tou.

Alor senserman, mwan Mr Speaker, tou zabitan Zil Pros, mon leker i avek zot e *with* Joycina ankor enn fwa mon senpati. Mersi.

MR SPEAKER

Mersi Onorab. Mon ava azout senpati e kondoleans Lasanble an zeneral. Sa lensidan i enn trazik e mon senserman anvi eksprim nou senpati kolektif. Mersi.

Nou annan en pti prezantasyon dokiman. Madanm Deputy Clerk.

MADAM DEPUTY CLERK

Bonzour Mr Speaker. Bonzour tou bann Manm Onorab, tou bann *staff* Lasanble Nasyonal e nou bann viziter dan nou Galeri. Prezantasyon papye i *comme* swivan Mr Speaker:

S.I. 48 of 2025 Revenue Administration (Common Reporting Standards) (Amendment) (No. 3) Regulations, 2025. Mersi.

MR SPEAKER

Mersi Madanm Deputy Clerk. Mon pa ti'n pran latansyon ki i annan en group viziter dan Galeri, ki mon konpran i lekol La Misère. Byenveni ozordi dan Lasanble nou bann etidyan. Nou touzour kontan annan zot partisipasyon avek nou.

Nou ava pas lo *Private Notice Question*, Madanm *Hansard* Raporter i ava apel Minis ki la pou reponn.

Bonzour Minis pou Zafer Entern Mr Errol Fonseka. Bonzour ACP Antoine Denousse Asistan Komisyoner pou *Service Delivery*, ASP James Tirant *Chief Superintendent* responsab pou *Visible Policing*. Byenveni zot tou dan Lasanble pou partisip avek nou dan *Private Question*. Nou ava demann *Leader* Lopozisyon pou met son kestyon. Onorab Pillay?

HON SEBASTIEN PILLAY

Mersi Mr Speaker. Bonzour Mr Speaker, bonzour tou nou bann etidyan, bann zanfan La Misère ki dan Galeri. Bonzour tou koleg Onorab, bonzour Minis avek ou delegasyon e bonzour tou dimoun ki a lekout Mr Speaker. Mon kestyon i lir koumsa: -

Swivan lensidan kot en zenn fiy in ganny tape pandan en *rally United Seychelles* kot *Mini Stadium* Dimans le 20 Zilyet 2025 avek en transpor. E la Mr Speaker, avek ou permisyon mon pa pou lir sa lot bout, kot mon ti'n dir ozordi i pe lager pou son lavi.

Malerezman parey nou'n tandé bomaten sa zenn fiy in kit nou, e nou senser kondoleans anver son fanmir e tou son bann pros e byensir

gran fanmir *United Seychelles* nou tou nou ozordi an dey pou en dimoun ki ti ranpli ek lavi e tre enportan pou nou.

Eski Minis i kapab dir nou aköz ki lapolis pa ti'n pran desizyon pou ferm sa semen prenan kont lakantite dimoun e transpor ki ti pe sirkile otour sa levennman? Mersi Mr Speaker.

MR SPEAKER

Mersi Onorab. Minis, ou larepons?

MINISTER ERROL FONSEKA

Mersi Mr Speaker. Mr Speaker, *Leader* Biznes Gouvernman dan Lasanble, *Leader* Lopozisyon, tou bann Manm Onorab e tou dimoun a lekout lo *Gallery* bonzour.

Mr Speaker, se osi avek gran tristes nou'n aprann ki sa zenn fiy in kit nou, e lo lapar Prezidan Larepiblik, Gouvernman, mwan menm e Komisyoner Lapolis, nou prezant nou senpati avek manm fanmir Adrienne, Tirant, Ernesta, Uranie. Ki zot a ganny sa kouraz avek lagras Bondye pandan sa moman byen difisil.

Nou osi rekonnet ki sa zenn fiy ti en manm parti US, e lo nou kote osi mon oule anvoy mon senpati pou zot parti.

Mr Speaker, avan ki mon reponn kestyon Onorab Pillay,

mon ti a kontan pran en moman pou remersye e felisit PC Heather Japha ki ti vitman reakte e fer CPR lo sa viktim aksidan, nou oule dir li *well done* PC Japha pou met an pratik sa *training CPR* parmi plizyer lezot *training* ki lapolis i ofer son bann Zofisye ozordi.

Egalman, mon oule remersye ASP Joel Belle nou lekip Gard Trafik e nou *quick response team* anba Komandan Peter Dacambra SP ki ti ariv lo lasenn aksidan tre vit e ede pou kontrol lafoul, dimoun ki ti'n rasanble, fasilite evakyasyon lanbilans; asire ki lasenn aksidan pa ti ganny konpromi e osi eskort sa drayver enplike dan sa aksidan kot Kordgard Santral pou bann formalite neseler.

Se sa kalite travay lekip e efikas ki nou oule ankouraz dan lafors. Alors ankor enn fwa mersi e bon travay tou bann Zofisye ki ti *on duty* Dimans le 20 Zilyet.

Mr Speaker, mon oule osi remersye Minister Lasante ki ti enplimant son *Code 9 emergency* pou sa moman kritik, pou fer sir ki tou keksoz ti an plas pou resevwar sa viktim aksidan. Mersi pou sa bon travay efektif.

E pou aprezan reponn kestyon Onorab Pillay Mr Speaker, i enportan note ki lapolis pa'n war li neseler pou ferm sa morso semen aköz

zofisye ti la, ti pe fer sir ki i annan bon kontrol lo larout. Parey zot reaksyon lo sa *scene* in montre, si lapolis ti war li neseler pou ferm sa morso semen le neseler ti pou ganny fer par sa zofisye ki ti pe ansarz Dimans le 20 Zilyet.

Sa aksidan i le sel aksidan ki'n ganny raporte lo sa larout pandan sa aktivite e alor i montre ki ti napa neseler ferm sa semen. Mr Speaker, organizater sa *rally* li menm pa ti war li neseler e alor i pa ti fer okenn demann pou ferm sa semen. Aköz tou fason si lapolis ti'n blok sa semen devan *Mini Stadium* parey Onorab Pillay pe demande, i ti'n blok son prop *rally*. Aköz setou larout ki ou kapab antre lo *Mini Stadium*.

Mr Speaker, ler ou pe kontrol trafik, i enportan pou les trafik bouze e pou ferm en semen pou blok trafik ki kapab annan en konzesyon dan en lot landrwa i zis pa fer sans. Sanmenm nou annan zofisye regilyerman lo semen pou asir ki trafik i bouze.

Mr Speaker, i enportan ki pandan sa aktivite espesyalman dan bann letan politik ki parfwa leksitasyon i pran plas rezonnman, nou touzour mazin nou prop sekirite.

Mr Speaker, mon oule lans en lapel avek pyeton e drayver an zeneral pou pran

bokou prekosyon lo semen pandan bann aktivite.

Mr Speaker, lanket in komanse dan sa ka e lapolis pa pou fer okenn komanter lo sa pwen. Mr Speaker, tou fason mon war li i regretan ki a sa moman ler en zenn ki yer i ti a pe lager pou son lavi, nou pa'n realiz gravite sa sityasyon avek sa tel *PNQ*. Mon panse pa ti nesaser e nou ti kapab rezourd sa dan en lot fason. Mersi Mr Speaker.

MR SPEAKER

Mersi Minis. Mon demann bann Manm pou not pwen Minis ki en lanket in komanse dan sa lensidan, e ki nou devret evit kestryon ki kapab enplik sa lanket. Onorab Lemiel, ou kestryon siplemanter.

HON SYLVANNE LEMIEL

Mersi Mr Speaker. Bonzour Minis avek ou delegasyon, tou bann envite dan Galeri.

Mon kestryon swivan larepons Minis, mon ti a kontan petet Minis ou eksplik nou en pti pe petet ki standar prosedir lapolis, letan ki i annan bann gro levennman. Par egzanp nou pe koz *rally* kot nou konnen poudir dan *rally* i annan en kantite dimoun i vini.

Alors, mon pe koz par egzanp osi *motorcade*, mon pe koz osi bann lezot aktivite ki

ganny fer Mr Speaker, kot ou war en sitan kantite dimoun i vini. *Therefore*, mon ti a kontan konnen Minis ki zot *standard of procedure* dan sa bann levennman koumsa?

Petet a lavenir, parey Minis ou'n dir nou parti pa ti demande pou ferm semen, petet mon pa konnen si nou parti ti merit demann sa oubyen si zofisye ki merit vwar. Etandonnen ki sa kantite *flow* trafik ki ti pe vini kantmenm en kote i ganny bloke. So Minis, mon ti a kontan sa leksplikasyon. Mersi Mr Speaker.

MR SPEAKER

Mersi Onorab. Minis?

MINISTER ERROL FONSEKA

Onorab, mersi pou ou kestryon, tre rezonnab. *Basically*, prosedir i senp, evalyasyon avek tou bann leksperyans ki lapolis i deza annan, tousala pa premye fwa i arive sa. E nou'n fer sir tan *rally*, sir tan *motorcade*, sir tan ler bann *musical show* isi laba, *crowd control* i pa en keksoz nouvo pou lapolis.

Me tou ka *crowd control* i kapab anmenn bann lezot konsiderasyon, ki ek sa bann dimoun ki pe vin la, ki mannyer keksoz i kapab deroule. *So the evaluation is done, a tactical evaluation* i ganny fer premyerman.

Aprè sa, ler zot in fini fer zot evalyasyon sa i zot plan travay, konbyen dimoun zot bezwen - pa neseserman, sa en lot keksoz mon bezwen dir zot, pa neseserman plis dimoun ou mete pli bon, pa neseserman sa. *What you need to realize is* ki mannyer ou pou *prioritize* ou bann louvraz e ki mannyer ou pou kapab *respond* pou plizyer *scenario* ki kapab vini.

En bann pli *obvious* be i annan li pa *obvious* osi. *But* selman ou pou kapab *respond* pou sa bann *scenario accordingly*. E touzour, lapolis zanmen- mon *advice* zot zanmen met tou zonm lo semen, *always* kit enn ouswa 2 rezerv ki ou kapab *react to totally* bann keksoz ki ou pa pe ekspekte.

So in the end pou *answer* ou *question, it's a question of evaluation, planning* apre *managing your situation*. Apre ek lenformasyon ki ou pe gannnen *on the day, on the day* i annan en *control room* ki *receive* lenformasyon ki mannyer keksoz pe deroule, ou annan dimoun *on the ground*, la ou kapab fer sa louvraz byen.

Napa en lot fason fer sa bann louvraz koumsa. Mon *hope* mon'n reponn ou kestyon. Mersi Mr Speaker.

MR SPEAKER

Mersi Minis. Onorab Uranie?

HON ROCKY URANIE

Mersi Mr Speaker. Bonzour *panel*. Minis, annefe ki ou'n dir pou annan en lenvestigasyon, mon swete i ava enn ki serye, detaye. Me mon kestyon i dan ki dele letan zot pe mazine sa lenvestigasyon i fini pour ki Joycina i kapab ganny remet avek lafanmir? Mersi.

MR SPEAKER

Mersi Onorab.

MINISTER ERROL FONSEKA

Mersi Mr Speaker. Mersi Onorab pou ou kestyon. *Investigation is ongoing*, lensidan fek arive, so mon pa pou donn okenn *timeline* lo la, *this is not my job* pou donn *timeline*.

Lapolis ki fer sa louvraz e mon a les zot fer sa e mon- *as long* ki zot fer zot louvraz byen sa i enportan e natirelman *as soon* ki zot kapab fer li, e mon pa pe- mon pa pou asize la pou met en *timeline* lo en louvraz lapolis. Mersi Mr Speaker.

MR SPEAKER

Mersi Minis. Onorab Aglae.

HON EGBERT AGLAE

Mersi Mr Speaker. Bonzour Minis ek *panel* lapolis e nou bann envite ki dan Galeri.

Minis, dan ou larepons, dan mon legzistans mon'n temwannay plizyer *rally* ki'n fer *either* lo *Freedom Square* ouswa kot *Mini Stadium*, ok. E in touzour en pratik ki sa semen in fermen dan lepase. Minis, *Constitutional Day* letan fer monte paviyon i annan zis apepre en santenn dimoun forse ki vini e semen i ganny fermen.

Eski nou pe tret lafason ki nou deside pou ferm semen baze lo kalite levennman e lekel ki *attend* dan sa sirkonstans aköz ti *United Seychelles* petet zot pa'n war en priyorite pou ferm sa semen? Eski, nou bezwen fran la Minis, eski kantmenm ou'n dir si nou ferm semen i riske blok nou *rally*.

Be semen dan lepase in fermen *rally* in ganny fer li, i annan bann *alternatives*. So pou mwan, i annan serten larepons ki mon pa war li i zistifyab. Eski zot kapab petet dir nou aköz ki zot pa ti deside ferm sa semen e servi bann lot *alternative routes*, menm aktivite sport zot fer sa bann kalite *diversion*, aköz la pa ti kapab ganny fer? Mersi.

MR SPEAKER

Mersi. Mon pou apel bann Manm pou evite fer sa vin en size politik. Minis, ou annan en kestyon ou kapab reponn?

MINISTER ERROL FONSEKA

Yes, Mr Speaker. Mr Speaker, pou ferm en semen si aktivite parey nou fer ler nou annan kot *Peace Park* nou fer *National Day*, sa *the* aktivite i *on the road itself*, so sa i merite nou fermen.

Lo - nou ti fer si ou pe koz lo politik nou ti a, mon pa tro enterese pou al dan sa *area*, me si ou pe koz lo la, nou ti fer *rally* en gran *rally*, zot konnen zot menm Grand Anse, ti napa okenn semen ki ti ganny fermen. I annan dimoun menm pa'n kapab vin dan *rally* aköz semen ti bloke, par li menm. So, napa okenn priyorite politik lo la.

Natirelman, parey mon'n dir si i ti annan en *official event* ki annan serten delegasyon, *that is considered of course, that is considered*. Me napa okenn politik dan- *in fact to be honest with you*, si nou ti'n blok semen sa ti pou vin en problem politik.

Aküz la nou ti pe blok semen pou anpes dimoun al kot en *rally*, so pa ti nesese tou fason e gran mersi osi nou pa'n blok semen aköz sa ti pou vin en lot fason PNQ. Mersi Mr Speaker.

MR SPEAKER

Mersi Minis. Onorab Tamboo.

HON LOUISETTE TAMBOO

Mersi Mr Speaker. Bonzour Mr Speaker, Minis avek ou *panel*, viziter dan Galeri, koleg Manm Onorab, espesyalman zabitan Cascade ki a lekout. Mr Speaker, lapolis son manda se prezerv lavi, protez lavi.

Minis, mon konsernen avek lafason ki lapolis li menm in zer sa aktivite Dimans. Biro Komisyoner li menm i ti okouran i ti pou annan sa *rally*. *By* 11er edmi/midi lanpler sa aktivite, lakantite dimoun ki ti annan, lakantite transpor ki ti annan, mwan mon ti desann ek 20 transpor ranpli ek dimoun sorti Cascade e *by* midi edmi ler mon ti vin kot *rally* ti pe fer ti sitan bloke ti annan sitan kantite dimoun.

Mwan Minis, mon ti a kontan konnen aköz, aköz ki zot pa'n vwar nesese, aköz ki zot ti napa plan stratezik ater dan zot biro pou prepar zot lekor, antisipe, kwa ki ti kapab devlope letan ki zot ti'n vwar sa lakantite dimoun ki ti'n desann pou sa *rally* Dimans?

Alor Minis, mon kestyon i koumsa, aköz *Compol* in *fail* Minis pou li met en plan stratezik ater, pou li prezerv lavi, protez lavi Seselwa? Mersi Mr Speaker.

MR SPEAKER

Mersi. Annou pa fer kestyon vin en piblisite propagann pou *rally* silvouple. Minis...

MINISTER ERROL FONSEKA

Yes, Mr Speaker.

MR SPEAKER

...mon krwar lamazorite pwen ki Manm in leve ou'n deza adrese lo ou premye larepons, me selman si ou annan keksoz pou azoute.

MINISTER ERROL FONSEKA

Yes, Mr Speaker. Mon krwar i merit en *response*, so *obviously*. Aköz dan tou sa *verbal* konotasyon i annan en keksoz vre ki ou'n dir. Louvraz lapolis i pou prezerv lavi, e mon krwar non war dan *response* lapolis zot fason ki zot in vitman dil ek sa sityasyon parey mon'n ganny eksplike pli boner, mon pa pou al lo tousala, i montre ki egzaktaman sa ki zot in fer.

Nou kapab fer en kantite komanter lo si nou krwar zanbren pe mouy nou, ouswa si i annan en *storm*, me ti napa *storm* sa zour. *Ok*, ti annan dimoun, me ti byen an kontrol ek lapolis e mon krwar ki mannier nou'n dil ek sa sityasyon i remarke.

So, mon krwar pa si i nesese pou mon *overreact* lo sa bann egzazerasyon, me mon krwar *the fact* ki mannier nou'n dil ek sa problem, ki mannier nou'n dil ek sa sityasyon ler *response* in bezwen vini *how fast* zot in vini

lo sa *scene*, i vremen *speaks for itself* parey zot dir. *So with that* Mr Speaker, mon a termin li la. Mersi.

MR SPEAKER

Mersi. Onorab Loze.

HON JOHAN LOZE

Mersi Mr Speaker. Bonzour Mr Speaker. Bonzour tou dimoun a lekout. Mr Speaker, piblisite lo *rally* in komans avek Minis ler in koz lo son swadizan gran *rally* ki in fer Grand Anse. Pa personn ankor.

Mr Speaker, nou pou annan nou en lenvestigasyon lo aksidan li menm. Me pa sa vremen ki konsernan. En lenvestigasyon lo lafason ki bann zofisye Lapolis ki ti lo sa *scene* in ganny abandonnen par Minis li menm e komann lapolis. Sa 4 o maksimanm 6 zofisye lapolis ki ti la lo sa teren, sa i *warrant* en lenvestigasyon.

Mr Speaker, markaz lapolis lo semen li menm i montre en laliny fren ki pli o ki 3 met. I montre en *from point of impact* kot sa fiy in arete i plizyer met zistans, sa li menm li i montre ki ti nesesit en kontrol pli byen organize ki ti annan sa zour. *It's undeniable.*

Kestyon aköz i pa'n arive, sa ki *warrant* en lenvestigasyon, aköz sa bann zofisye lapolis in ganny abandonnen, parske Mr

Speaker, dan gran *rally* imaziner Minis Grand Anse ti annan doub efektif lapolis lo teren ki ti annan anvil Dimans.

Alors, *tactical evaluation* ki Minis i dir, kote i ganny fer? Dan Biro Komisyoner Lapolis ouswa *State House* par Prezidan?

MR SPEAKER

Pa akseptab! Pa akseptab. Ou pa kapab akiz Minis ek lapolis lo sa sityasyon e mon regrete ki ou'n anmenn *State House* ladan. Minis, mon pa konnen....

HON JOHAN LOZE

Mon'n akiz *State House*, pa lapolis.

MR SPEAKER

Onorab,

(comments off-mic)

MR SPEAKER

...silvouple! Minis, eski ou annan okenn komanter?

MINISTER ERROL FONSEKA

Mr Speaker, vremen i regretab ki mannyer parti i tret enn son sipoter ki zot fanmir pe pas dan en moman tre difisil ozordi. Ton sa bann kestyon i vremen nou pe al dan en sityasyon ki ou pe fabrik serten sityasyon.

E parey in dir li menm li sa sityasyon *is on investigation* e i pa- zanmen mon pou fer komantr lo la. Me tou sa bann akse ki en Manm i annan pou koze e zis vin devan sa *Speaker* dir en nenport keksoz, i zis regretan pe arive dan en moman ki en fanmir dan zot parti, pe pas dan en moman tre difisil. Mersi Mr Speaker.

MR SPEAKER

Mersi. Nou a sey gard kestyon annord silvouple lo kestyon orizinal ki lo sa lensidan. Onorab Larsen.

HON CELINE LARSEN

Mersi Mr Speaker. Bonzour a tous spesyalman zabitan Au Cap ki a lekout. E senpati a lafanmir, *may her beautiful soul rest in peace.*

Minis in dir ki pou annan en lanket ki pou ganny fer. Mwan mon ti a kontan demann Minis, eski sa lanket i enkli en lanket pou determinen si dan lanbilans ti annan lekipman esansyel pou donn sa fiy sa premye swen? Mersi Mr Speaker.

(comments off-mic)

MR SPEAKER

Order! Minis, Minis.

(comments off-mic)

MR SPEAKER

Silvouple, silvouple!

(comments off-mic)

MR SPEAKER

Onorab, Onorab Pillay, eski ou kapab gard lord?

(Interruptions)

MR SPEAKER

Order! Order! Onorab Pillay in enteronp detrwa fwa. An plis ki nenport lot Manm. Mersi.

Minis, silvouple si sa seri kestyon pa kapab reste annord, mon pou ferm li, *ok.* Minis eski ou annan okenn komantr lo kestyon?

MINISTER ERROL FONSEKA

Mr Speaker, nou'n fek eksplik sa sityasyon ki sa- nou pa pou dir nou pa pou komant lo en *investigation* apre koz lo en bout.

Mwan mon krwar mannyer sa diskisyon ouswa sa *angle* ki sa deba pe vini, annou aret fer en *circus* ek en sityasyon kot en dimoun in *pass away* la en? Mersi Mr Speaker.

MR SPEAKER

Mersi. Onorab Adelaide ou kestyon.

HON FRANCOIS ADELAIDE

Mersi Mr Speaker. Bonzour Mr Speaker, bonzour Minis avek ou delegasyon. Bonzour tou koleg Onorab, bonzour tou bann zanfan dan Galeri e tou dimoun ki a lekout.

Minis, mwan mon kestyon- dabor mwan osi mon oule felisit konstab Japha pou son lentervansyon ki in fer e mersi pour ki in kapab ed sa fiy ziska ler ki in desede. E nou senpati avek lafanmir sa madanm.

Mwan mon kestyon pou Minis, Minis petet ki mesaz ki ou pou anvoye la deor avek tou bann parti politik, ouswa tou bann groupman pour ki ler zot fer bann aktivite - mon dakor i annan leksitasyon, mon dakor tou dimoun parey en *rally* tou dimoun i anvi i laplenn i plen *whatsoever*.

Me solman i enportan ki nou annan sa responsabilite anver leta mantal nou bann dimoun ki vini. E petet ki mesaz ou pou anvoy ek bann parti pou fer sir ki sa disiplin i reste pour ki bann keksoz koumsa petet pa arive? Mersi Mr Speaker.

(comments off-mic)

MR SPEAKER

Mersi. I sanble mwan, silvouple! I sanble mwan ou'n fini anvoy en mesaz. Minis, oule fer en komanter?

MINISTER ERROL FONSEKA

Mr Speaker, mon'n fini afirmen ki i enportan ki pandan bann aktivite espesyalman dan bann letan politik ki parey mon'n mansyonnen parfwa, leksitasyon i pran plas sa rezonnman, ki nou tou nou mazin nou prop sekirite e apre nou mazin konsekans ki bann sityasyon in arive parey in arive yer. Mersi Mr Speaker.

MR SPEAKER

Mersi. Onorab Vidot.

HON AUDREY VIDOT

Mersi Mr Speaker. Bonzour Mr Speaker, tou Manm Onorab. Minis ek ou delegasyon, bann dimoun dan Galeri en bonzour spesyal pou zabitan Roche Caiman.

Minis, eski ou kapab dir nou pou sa bout levennman omwen lo kote bomaten, avan ariv ziske aswar levennman fini sa zour Dimans, kantite zofisye lapolis vreman ki zot ti'n met a dispozisyon pou zot mannye sa lafoul dimoun Dimans silvouple? Dir nou premye.

Dezyenmman Minis, mon'n ekout ou bann larepons, letan ou'n dir semen pa merit fermen. Akoz omwen sa 2 *lane* ki transpor sorti direksyon Larivyer Anglez, sa 2 *lane* la kot sa ron pwen kot i annan *traffic lights* zot pa ti

kapab ferm sa 2 *lane*, kit zis sa *lane* ki bann transpor ki sorti direksyon kot paviyon i kapab servi, kot bann kapab pase pou zot vin *rally*? Omwen ti kapab ede osi evite ki i annan en tel lensidan parey in arive Dimans. Mersi.

MR SPEAKER

Mersi Onorab. Minis?

MINISTER ERROL FONSEKA

Mr Speaker, ferm 2 *lane*, pa ferm 2 *lane* isi laba sa en kestyon taktik ki ou pe propoze, pa neseserman *is the right one*, me selman ou *free* pou dir sa si oule.

Regarding the numbers lo ki kantite lapolis - parey mon'n dir, *numbers* ki *available* i enportan pou sa groser *event*, me dan detay lo la, mon a les ACP Denousse koz lo *numbers*.

MR SPEAKER

ACP Denousse, wi?

ACP ANTOINE DENOUSSE

Mersi Mr Speaker. Bonzour Mr Speaker e tou bann Manm prezan, tou dimoun ki a lekout.

Mr Speaker, nou ti annan nou 9 zofisye lo Laveni Konstitisyon, e nou ti annan nou 15 zofisye ki ti dan Kordgard Santral, sa i norm ki nou travay avek. E tou bann zofisye ki ti lo semen ti konnen

ki i annan pou zot fer. *Commander ASP* Joel Belle ti lo semen, in satisfere son lekor poudir aktivite i deroul- son bann dimoun in fer en travay ki'n protez tou bann dimoun ki ti pe servi larout.

Nou ti annan nou 9 Zofisye lo semen, me 15 ti Kordgard, savedir okenn moman nou ti pou annan nou 24 zofisye Lapolis. Mersi Mr Speaker.

MR SPEAKER

Mersi, mersi ACP. Onorab Georges.

HON BERNARD GEORGES

Mersi Mr Speaker. Bonzour Mr Speaker, bonzour Minis avek ou delegasyon, tou bann koleg Onorab, bann dimoun ki pe swiv nou e en bonzour partikilye pou bann zenn ki dan Galeri.

Mr Speaker, lo mon non personnel e lo non nou *Caucus* isi, mon ti a kontan eksprim nou kondoleans avek lafanmir sa zenn fiy ki'n perdi son lavi. E an menm tan mon regrete ki sa sityasyon tris in vin size en *PNQ* bomaten. E selon mwan i pa le moman la pou nou aporsyonnn okenn blanm lo okenn dimoun, oubyen lo okenn lazans.

Akoz sa i pou fer nou perdi *focus* lo sa trazedi ki'n arive e sa se ki en zenn dimoun ki ti'n vin siport son

parti, ki ti'n sot lanmer pou vin Mahe in perdi son lavi dan en fason trazik.

Mon prefere Mr Speaker, avek ou permisyon remersye zofisye Lapolis ki mentenir lord ek lape sa zour; remersye sa zofisye Lapolis ki'n anmenn premye swen a sa viktim e remersye bann travayer Minister Lasante ki'n travay malgre lenterferans atraver en lannwit pou esey sov lavi sa zenn dimoun.

Mr Speaker, mon ti kontan avan ki mon terminen, zis renouvle nou kondoleans a la fanmir ki ankor an dey ozordi. E demann avek nou bann koleg Onorab e tou sitwayen Sesel pou silvouple egzers en pe pasyans e esper konklizyon sa lanket ki pe ganny fer dan sa zafer. Mon remersye ou Mr Speaker.

MR SPEAKER

Mersi. Onorab Gill, ou kestyon.

HON CHURCHILL GILL

Mersi Mr Speaker. Bonzour Minis ek ou delegasyon, bonzour tou Manm, bonzour bann etidyan dan Galeri.

Mr Speaker, mon oule met lo rikord ki sa *PNQ* ki'n vini non pa pou lev en sityasyon ki pa devret, me selman plito ki nou kapab fer pou nou evite ki *in future* ler i annan levennman, i *LDS*, i

United Seychelles, me selman nou kapab tonm dakor pou nou kapab delivre pli byen.

Alors, mon kestyon i koumsa, zofisye Lapolis ki la in fer kler - e mwan mon osi mon oule fer kler avek Zofisye Lapolis deor, ki *United Seychelles* lo sa *PNQ* pa pe blanm zot, sa bann dimoun ki ti pe travay. Akoz in sorti la, konmkwa zot in ganny lenstriksyon pou la lo *scene*, zot in ganny *deployed* pou zot fer en travay.

So kestyon, pa pe viz ver zot koman pa pe delivre me fason ki *deploy* in ganny fer, vi ki nou'n ganny dir ti annan 9. Me selman i kler ki lo *scene* avek sa manmzel ki'n fer en travay byen eroik i ti napa 9 dimoun avek li, 9 zofisye.

E an menm tan nou'n deza pas en Lalwa, en lamannman dan Konstitisyon kot nou'n dir ler i annan nesesite ki lapolis i santi i napa ase mende i servi zofisye Militer pou ede.

Eski la dan sa lenstans si nou ti'n kapab fer sa pa ti a pate evite? E vi ki sa in pase petet dan fitir, prezan nou kapab met bann lezot resours ki Konstitisyon in donn nou pou nou kapab evite bann lensidan parey? Mersi.

MR SPEAKER

Mersi. Minis, ou adrese lo size militer?

MINISTER ERROL FONSEKA

Mersi Mr Speaker. Mr Speaker, mersi pou ou kestyon Onorab. Avek tou respe, sa ki ou pe sizere, i egzakteman keksoz ki ou pa fer. Sa i *overreaction* ler ou pa bezwen *oversaturation* ek zofisye lo semen.

Sa kantite Zofisye ki ti annan ti ase e lefe ki *response was instant*, tou le de kalite *response, initial first aid was there, response team was there* i montre ki koumsa ki ou bezwen travay. E pa zanmen krwar ki plis dimoun deplwaye lo semen i fer ou louvraz pli- i kapab fer ou louvraz pli konplike. I kapab vin pli konfizyon.

E definitivman ti napa okenn nesesite pou militer vin lo la, e mon krwar sa ti pou vin en lot *PNQ* si ti annan militer o bor en *rally* politik. Mersi Mr Speaker.

MR SPEAKER

Mersi. Onorab Gabriel.

HON CONRAD GABRIEL

Mersi Mr Speaker. Mon a dir bonzour tou dimoun a lekout. Bonzour tou dimoun a lekout espesyalman bann dimoun Pointe Larue. *Welcome* bann manrmay dan Galeri.

Mr Speaker, mon'n tann Minis dir bokou keksoz la bomaten, so parey Mr Onorab

Gill in fer resorti, separasyon i vin avek bokou latristes ek douler. Mon senpatiz ek sa fanmir ki'n perdi zot pre. E mon osi pran lokasyon pou remersye sa pti group lapolis ki ti la pe ede.

Be Mr Speaker, mwan mon pe panse i annan doub standar, letan ki *LDS* i fer son bann aktivite bokou polisye i ganny...

MR SPEAKER

Mersi Onorab. Nou pa pe al ladan. Mersi. Onorab Pillay, ou a demann ou siplemanter.

HON SEBASTIEN PILLAY

Mersi Mr Speaker. Mr Speaker, mon regrete ki mon kestyon ki mannyer in ganny demande i komans vin en - mon krwar i paret ki i annan dimoun pe komans fer li vin en konotasyon politik ki nou, nou pe zwe lo lemosyon.

Mr Speaker, mon bezwen fer kler avek Lasanble ki mwan personnelman konn sa manmzel, Vandredi ler mon'n La Digue sa manmzel personnelman in tir portre ek mwan, mon'n war li plizyer fwa dan nou bann aktivite e person pa pou anpes mwan demann kestyon pou *get to the bottom* kwa ki'n arive avek li e fer sir ki sa pa arive avek en lot dimoun.

Annou met sa lo rikord e sa napa naryen pou fer ek

politik, i annan zis pou fer ek konpasyon e lanmour ki mon annan pou bann dimoun La Digue ki'n toultan siport nou koman en parti, e zot bann dimoun formidab. So, annou met sa kler, napa personn ki pe zwe politik avek sa.

Prezan Mr Speaker, annou ganny en lot keksoz kler. Nou oule etabli poudir *next time* ler i ariv en lensidan enn;- en dimoun i ganny en lensidan i ariv lopital ou kapab idantifye *so that* ou kapab fer son bann *next of kin* vini ki ti en problem sa zour. Ou kapab idantifye si i annan efektif neseler dan lanbilans, ou kapab idantifye si i annan efektif lapolis neseler Mr Speaker.

Akoz mwan mon ti la ler sa fiy pe ganny mete dan lanbilans. E ti napa 9 zofisye Lapolis a sa moman, mon felisit Mr Speaker, mon felisit Mr Speaker, Ms Japha aköz *at least* li in pran linisyativ, li in pran linisyativ e sa i byen. Me sa pa eskize ki *next time* nou annan en lensidan koumsa nou bezwen prepare pou nou kapab dil avek.

So Mr Speaker, mon annan serten keston pou Minis pou nou kapab klarifye. Minis, in dir ki zot pa ti pou kapab ferm sa semen aköz i pou kre konzesyon. Sa zour ti en Dimans, en Dimans - ki trafik ki annan ki pe *flow*

Dimans apard ki trafik ki pe vin kot sa *rally*? Ki kantite trafik kot i annan lezot semen ki sa bann- sa landrwa i kapab pase?

Alors Mr Speaker, zis 1 *cone*, 1 *cone* lo sa *lane* ti kapab sov lavi sa manmzel. So Mr Speaker, mon ti a kontan demann Minis aköz prenon kont ti annan konzesyon transpor e transpor pe ale vini e dimoun pe koup semen ti'n kapab zanfann, aköz en *assessment* pa ti reganny fer pou dir be *ok* annou ferm sa semen?

Aküz Mr Speaker, ou konnen ki'n arive pli tar? Semen in ganny fermen apre aksidan. So, la ti *ok* la, pa ti pe kre konzesyon, semen ti ganny fermen apre lensidan. So aköz nou pa ti pran sa desizyon pou nou ferm sa semen a sa moman?

Mon dezyenm keston ki'n ganny souleve Mr Speaker, e nou pe koz pe zwe politik, napa politik la, zis pou fer sir poudir lafanmir i ganny *closure*. Zot konnen poudir lapolis pe pran sarz envestigasyon, nou bann prosedir depi *attend* sa *scene* kot sa fiy in ganny tape ziska ler i ariv kot lopital nou fer sir pou sa.

Mon felisit tou bann *nurse*, tou bann dokter ki'n travay, tou dimoun, tou dimoun in sey fer zot mye pou

sey sov son lavi e nou apresye sa. Me selman lefe i reste ki dan son leker li menm li sa fyi si ou ti konn li, si sa ti'n ariv ek en lot dimoun, i ti pou sey fer tou pour ki ler *next time* sa pa kapab arive ek en lot dimoun.

So sa ki nou pe rode avek Minis se ki eski ou pe donn-eski nou kapab, eski nou kapab war en lapros - e la Mr Speaker, mon konnen ou pa oule dir be mon bezwen dir. Grand Anse Mahe mon'n verifie la kantite lapolis ki ti annan lo *scene* ti annan mwens blokaz, me ti annan 2 fwa pis zofisye Lapolis Grand Anse Mahe ki ti annan la Anvil.

MR SPEAKER

Ok, ale, prosede, prosede ek ou kestyon Onorab.

HON SEBASTIEN PILLAY

Pa derout mon kestyon, i laverite ou pa oule mon dir laverite.

(APPLAUSE)

MR SPEAKER

Prosede Onorab!

HON SEBASTIEN PILLAY

So, *motorcade US, motorcade US* Mr Speaker.

(comments off-mic)

MR SPEAKER

Onorab! Ou'n komans en kestyon, si ou anvi termin li, termin li, prosede ek ou kestyon, ou a retourn lo ou size. Mersi.

HON SEBASTIEN PILLAY

Mersi Mr Speaker. Nou pou annan *Nomination Day* e nou'n fini ganny dir poudir semen pou frenmen, *ok* sa nou'n pran sa desizyon i kapab ganny fer.

Nou ti fer *motorcade*, nou ti preski pa ganny prezans lapolis. Nou'n fer lamars, nou preski pa ganny prezans lapolis. Me selman, ler nou bann siporter ti groupe Anse Aux Pins, ti annan zofisye Lapolis dan lenz nwanr, fizi pou fer *crowd dispersal*, me ler siporter *LDS* ti groupe Au Cap personn pa vini.

So mon kestyon...

MR SPEAKER

Ou pou- Minis, Minis ou adres kestyon ki Onorab in poze silvouple.

MINISTER ERROL FONSEKA

Mersi Mr Speaker. Mr Speaker, Onorab lo en moman i dir ou ti napa gran trafik alor nou ti fasilman kapab blok en kote semen, me taler i dir ti annan bokou trafik ki nou ti bezwen plis dimoun.

HON SEBASTIEN PILLAY

Wi, be apre aksidan ki ou'n blok semen, apre aksidan ki ou'n blok semen Minis.

(comments off-mic)

MR SPEAKER

Order!

MINISTER ERROL FONSEKA

So, mon pa tro konpran ki Onorab pe- ki mannyer i pe fer son bann *assessment* pou son satisfaksyon. E parey i dir, ti napa gard? Be *Officer* Japha pa ti en gard li? *Ok? irrespective...*

(comments off-mic)

MR SPEAKER

Onorab! Ou'n demann ou kestyon.

MINISTER ERROL FONSEKA

The whole area ler lapolis pe travay lo en *area* nou apel sa en *area*, i pa neserman la kot ou *rally* i ete, *ok*. So i bezwen kouper plis landrwa ki zis la, i bezwen get bann diferan bout semen partou pou li kapab kouper.

So, lo kestyon *manpower*, parey mon oule reasir tou dimoun ki *manpower* ti ase, ti sifizan, petet pli bokou ki nou ti bezwen pou fer en louvraz koumsa. E Grand Anse, mon pa oule mansyonn Grand Anse, me in mansyonn Grand Anse.

(comments off-mic)

MR SPEAKER

Wi. Nou a...

MINISTER ERROL FONSEKA

Grand Anse, Grand Anse.

MR SPEAKER

Minis, annou pa antre dan sa bann konparezon.

MINISTER ERROL FONSEKA

Wi, mon pa a antre dan Grand Anse ki ti annan tro bokou dimoun, *ok* mon pa ava al laba.

MR SPEAKER

Mersi.

MINISTER ERROL FONSEKA

Me selman lo ou kestyon Anse Aux Pins, bann sityasyon apre *rally* ki dimoun i ek latansyon sey blok semen, pou akimil bann lezot trafik ki pa dan *rally*, apre debloke pou fer krwar i annan en gro *rally*- en gro *motorcade*, nou pou fer sir ki sa pa arive, ki trafik pa ganny bloke.

E lapolis pou pran aksyon neser ki nou bezwen. E Mr Speaker, mon kontan Onorab in mansyonn, mansyonn louvraz *Health*, mannyer *Health* in lans zot *Code 9 emergency response* ek tou neser la.

Me osi i annan en rapor ki mannyer Onorab ti bouldoz dan sa *area* laba, pa ti merite. E antre dan landrwa kot bann *staff* pe fer zot louvraz *health*, pa devret pe antre laba. Mersi Mr Speaker. E i devret get son konportman osi lo sa bann sityasyon. Mersi Mr Speaker.

(comments off-mic)

MR SPEAKER

Mersi Minis. Bon, nou'n terminen avek sa sesyon kestyon. Mon remersye. *Order!*

Mon remersye Minis e son delegasyon pou zot partisipasyon, mon swet zot bon depar e bonn kontinyasyon. Mersi.

An menm tan, Onorab-Madanm *Hansard* Raporter, ou a profite ler Minis i sorti pou apel lot delegasyon silvouple.

(comments off-mic)

MR SPEAKER

Order please! Bonzour Minis pou Lagrikiltir, Sanzman Klima e Lanvironnman Mr Flavien Joubert, e osi Mr Joel Valmont *CEO PUC* e mersi pou zot partisipasyon dan nou kestyon. Minis, nou annan en long lalis kestyon pou ou - nou pou sey gard li *focus*.

Nou'n re aranz lord demann kestyon en pe pour swiv delegasyon ki la, me

selman mon krwar la pou komanse kestyon i annord. Nou a komans avek kestyon 160- 150 e sa i dan non Onorab Michel Roucou.

HON MICHEL ROUCOU

Mersi Mr Speaker. Bonzour tou bann koleg Onorab, bonzour Minis avek *CEO*, bonzour bann etidyan ki dan Galeri, bonzour spesyal zabitan Mont Fleuri.

Mr Speaker, mon kestyon i al koumsa: - Eski Minis i kapab dir avek Lasanble si *PUC* pe mazin envestir dan nouvo *system STP*, avek plis demann sorti kot plizyer lakour pou ganny sa servis? Mersi bokou.

MR SPEAKER

Minis, ou repons.

MINISTER FLAVIEN JOUBERT

Mersi Mr Speaker. Bonzour Mr Speaker, bonzour bann Manm Lasanble, bonzour bann dimoun ki pe ekoute ozordi bomaten e osi bann ki dan Galeri isi kot Lasanble.

Mr Speaker, *PUC* an kolaborasyon avek Lazans Lenfrastriktir, pe komans lenplimantasyon 3 nouvo sistenm *STP comme* swivan: - enn, *Eve Island* 300 met pye par zour, enn Grand Anse Mahe 300 met pye par zour e enn ki pou deservi *Housing*

Estate Anse Etoile e sa i 50 met pye par zour e tou le 3 pou ganny konstrir par Gouvernman.

Mr Speaker, *PUC* i annan plan pour ogmant koneksyon *sewage* dan distrik Mont Fleuri, an partikilye Forêt Noire, pou permet sa *PUC* i bezwen konplet travay ki pe ganny fer lo plant tretman *sewage* Providence e lo sa 2 stasyon laponp ki konekte avek sa *plant*.

Sa bann travay *refurbishment* ki pou ogmant kapasite bann laponp e moderniz tretman Providence, pou ganny konplete ver lafen sa lannen. Mr Speaker, *PUC* i osi pe fer progre avek *final design* pou koleksyon *sewage* dan bann landrwa priyorite tel ki Plaisance lo lanmar e Forêt Noire, Mont Fleuri enkli osi en sistenm pou Fairview avek La Louise.

PUC i osi angaze avek travay pou koneksyon *sewage* dan kominote Canada Beau Vallon pou permet koneksyon pou anviron en ventenn lakaz. *PUC* in osi fer gran progre avek konstriksiyon a nouvo sistenm tretman *sewage* lo La Digue. Konstriksiyon bann nouvo laponp in fini komanse avek en bi pou konplet sistenm *sewage* ver lafen sa lannen.

An se moman *PUC* pe *tender* travay pou koneksyon bann lakaz ki sa osi pou

demare imedyatman apre ki Kontra i ganny donnen.

Mr Speaker, pou noukou pou bann lenvestisman ki mon'n mansyonnen i *comme* swivan: -

E sa i aproksimatif, R28 milyon pou *plant* lo Eve Island; R25 milyon pou sa sistenm lo Grand Anse Mahe, R2.2 milyon pou sa sistenm La Gogue Anse Etoile *Housing Estate*, R130 milyon pou *refurbishment plant* dan Providence, R46 milyon pou etabli 2 nouvo stasyon laponp Roche Caiman e pre kot baz *Intel Vison*, R300 milyon pou etabli sistenm lo La Digue.

I pou kout *PUC* anviron 2 bilyon pou egzekit plan pou devlop nouvo sistenm *sewage* lo Mahe ek Praslin.

PUC i enkli en konponan finansman dan son plan kapital tou-le-z-an pou enplimant agrandisman kouvèrtir *sewage* dan bann landrwa pli kritik. Kot mwayen i permet *PUC* i konsider lenplimantasyon sistenm konplet ki enkli konstriksiyon *sewage treatment plant* par egzanp pou Praslin ek La Digue e osi pou *Eve Island*. Mersi Mr Speaker.

MR SPEAKER

Mersi Minis. Ou siplemanter Onorab Roucou.

HON MICHEL ROUCOU

Minis, mersi pou ou larepons. Mon oule remerci *PUC* osi tou pou sa travay ki zot pe fer, mon ti ganny sans zwenn avek en group zabitan Forêt Noire.

Si Minis i kapab dir avek nou, i annan sa *survey* ki zot in demare dan sou distrik Forêt Noire espesyalman sa bout anba, kot bann lakour pou ganny konekte lo sistenm *sewage PUC*, ki zistans in arive e kan ki bann lakour pou kapab- kan ki bann dimoun pou kapab war bann travay i demare?

E osi nou konnen poudir i annan plizyer bann sistenm *STP* ki parey Minis in dir ki lenfrastruktir i fer apre i *handover* avek *PUC*, ki baze o bor *housing estate*. Minis, ki bann prosedir ki bann zabitan ki pa dan bann *housing estate* ki baze o bor dan sanmenm sa *area* kot sa *STP* i ete ki *handover* avek *PUC* pou zot kapab ganny konekte lo la? Mersi.

MR SPEAKER

Mersi. Minis.

MINISTER FLAVIEN JOUBERT

Mersi Mr Speaker. Mersi Onorab pou sa 2 pwen, Mr Speaker mon ava pas laparol avek *CEO PUC* avek ou permisyon.

MR SPEAKER

Mersi. Wi, *CEO*.

CEO PUC JOEL VALMONT

Bonzour Mr Speaker. Bonzour tou Manm Lasanble avek manm piblik i pe ekout nou prezan.

Mr Speaker, pou premye parti kestyon *MNA*; an se moman nou deza pe fer sa planifikasyon pou sa *survey* dan Forêt Noire, nou pe rankontre serten *setback* si *MNA* i kapab ed nou avek. Apre mon fer en rapel la piblikman kot *timing* pa pe marse avek kan nou *surveyor* i lo *site*, *versus* kan bann dimoun ki *own the premise* i *available*.

Nou konpran i annan en zesyon kot dimoun i bezwen al travay, wi, nou pe esey travay avek pou nou sey reaziste, me selman en lapel pou nou ganny prezans sa bann dimoun pou nou kapab konplet sa *survey* pou kapab ed nou. Sa en lapel mon fer pou dimoun Forêt Noire.

Kot i konsern son dezyenm parti kestyon Mr Speaker, i annan en bout ki kekfwa mon devret touse avan mon al lo la kot i konsern kan eski nou pou demare avek koneksyon dan Forêt Noire.

Minis in fer resorti ki toultan ou pa konplet sa proze Providence avek sa 2 stasyon laponp, nou pou tenir met pare tou louveraz *tender*, apre

la ki nou pou kapab komans demare pou *amend* sa porsyon Forêt Noire *onboard*. Pou le moman dan sa *area* plato Forêt Noire, Plaisance nou pwen kritik i sa bout ki nou, nou'n kategorize koman Plaisance lo lanmar.

So nou pe donn sa priyorite annavans apre la nou a bouz de lavan avek Forêt Noire. Sa pou met sa premye kestyon an konplet Mr Speaker.

Kot i konsern *housing estate STP* avek bann lakaz ki trouve dan zanmerant, ozordi *PUC* pa ankor finaliz en *takeover* avek *PMC*. Nou annan sa lanbisyon pou nou fer li, nou devret fer li avan lannen i fini.

E pou le moman mon mazine kekfw sa bann dimoun ki enterese pou ganny koneksyon kekfw zot devret komans deklar zot lentere *either through PMC*, oubyen avek *PUC* e ler nou, nou *take over* sa bann *STP* la nou a kapab evalye, gete kwa ki nou kapab avek en serten fakter rezonnab al konekte zot kot i permet. Mersi Mr Speaker.

MR SPEAKER

Mersi. Mon oule dir bann Manm mon annan 17 kestyon lo *Order Paper*, i zis pa pou posib pou mwan *extend* lalis siplemanter, mon pou sey pran serten vitman. Mon a

demann Onorab John Hoareau ou kestyon.

HON JOHN HOAREAU

Mersi Mr Speaker. Mr Speaker, dabor mon oule remersi *PUC* e Minis ki ansarz *PUC* pou sa travay ki zot in fer e lo lanmar e pou osi inisye en serten travay ki pou komanse Canada.

E mon ti ava zis kontan si Minis ti a klarifye kan ki zot pou komans sa travay Canada? Mersi.

MR SPEAKER

Mersi. Minis, briyevman silvouple, kan?

MINISTER FLAVIEN JOUBERT

Mersi Mr Speaker. Mersi Onorab, Mr Speaker, *CEO PUC* i a kapab reponn sa kestyon. Mersi.

MR SPEAKER

Yes, *CEO*.

CEO PUC JOEL VALMONT

Mr Speaker, pou sa rezyon Canada nou'n demare nou, nou deza pe fer bann luvraz preparasyon. So, kontrakter in deza mobilize mon kapab dir, en *soft mobilize* si oule apel sa.

So dan sa mwan la i sipoze pe komans *the work proper*. Mersi Mr Speaker.

MR SPEAKER

Mersi. Onorab Loze, ou kestyon.

HON JOHAN LOZE

Mersi Mr Speaker. tre vit Minister. Minis, nou konnen ki i annan en gran konsantrasyon lo popilasyon, lo lakot les Mahe e ou'n masyonn 2 stasyon 300 met kib par zour.

Mon kestyon se ki kantite *redundancy* pou le fitir in ganny *built in* dan sa 300 met kib par zour? Dan konbyen lannen i pou *attain* son maksimanm satirasyon par zour? Mersi Mr Speaker.

MR SPEAKER

Mersi. Minis.

MINISTER FLAVIEN JOUBERT

Mersi Mr Speaker. Mersi Onorab, pou ou kestyon. Mr Speaker, mon ava envit *CEO PUC* koz lo la, me selman foudre remarke ki sa bann stasyon i ganny planifye pou en *zone*, e normalman dan sa *zone* i annan estimasyon la kantite popilasyon ki ou espekte pandan lavi sa stasyon.

Nou konnen poudir sa stasyon Providence i pe kouver sa *zone* Greater Victoria avek en parti Providence ek serten landrwa dan Mont Fleuri, Plaisance dan zalantour. Me i pa pou kapab ariv pli lwen, alor i pou annan lezot plan ki

pou bezwen ganny planifye pou nou kapab kouver bann lezot *zone* pli dan sid oubyen pli dan nor sa stasyon.

Me mon a envit *CEO PUC* pou klarifye lo kantite *redundancy* ki annan dan sistenm aktyel, prenon kont grander popilasyon i pe deza servi sa stasyon. Mersi Mr Speaker.

MR SPEAKER

CEO.

CEO PUC JOEL VALMONT

Mr Speaker, *MNA* in poz en kestyon ki demann en pe kalkil. Me selman mon a komans avek Grand Anse, sa plant pou Grand Anse Minis in masyonn 300 met kib, savedir provizyon pou anviron 600 a 650 lakaz.

Pou komanse nou premye faz nou pou konsantre lo bann *housing estate* Gouvernman ki pli kritik, apre sa faz 2 nou pou gete bann lakaz ki pre annalan *network* pou nou kapab anmenn *onboard*.

Tou nou plant ki nou devlope nou develop avek serten *module* kapasite pou *expend*, parey sa enn Grand Anse nou pou kapab *expand* li baze lo grander siperfisi later ki annan pou nou kapab a lonterm kontinyen *amend* plis bann *premise* ki dan kritik dan sa *area*. Sa etrwatman lo

Grand Anse. Ekivalan pou Eve Island akòz i menm kapasite.

Kot i konsern a ler aktyel nou annan nou anviron 6mil konsonmater *sewage*, en *mix of* komersyal avek domestik e nou annan 2 plant ki pe plant *main* plant ki pe deservi sa, Providence avek Beau Vallon, apre nou annan Pointe Larue osi ki li i anmas Nageon Estate *proper*.

So, eski nou annan kapasite pou anmas ankor? Byensir apre ki nou fini sa louvraz lo Providence nou pou kapab kontinyelman ogmant Providence ziska son *full* kapasite. Providence i vir lo en *nominal capacity* 7mil a 7mil500 met kib par zour, savedir nou pe koz anviron en popilasyon- pa en popilasyon me en kantite lakaz ver 14mil, 15mil lakaz koumsa a ler aktyel.

Me Providence osi ki mannyer in ganny *built* avek rezervasyon pou nou *modular* in *increase* apre. So, i en keksoz finansye, i en keksoz *planned*, apre i en keksoz priyorite ki mannyer nou bouze pou anmas sa bann landrwa priyoriter apre ki mannyer nou bouz avek sa ki *master plan* i preskrir. Mon krwar mon'n sey adres sa. Mersi Mr Speaker.

MR SPEAKER

Mersi. nou ava aksepte sa. Onorab Roucou ou kestyon 151.

HON MICHEL ROUCOU

Mersi Mr Speaker ankor. Kestyon 151 i al koumsa: -

Eski Minis i kapab dir avek Lasanble ki travay son Minister pe fer, atraver *PUC*, pour demark landrwa kot kab elektrik i pase dan *St Anne Marine Park*, pou ki zot pa ganny andomaze par bato, e anpes koupir kouran lo bann zil dan sa rezyon? Mersi.

MR SPEAKER

Mersi. Minis?

MINISTER FLAVIEN JOUBERT

Mersi Mr Speaker. Mersi Onorab. Mr Speaker, sa kab soumaren ant Mahe ek Ile Aux Cerf ti ganny enstale an 1990, i deservi en sistenm elektrisite pou Ile Aux Cerfs, Sainte Anne, Ile Ronde, Moyenne e osi Ile Longue. Sa kab in ganny enstale dan en bon- dan en *zone* kot en bato pa devret pe mouye avek zot lank.

Larout sa kab i klerman demarke dan bann kart navigasyon e sa i bann kab ki enternasyonal, sa bann demarkasyon lo kab i etandi 200 met lo sak kote pozisyon kot sa kab i sitye.

Alor, petet i annan serten dimoun pa pe konsilte zot kab

navigasyon letan zot pe fer zot bann aktivite dan sa rezyon. Pou amelyor sekirite ek vizibilite, pozisyon kot sa bann kab sitye, *PUC* in resaman met 2 bwe, ki enkli en sistenm lalimyer pou gidans navigasyon lannwit.

PUC in osi anvoy kominike an ekrir, tou bann kot tou bann operater *yacht* pou fer en lapel anver zot bann kliyan kot sa kab i pase e pou averti zot lenpak ki lank bato i kapab koze lo sa kab. Nou konnen ki reperkisyon i serye letan i ariv sa bann kalite lensidan kot servis delo ek elektrisite lo sa bann zil i kapab ganny koupe.

Mr Speaker, an rekonesan lenportans sa kab soumaren pou bann konsonmater lo Zil Pros, *PUC* in fini plas komann pou en nouvo kab soumaren avek doub kapasite. Sa enn ki deza egziste aktyelman sa nouvo kab pe ganny fabrike an *Chine* e i sipoze ariv Sesel an mwan Novanm sa lannen.

Si kondisyon letan ek resours i permet *PUC* pou *plan* pou enstal sa kab avan lannen ouswa sinon an Avril- avan Avril lannen prosen. Sa dezyenm kab pou amelyor kapasite transfer elektrisite e osi permet serten *redundancy*, pou ler en kab i ganny andomaze dan sa rezyon. Mersi.

MR SPEAKER

Mersi. Minis. Siplemanter Onorab Roucou.

HON MICHEL ROUCOU

Mersi Mr Speaker. Minis, mon oule remerci *PUC* pou travay ki zot in fer ler i annan sa bann lensidan lo sa bann zil dan sa rezyon la. Minis in dir poudir an Novanm ki sa lot kab i riske ariv dan pei.

Me an se moman la Minis, ki - zot in dir ki i annan bann bwe ki'n ganny mete pou demark sa landrwa pou anpese ki bann bato i larg zot lank la.

Aprè sa mon ti a vouldre konnen i annan aneef Sainte Anne ler i ariv bann lensidan koumsa, i ti *provide* bann zil dan sa rezyon avek kouran ki zot gannye lo zot zenerater. Be tou dernyerman ler ti annan sa lensidan zot pa ti kapab fer li aköz zot lotel ti plen.

An menm tan ki zot pe esper kot sa kab i ariv Sesel, Minis ou kapab dir avek nou si *PUC* i kapab annan en serten dyalog avek Sainte Anne an vi ki zot kapab *provide* Sainte Anne avek sa aköz napa lezot fason, e si sa kab li menm li ki zot pou fer vini si i pou en *back up* oubyen si i pou ranplas sa enn ki deza la.

E osi Minis, si i annan en dyalog avek bann zabitan ki

deza pe reste lo sa bann zil lo kote pou kapab annan en zenerater ki pou kapab deservi zot dan bann letan ki pou kapab annan dan problemn? Mersi.

MR SPEAKER

Mersi. *Ok*, sa en siplemanter. Minis, ou adrese oubyen *CEO*?

MINISTER FLAVIEN JOUBERT

Mr Speaker, mon a envit *CEO* pou reponn sa bout kestyon. Mersi.

MR SPEAKER

Ok, CEO.?

CEO PUC JOEL VALMONT

Mr Speaker, mon krwar i annan anviron 3 kestyon *MNA* in poz devan. Eski nou kapab koz avek operater *Sainte Anne Hotel*?

Wi, nou an konversasyon avek zot, zot osi zot limite lo zot kapasite zenerasyon. An aktyel nou pe fer konversasyon pou ranforsi zot osi zot kab soumaren pou nou fer sa proze pou zot, pou zot finanse antyerman. Nou dan sa kalite kolaborasyon pou le moman, me pou zot kapab ed nou dan letan ki nou kapab annan en problemn nou kapab- probabilitè i vreman, i vreman minimim. Sa i enn.

Kot i konsern en zenerater lo zil Cerf Island,

enn bann *advocacy* ki nou fer avek bann *operators* sirtou bann biznes se fer sir zot annan en *back up* ki marse avek dekwa *fuel* pou kapab tenir omwen 2 a 3 semenn, *roughly* letan ki nou pran pou nou kapab rod problemn apre repar kab.

I pa dan nou plan pou nou met en zenerater lo Cerf Island koman *back up* pou le moman. I en loperasyon ki en pe ou kapab dir pou koute, apre i en loperasyon *fuel* ki en pti pe delika apre konplike. Nou prefere fer sir ki nou kab i arive an Novanm, nou prefere kontinyen donn piblik serten *awareness* kot sa kab aktyel i ete.

E nou kit *fingers crossed* ki arivan Novanm nou kab i arive e nou dan en pozisyon kot nou kapab enstal sa nouvo kab pou donn en pe plis sekirite elektrik kot bann Zil Pros i konsernen. Mon krwar mon'n adres preski tou le 3 Mr Speaker. Mersi.

MR SPEAKER

Byen. Nou a bezwen aksepte sa *CEO*, nou a pas lo- nou annan en kestyon Onorab Loizeau.

HON NORBERT LOIZEAU

Mersi Mr Speaker. Bonzour tou dimoun a lekout. Minis ek ou delegasyon.

Mr Speaker, mon anvi demann Minis an term lenerzi renouvlab, ki plan *PUC* pou sa bann zil parey Ile Aux Cerfs, Sainte Anne an term lenerzi renouvlab parey Desroches i annan, Ile Platte i annan kot zot al prodwi zot prop lenerzi renouvlab an menm tan ki zot ava kapab annan *at least* en *back up generator* an ka si zot sistenm lenerzi renouvlab i *go down*? Mersi.

MR SPEAKER

Mersi Onorab. Minis?

MINISTER FLAVIEN JOUBERT

Mersi Mr Speaker. Mersi Onorab, pou sa kestyon tre enportan. Mr Speaker, i annan en program pou ankouraz bann Antite domestik e osi bann biznes pou adopte lenerzi renouvlab.

Sa program i apel *SEEREP*, in ganny relanse sa lannen e in ganny anonse dan Bidze, fasilite i la e Minister Finans ek nou Minister in deza fer bann lanons lo lafason ki keksoz pou marse anba sa program.

E mwan mon pou ankouraz bann rezidan lo Ile Aux Cerf pou zot osi travay avek bann Lotorite pou zot akse sa bann fasilite e met an plas bann sistenm lenerzi ki fer zot vin mwen depandan lo *PUC* e kot zot kapab osi met

bann mezir an plas pou zot redwir zot demann pou lenerzi.

Akoz parfwa osi letan ou annan en fasilite ki annan bokou an term demann letan i ariv en koupir, la ou war ou dan problem. Alors, si zot kapab redwir en bon pe zot demann, zot pou war zot e depan lo bann sistenm renouvlab, zot pou kapab fer fas avek bann lensidan letan i arive.

Alor, fasilite i la, mon pou envit bann dimoun lo sa 2 zil e osi bann ki enterakte avek zot menm bann *MNAs*, enform zot poudir zot kapab fer kontak avek Minister e nou ava fer laranzman pou zot ganny byen lenformasyon lo fasilite ki deza egziste e lo lafason ki zot kapab kontakte bann *suppliers* e enstal bann sistenm lo zot batiman.

Nou konnen poudir Ile Aux Cerf i plito bokou propriyete prive, disperse i pa en sel antite parey Desroches parey lezot zil kot ou annan en sistenm santral, alor i pou konplike pou annan en sistenm santral pou Ile Aux Cerfs.

Me ou kapab annan diferan sistenm distribye sakenn son batiman ki fasilite son- ouswa ki siplemant son konsonmasyon pou son lakaz ouswa pou son letablisman. Alor, nou pe anvoy bann

dimoun pou fer kontak ek nou e nou ava gid zot lo lafason ki zot kapab akse lenerzi renouvlab pou zot landrwa. Mersi.

MR SPEAKER

Mersi Minis. Mon a bezwen avans lo prosen kestyon 152, Onorab Waven William.

HON WAVEN WILLIAM

Mersi Mr Speaker. Bonzour tou dimoun ki a lekout. Mr Speaker, tou dabor avan mon demann mon kestyon, mon ti a kontan swet la byenveni bann etidyan Lekol La Misère Primer e an menm tan Ms Angela Cafrine, Elisha Azemia e osi *constituency clerk* ki Ms Maria Boniface.

E Mr Speaker, mon ti a kontan dir ki sa bann etidyan ki'n vini, se bann etidyan ki'n travay dir sorti premye, dezyenm, trwazyenm dan primer ziska P6. En gro lanmen pou zot. Mersi.

(APPLAUSE)

HON WAVEN WILLIAM

Mersi. Mr Speaker, kestyon i *comme* swivan: -

Eski Minis i kapab eksplik Lasanble stati sa nouvo proze tretman desarz ki pou ganny konstri Grand Anse Mahe? Mersi.

MR SPEAKER

Mersi Onorab. Minis, repons?

MINISTER FLAVIEN JOUBERT

Mersi Mr Speaker. Mersi Onorab pou sa kestyon. Mr Speaker, *PUC* pe antisip siny Kontra pou konstriksyon sa *plant* tre byento ki pou sitye Grand Anse Mahe e zot espekte fer sa dan mwan Zilyet.

Konstriksyon sa *plant* pou pran anviron 8 mwan pou konplete. Kot i konsern konstriksyon en sistenm *network* en siperfisi avek en siperfisi ki pou kouver.

Kot i konsern konstriksyon en sistenm *network* i pou en *network* ki pou en siperfisi ki pou kouver larout ant Orchid Village ziska kot Lekol Grand Anse avek priyorite pou kolekte sa 2 fasilite Gouvernman Orchid Village enkli bann *emergency house* avek *housing estate* Grand Anse *STC*.

PUC pe swiv prosedir *planning approval* e *PUC* i osi angaze avek *Procurement* pou lekipman bann stasyon laponp pou deservi sa *network*. Lobzektif *PUC* se pou konplet sistenm *network* ansanm avek konstriksyon *sewage treatment plant*.

Mr Speaker, i bon note ki sa proze pou osi permet koneksyon *sewage* pou *Ex-Trioan Housing Estate* avek

bann flat Dan Limon e osi bann lezot lakaz ki sitye pres avek sa sistenm *network*. Sa pou ganny antreprann koman en dezyenm faz sa proze. An tou sa *plant* i kapab resevwar 300 met kib par zour, e i pou kapab konekte anviron 600 lakaz. Mersi.

MR SPEAKER

Mersi. Ou siplemanter Onorab William.

HON WAVEN WILLIAM

Mersi Mr Speaker. Minis, eski ou ti a kapab dir avek Lasanble - par lefe ki nou konnen poudir i annan propriyete prive, kan zot espekte fer bann miting ouswa *survey* pou vwar avek bann propriyeter pou kapab donn later pou kapab pas bann tiyo ki pou deservi bann lakaz?

E dezyenmman Minis, par lefe ki *land bank* Barbarons i annan en gro problem, mon pa'n tann ou nonm *land bank* Barbarons ki enkli faz 1 avek faz 2, eski zot osi zot pou ganny konekte dan lavenir lo sa *sewage treatment plant*? Mersi.

MR SPEAKER

Mersi Onorab. Minis, repons?

MINISTER **FLAVIEN**
JOUBERT

Mersi Mr Speaker. Mr Speaker, sa dezyenm parti keston mon krwar i ase kler.

Sa *plant* son kapasite i permet pou li pran tou sa bann fasilite sa bann lakaz ki annan dan rezyon Grand Anse, e mon pa doute ki i pou kapab pran *land bank* Barbarons. Sa *PUC* i ava get dan son teknikalite ki mannyer i pou kolekte li, me selman kapasite i la pou li kapab resevwar sa kantite *sewage* sorti kot sa *land bank*.

Mon ava pas laparol avek *CEO* pou donn en pe lenformasyon o *survey* pou aliman *network* dan rezyon Grand Anse. Mersi.

MR SPEAKER

Tre byen *CEO*, ou annan laparol.

CEO PUC JOEL VALMONT

Mersi Mr Speaker. Mr Speaker, pou lenformasyon *MNA*, an se mon nou pe konsantre lo *the main artery of the network*, ki nou pe propoze i pas *either* dan en kote semen oubyen o bor semen kot nou pa pe tous propriyete prive *per se*.

Aprè sa ki nou pou vin avek bann *sub arteries* la kot nou pou bezwen pou kapab met bann *connection manhole* lo bann propriyete prive, la kot nou le vin lo nou dezyenm

round ki nou pou vin ver sa lapros kot nou vin piblik.

Pou nou premye konsantrasyon la, i etabli sa *network*, the *main arteries* bann laponp ki nou'n bezwen pou transfer *sewage* apre la *phase* li as nou ale. Mersi Mr Speaker.

MR SPEAKER

Mersi. Nou a sey gete ki nou kapab fer ver siplemanter lezot Manm. Onorab Arissol.

HON SANDY ARISSOL

Mersi Mr Speaker. Bonzour Mr Speaker, bonzour Minis, bann zanfan dan Galeri.

E mon osi mon ti a kontan anvoy en mo senpati Mr Speaker, pou lafanmir Joycina, Joanna Adrienne e tou bann dimoun La Digue e tou lezot fanmir ki'n perdi en manm zot fanmir sa semenn ou semenn pase.

Mr Speaker, mon ti a kontan demann Minis en keston, an vi ki Minis in koz bann *housing estate* ek flat Grand Anse Mahe, mon ti anvi demann avek ou Minis, eski *PUC* i annan en travay ant *PUC* avek *PMC* *in regards to* bann blok flat ki ou'n mansyonnen ki deza annan en sistenm *STP* ki Onorab William pe demande?

Kot i annan sa travay ki ganny fer parey nou'n fer delo ladal pour ki bann *STP* pe

travay zot *full* kapasite ki bann fanmir pa ganny afekte. Parske, Le Domaine Flat Au Cap bann fanmir pe ganny afekte en kantite e i annan en lanmar zis o bor kot parfwa son *overflow* i al laba.

Pour ki bann dimoun zot viv byen e i annan sa bann travay ki ganny fer ant *PUC* avek *PMC* pou bann fanmir pa ganny afekte. Mersi bokou Mr Speaker.

MR SPEAKER

Thank you. Minis?

MINISTER FLAVIEN JOUBERT

Mersi Onorab. Mersi Mr Speaker. Mersi Onorab pou sa keston. Mr Speaker, wi i annan en travay ki *PUC* pe fer ase entans avek *PMC* e mon okouran ki i annan plizyer *STP* ki'n deza ganny analize dan sa zefor.

Mon ava envit *CEO PUC* pou donn en pe detay kote zot ete ozordi avek travay, pou fer sir ki bann *STP* dan bann *housing estates* i fonksyonnen e i donn sa performans ki nou bezwen e i kapab gard lanvironnman prop. Mersi.

MR SPEAKER

Mersi. *CEO*?

CEO PUC JOEL VALMONT

Mr Speaker, mon kapab dir poudir nou'n konplete fer en

revi anviron 22 *STP*, Mahe enkli Praslin ki apartyen anba loperasyon *PMC* ozordi.

Pou rekomandasyon kote pou amelyore, lekel sa bann ki bezwen ganny ranplase osi nou'n fini annan en premye diskisyon avek *PMC*, prezan nou dan prosedir kot nou bezwen retourn lo latib, *sort out en operations and maintenance contract* pou *PUC take over*.

Apré bouz devan avek amelyorasyon lo- dan sa bann sistenm parey *MNA* pe fer referans avek. Ozordi *PUC* nou'n monte lentere avek *SIA*, nou pe *operate* zis sa enn kot Remise Anse Royale i annan en gran defayans laba li osi. So nou a pe ed *SIA* avek sa enn apre la nou ava kapab bouze al pran lezot avek *PMC*. Mersi Mr Speaker.

MR SPEAKER

Mersi *CEO*. Bon, mon pou avans lo lot kestyon. Mon regrete, souvan e mon pe war mon pa kapab donn plis ki en siplemanter lo bann kestyon. Be la mon bezwen sanz delegasyon.

Donk mon a remersye Mr Joel Valmont pou son partisipasyon e an menm tan Madanm *Hansard* Raporter ou ava apel lezot zofisye pou prosen seri.

Ok, bonzour e byenveni Mr Shane Emilie *CEO LWMA*,

Mr Rahul Mangroo *Deputy CEO*. Mersi pou zwenn nou. Prosen kestyon 153 Onorab Rocky Uranie.

HON ROCKY URANIE

Mersi Mr Speaker. Kestyon i lir koumsa: -

Eski Minis i kapab enform sa Lasanble si son Minister i annan plan pou en lot *landfill* lo La Digue? Mersi.

MR SPEAKER

Mersi. Minis.

MINISTER

FLAVIEN

JOUBERT

Mersi Mr Speaker. Mersi Onorab pou ou kestyon. Mr Speaker, Minister napa plan konstrir en nouvo *landfill* lo La Digue, sa i aköz limitasyon later en lanvironnman ki delika e osi volim salte ki pe gay prodwi lo sa zil ki permet zesyon an servan lezot lapros.

Annefe Mr Speaker, bann lapros ki nou pe gete dan le fitir se ki nou pou bezwen koupe lo *landfilling* pa zis lo La Digue, me osi lo Mahe avek Praslin.

Dan nou programm zesyon salte lo La Digue, ki pe ganny enplimante par Lazans *LWMA*, nou pe met lanfaz lo prolongasyon lavi sa *landfill* ki deza egziste Linyon Estate ek separasyon maksimanm bann konponan ki kapab ganny trete dan lezot fason.

Sa i anliny avek nou plan stratezik LWMA e osi Polisi zasyon salte ki ti ganny aprouve par *Cabinet* le 22 Me sa lannen.

Swivan i bann mezir ki deza an plas e ki pe ganny konsidere pou La Digue. Premye se konstriksyon en nouvo miray pou anpes salte debord lo semen e ogmant lespas pou resevwar salte dan sa bann prosen lannen. E sa i pe al komanse byento.

Aprè i annan aranz drenaz ek basen pou anmas *leachate*, sa i a delo ki sorti dan fon *landfill* amelyorasyon son sistenm tretman e osi fer en sistenm kaptaz siplemanter pli ba pou kapte okenn desarz ki sape sorti dan sa *landfill*.

Aprè i an amelyorasyon profil e konpasyon *landfill*-konpaksyon *landfill*, ki ava kapab- pour ki i a kapab resevwar plis salte lo bann lespas k pa ankor ganny byen itilize.

Aprè sa i annan kontinyasyon avek segregasyon diferan klas salte ki pa ganny aksepte dan *landfill*, tel ki feray, gro debri koni koman *bulky waste* e osi bann salte organik.

Sa bann salte e tou feray oubyen gat debri, pe ganny depoze dan en baraz ki pli tar zot ganny transporte lo Mahe pou program resiklaz par bann biznes lokal. Depi 2024

ziska 2025, lazans in reisir retir plis ki 500 tonn feray ek debi sorti lo La Digue.

Kot i konsern debri organik parey bann morso dibwa, pou sa nou pe travay avek Linyon Estate pou nou kapab relans program konpostaz.

Amelyorasyon lo lafason ki *landfill* pe ganny zere par kontrakter an servan meyer lekipman, pou akonplir en pli bon konpasyon. Sa pe ganny adrese dan nouvo *tender* pou *landfill* ki pe ganny lanse avan lafen sa lannen.

Pou mwayen term, Minister pe komans demars pou enstal en zenerater pou bril salte e si i posib prodwir en pe lenerzi. E la mon dir si i posib aköz pa toultan ki nou kapab prodwi sifizaman lenerzi avek sa bann sistenm.

Sa i ava ouver plis posibilite pou met bann salte-pou tret bann salte ki ariv kot *landfill* e osi reabilit sa akimilasyon ki deza egziste ozordi lo La Digue. Mersi.

MR SPEAKER

Mersi Minis. Onorab Uranie, ou siplemanter.

HON ROCKY URANIE

Mersi Mr Speaker. Mersi Minis, pou ou repons. Minis, ou'n nonm bokou keksoz ki zot anvizaze fer. Petet eski pli tar mon pou kapab ganny

komitman sa bann dat, sa bann proze ki ou'n mete kan zot pou komanse? Mersi.

MR SPEAKER

Mersi. Wi, Minis, oule adres sa?

MINISTER FLAVIEN JOUBERT

Mersi Mr Speaker. Onorab, parey mon'n anmenn sa bout amelyorasyon *landfill* in deza komanse travay pe ganny fer avek lazans lenfrastruktir pou fer sa bout miray pou refer sa sistenm tretman *leachate*, e osi pou fer en sistenm kaptaz pou okenn delo ki sape. Sa i en keksoz ki pe ganny fer, i dan son program aktyel avek Lazans LWMA.

Triyaz konpasyon ek met annord sa sit kot bann salte i ganny akimile i deza *ongoing* e Linyon Estate li nou pe esper serten lenformasyon avek li pou nou siport li pou li relans byen son fasilite *composting*. Kot i konsern en zenerasyon ki en plan mwayen term aköz pa reste bokou lannen pou sa *landfill*, nou'n deza komans fer diskisyon inisyal avek SIB.

E nou, nou oule fer en lapel pou *expression of interest* pou sa ki kapab founi lekipman ki rezonnab, e ki donn nou sa performans i nou bezwen ki nou a kapab servi li lo La Digue koman enn bann premye legzanp kot nou fer en

zenerasyon salte ki nou konnen i bann solisyon pli apropiye pou bann landrwa parey La Digue ozordi.

So sa i en keksoz ki nou'n deza demare, nu ti a voudre ki dan sa prosen 6 mwan nou pe demar li avek SIB ki pran nou kapab anmenn en fasilite pou La Digue i pli *long term*. Mersi.

MR SPEAKER

Mersi Minis. Nou a pran kestyon 154. Onorab Audrey Vidot.

HON AUDREY VIDOT

Mersi Mr Speaker. Bonzour Minis avek ou delegasyon. kestyon 154 i lir *comme* swivan: -

Swivan plizyer rapor ek portre ki mon'n partaz avek LWMA pour debrans sa bann gro pye bodanmyen kot zabitan ki reste dan zanmerant ronpwen *Roche Caiman Fountain* ziska kot *Sewage Plant* - semen Bwa Rouz ki'n eksprim serten konsern.

Eski Minis i kapab enform sa Lasanble aköz sa bann pye bodanmyen pa pe byen ganny debranse regilyerman e kan ki LWMA pour fer provizyon pour fer kontrakter debrans sa bann pye bodanmyen? Mersi Mr Speaker.

MR SPEAKER

Mersi. Minis.

MINISTER **FLAVIEN**
JOUBERT

Mersi Mr Speaker. Mersi Onorab, pou ou kestyon. Mr Speaker, dan sa bann dernyen lannen swivan demann kontinyel, lazans in retir pye dibwa kontinyel trouve lo sa bordaz semen, sa morso semen ant laponp *PUC* pou vin kot ronpwen Roche Caiman e in menm tay sa bann kanpes tre ba.

I reste apepre ozordi 3 pye bodanmyen trouve a kote sa ronpwen ki ankor la e ki Onorab pe fer referans avek. Kot sa 3 pye bodanmyen i ganny trouve i annan en proze miray ki pou ganny fer par Lazans Lenfrastriktir *SIA*.

Konprenezon se ki i annan ant *SIA* ek Gouvernman Lokal ek Lazans *LWMA*, se ki letan kontrakter i ariv kot sa bann pye dibwa nou pou fer en desizyon kwa ki pou arive avek zot, i posib serten pou ganny retire antyerman e petet serten i a kapab ganny garde.

Antretan, lazans pe fer serten travay debransman lo sa bann pye dibwa e sa i sipoze arive byento. Mr Speaker, an sa ki konsern problem pye dibwa dan semen Bwa Rouz, sa ki ti ganny plante- sa i ti ganny plante dan proze

redevlopman Roche Caiman depi son konsepsyon.

Sa landrwa i vreman so, e apre diskisyon ti annan en desizyon kolektiv ant Minister Lilizasyon Later ek Labita sa letan, Minister Gouvernman Lokal ek Departman Lanvironnman pou anmenn lonbraz e an menm tan promouvwar plis fri lokal dan sa kominote.

LWMA ti konsey distrik Roche Caiman lo meyer fason pou tay sa pye dibwa lo semen Bwa Rouz pou evite koup li e i ti donn da en lalis kontrakter konpetan ki kapab fer sa travay. Nouvo *DA* in agree ki zot ava adres sa problem zot menm.

Me Onorab, menm si ou kestyon pe koz lo debranse ouswa retir serten pye dibwa, nou pa ti a voudre antre dan en kanpanny detri pye dibwa dan bann rezyon irben, akoz nou konnen i zwe en rol pou kalite nou lanvironnman e lafason ki nou adapte avek lefe sanzman klimatik sirtou kot i konsern lasaler.

Alor, solisyon ki nou pe anvizaze se ki *LWMA* ansanm avek lanvironnman ek Lotorite Distrik, i travay lo en plan rebwazman an servan bann plan ki natif e ki pli apropiye pou sa bann bor semen an antye.

En fason ki nou ava annan sa kouvertir ver sa ki

nou bezwen pli tar pou fer- san ki nou bezwen pli tar fer lentervansyon agresiv pou kontrol sa bann plant. Mersi.

MR SPEAKER

Ou siplemanter Onorab Vidot.

HON AUDREY VIDOT

Mersi Mr Speaker. Mr Speaker, mon note ki mon kestyon mon ti soumet depi le 16 Me 2025.

A plizyer repriz parey mon'n dir Minis, nou'n demann lazans e mon menm an personn avek ansyen DA Maria Thomas ki ti la sa letan, kot nou'n zwenn avek CEO an referans avek sa bann pye dibwa e tou sa letan in annan retar lo *maintenance*.

Se pour sa rezon ki nou'n bezwen anmenn i dan Lasanble. Eski ou Minis ou kapab donn nou zabitan Roche Caiman en langazman, ki bann ki zot pa ou kapab koupe ki mon osi mon an faver, mentenir serten pye dibwa dan donn distrik pou gard sa verdir.

Me garanti nou ki bann ki kapab ganny byen *manage* pour ki zot fer kontrakter le neserer pou fer *trim*, espesyalman bann ki viz kot lakour sa bann dimoun, akòz i lo later Gouvernman. Ok Minis, si ou kapab donn nou en langazman pou sa.

Minis, ou'n dir nou poudir i annan ki distrik anba proze miray wi, eski zot in konfirman, savedir zot pou dakor bann ki ou ganny afekte pou bezwen ganny retire?

E dernyen Minis, dan sa menm zanmerant i annan ki espesyalman kot sa ron pwen ki pres kot i annan sa *zebra crossing*, i annan pye bodanmyen la ankor ki pa pe byen ganny *maintained*, e sa bann pye bodanmyen i deza pe kre serten *crack* dan sa miray *existing* la o bor kot PUC i *maintained*.

Si i posib pou regard pou en bon analiz si i posib i pou ganny *trim* oubyen ou war i pou en danze ankor le fitir ki sa miray pa ganny tonbe pou okazyonn okenn danze avek okenn dimoun ki pe pas dan sa zanmerant. Mersi.

MR SPEAKER

Mersi Onorab. Minis.

MINISTER FLAVIEN JOUBERT

Mersi Mr Speaker. Mersi Onorab. Mr Speaker, premye keksoz Onorab in demann mwan en dan en fason en garanti sorti kot lazans ki sa bann pye dibwa pou ganny *maintain*, mon ava pas laparol avek ou permisyon avek Depite CEO.

Me kot i konsern bann *cracks* ek bann prezans serten

pye dibwa ki nou konnen i kapab vin en problem pou lenfrastruktir, byensir nou konnen i annan serten lespes pye dibwa zot en pe pli agresiv e parfwa zot koz problem.

E se pour sa rezon ki nou pe koz lo ranplas zot avek serten lezot ki pa apropiye ki zot pa- zot kontinyen reste la, zot servi sa fonksyon pou gard nou lanvironnman pli agreab pou nou reste ladan me zot pa andomaz bann fasilite parey miray ek *pavement*.

Alor, lo sa kote parey nou'n dir, kot nou pou tire nou pou ranplas li par bann ki pli apropiye ki pa koz problem, me mon ava Pas laparol avek lazans pou donn sa konfirmasyon lo kote *management* pye dibwa dan rezyon Roche Caiman. Mersi.

MR SPEAKER

Mersi. *CEO* ou annan laparol. *Deputy CEO* ki pou reponn, wi.

DEPUTY CEO LWMA RAHUL MANGROO

Mersi Mr Speaker. Bonzour tou Manm Onorab, bonzour bann zanfan dan Galeri e tou dimoun a lekout.

Onorab, pou donn ou sa komitman, wi lazans an mezir sa program an mezir nou devlop sa lo travay ek *SIA* pou kontinyasyon konstriksyon sa miray, nou pou osi etal sa legzersis pou vwar bann pye

bodanmyen ki pe donn sa problem. Be selman fodre note osi i bann pye dibwa anndan dan vilaz osi ki pou kapab fer lenpak lo sa miray.

Alor, nou pou fer en travay konzwentman e si fodre anmenn lezot antite dan sa diskisyon nou ava fer li, nou'n osi fer serten travay debwazman dan sa bann pye dibwa dan sa rezyon menm pandan mwan Zen, e in pran, nou'n gannnen en pti pe retar aköz i annan en prosedir prokrtn ki antase avek e parfwa sa i kre en dele letan.

Me selman an menm tan mon garanti ou ki nou annan en program an devwar nou bann- anfen nou annan en program regilye i pou revwar bann pye dibwa dan lavil ki- e sa bann pye dibwa i tonm ladan. Mersi.

MR SPEAKER

Mersi. Vitman silvouple Onorab.

HON AUDREY VIDOT

Mersi Mr Speaker. Menm laliny, letan ou pe dir bann ki balizaz ek bann lakour, aköz mon konnen espesyalman kot sa ronpwen i annan kontrakter ki netway dan sa bout semen, i annan konsern osi ki letan netwayaz i ganny fer ki evite kit bann salte otour sa pye dibwa aköz i refoul tou kot lakour sa bann dimoun.

Espesyalman sa enn ki lo bout vizavi avek ron pwen. Mersi.

MR SPEAKER

Mersi. Bon, mon asire bann zofisye i note. Mon a ganny letan pou en kestyon siplemanter. Onorab Bistoquet.

HON ANNE BISTOQUET

Mersi Mr Speaker. Bonzour Mr Speaker, tou dimoun a lekout, bann zanfan dan Galeri e bonzour *panel*.

Minis, dan ou repons, ou'n fer mansyon lo bann pye dibwa dan bann *area*, nou konnen poudir i pa zis sa bann pye bodanmyen ki koz en danze me i osi annan sa bann pye sed. Le 29 Mars letan mon ti pas ek Prezidan dan distrik, nou ti ganny bokou konplent lo sa bann pye sed. Sirtou sa ki pran la kot Onorab De Letourdie i reste, i reste kot Mr Marengo anba, apre i annan sa bann anba lo *highway*.

Nou ti ganny dirize dan en departman me apre nou ti ganny refer dan en lot departman e i annan plizyer zabitan ki vin kot mon ki mon'n refer zot direk ek da osi e mon okouran ki i annan vizit Lanvironnman ek *Forestry Department* in fini ganny fer, rapor in fini ganny anvoy kot LWMA, sa semenn zot pe al fer

vizit pou gete si pou koupe oubyen si pou taye.

Eski la pandan – nou'n vwar detrwa semenn pase ki i annan pye sed ki'n tonbe.

MR SPEAKER

Wi, prosede ek ou kestyon Onorab.

HON ANNE BISTOQUET

Eski la ki nou dan letan vann swet zot kapab pran li konman priyorite pou zot travay lo sa bann pye dibwa?

Akoz i annan ki'n deza tonbe in kraz lakwizin dimoun, i annan ki'n andomaz transpor, eski zot kapab pran sa koman en proze priyorite, koup sa bann koup sa bann pye sed silvouple? Mersi.

MR SPEAKER

Mersi. *Panel*, pye sed?

MINISTER FLAVIEN JOUBERT

Mersi Mr Speaker. Mersi Onorab. Wi Mr Speaker, i bann priyorite aköz nou konnen poudir pye sed zot rasin i ase lo sirfas e avek gro divan zot kapab savire.

Mon pou pas laparol vitman avek CEO LWMA pou donn en *update* lo kote i ete avek sa lalis ki in deza ganny prepare pou kontrol en pe sa bann pye dibwa lo sa rezyon *highway* ek Roche Caiman. Mersi.

MR SPEAKER

Mersi. *CEO*.

CEO LWMA SHANE EMILIE

Mr Speaker, bonzour. Tou bann Onorab, bonzour. Tou bann lezot dimoun ki pe swiv la bomaten, bonzour.

In fact, mon anvi dir ki mon ti resevwar en *email* sorti kot *DA Roche Caiman* lo sa ka spesifik, e mon ti rekomande ki *LWMA* i bezwen al fer en vizit lo sit konzwentman avek Departman Lanvironnman pou fer sir ki- pou nou analiz avan si vre sa bann pye dibwa i annan en risk.

So, mon ankor pe esper sa rapor, e ler rapor i vin lo latab pou bezwen regarde anba ki fon ki ou pou al kouver, si an ka i annan en rekomandasyon avek bann teknisyen pou nou *either* koupe ouswa tay li en pe.

Pou tou bann lezot pye dibwa ki ganny trouve lo later Gouvernman o bor semen, ou konnen *LWMA* i annan en zistans ki i fer son travay lo semen piblik, an deor semen piblik pou al en pe anndan- an deor, *sorry*.

So, nou'n fer en travay konzwent e vi ki 2024 ti pran en desizyon pou *LWMA* al en pe pli o ki 3 met baze lo son *scope*, lanmenm ler ki prezan nou'n fini fer en analiz, nou'n fini ganny *approval* avek

National Tender Board, nou'n fini *submit* pou ganny Bidze siplemanter.

Savedir ler i vin devan Lasanble pou delibere ki *at least* nou kapab ganny sa finansman pou nou kapab koup bann pye dibwa ki par lao 3 met o bor semen, sirtou lo *highway* dan bann distrik, pou fer sir ki si an ka i en danze dan zalantour *then* pou nou kapab debwaz li.

Parey Minis in fer resorti, e mon pou agree avek sa pou plizyer deseni i annan en lenportans ki'n ganny mete lo pye dibwa, son lenportans ki i annan anver lavi, pou siport lavi e menm pandan sa letan kot nou war ki sanzman klima letan pe vin pli so.

So, nou bezwen fer sir ki nou fer en desizyon ki kalkile pou nou pa kre serten risk apre pli tar pandan lannen. *Ok? So once* ki Minister Finans in kapab pran en desizyon *then* nou ganny sa larzan siplemanter, petet *by the end of the year* nou a kapab get en pe sa bann pye dibwa ki nou'n fini *earmarked* koman bann pye dibwa ki en azard o bor semen. Mersi Mr Speaker.

MR SPEAKER

Mersi. Mon konnen nou'n depas ler poz, me selman i reste en kestyon pou sa *panel*, alor nou a fini koumsa nou a kapab dismis zot. Nou ava al

lo kestryon 155, Onorab Egbert Aglae.

HON EGBERT AGLAE

Mersi Mr Speaker. Mon a dir bonzour Minis, *CEO* ek ou Depite. Kestyon i *comme* swivan: -

Eski Minis i kapab dir ek sa Lasanble ki bann sanzman zot anvizaze fer dan prosen *tender* kontra netwayaz semen, lanmar e lans? Mersi.

MR SPEAKER

Mersi. Minis?

MINISTER FLAVIEN JOUBERT

Mersi Mr Speaker. Mersi Onorab pou ou kestryon. Onorab, larepons pou sa kestryon ti ganny reponn dan Lasanble depi 2024, e osi Vandredi le 30 Me pandan *Public Hearing* lo kote lasirans dan Lasanble.

Me, mon a repas en pe lo bann pwen konsernen sa kestryon. Ant mwan Zen ek Out 2024 *LWMA* ansanm ek plizyer Antite Gouvernman tel koman *SRC, Central Procurement Unit* dan Departman Finans, Departman Lanplwa ensi ki *Seychelles Pension Fund*, ti organiz en seri kozri pou sa nouvo *tender*.

Bi, prensipal aköz risk e pou donn ase lenformasyon kontrakter ki ava ed zot byen konpran bann sanzman dan

Kontra, diferan depans ki devret ganny konsidere ler zot pe anpli dokiman *tender*, e zot lobligasyon peyman ler zot dan en kontra ek Gouvernman. Kozri ti ganny fer kot *ICCS* avek 699 kontrakter ki'n ganny *shortlisted* e ki ti ganny envite.

Swivan sa, lazans ti organiz plizyer rankont avek bann Onorab ek Administrater Distrik lo baz rezyonnal ant Septanm ek Desanm 2024. Laplipar Onorab ek *DA* ti prezan.

Pandan sa sesyon tou bann sanzman dan Kontra *roadmap* pou *tender* ek detay lo proses *tender* ti ganny, ti menm- sanzman lo proses *tender* li menm, ensi ki lekspektasyon lazans atraver en prezantasyon ti ganny prezante avek tou dimoun ki ti la prezan.

Sa lenformasyon ti baze lo desizyon ki *Cabinet* ti aprouve le 7 Fevriye 2024. Mon oule fer resorti ki laplipar Onorab ek *DA* prezan dan sa bann sesyon ti felisit lazans pou bann sanzman e ti reasir lazans ki zot pou donn zot sipor anver son lenplimantasyon.

An plis ki sa, lenformasyon ti ganny divize lo televizyon, radyo, nasyon, sit web ek par medya sosyal. *LWMA* osi byen ki lo *WhatsApp*. Mr Speaker, avek

ou permisyon mon a prezant bann sanzman dan *tender* aktyel pou netwayaz ek lanbelisman e sa i *comme* swivan :-

Mon pou en pe bref, i annan 12 me mon pa pou al dan tou detay mon ava pas briyevman lo sak sa bann sanzman. Premye se la kantite kontra ki pou redwir sorti 414 pou vin 243 e sa pou pran lefe dan premye kar 2026.

Dezyenm se, lazans in fer serten sanzman dan spesifikasyon netwayaz.

Trwazyenm se tou bann sit kot ti fer *one-off after care* oubyen bann ki'n fe devlope in ganny enkli dan nouvo Kontra.

Katriyenm se siperfisi netwayaz pou ogmante i pou vin ase sibstansyel ki fer ki pou annan sifizaman travay pou tou bann dimoun i ozordi i enplike dan Kontra.

Senkyenm i konsern peyman Trezyenm Mwan e osi bann lezot benefis ki travayer *long term* i sipoze gannye avek zot anplwayer.

Sizyenm se bann lobligasyon enpoze par Departman Lanplwa pou mentenir en *payroll* lagreman lanplwa ant kontrakter ek son travayer anliny avek sa demars pou profesyonnalizm servis netwayaz ek lanbelisman.

Setyenm se kontrakter pe ganny demande pou annan bann resours apropiye.

Wityenm se kontrakter pe ganny oblize pou egzers en bon nivo *safety- health and safety* letan zot pe egzekut Kontra avek lazans. E i osi annan penalti pou bann ki pa pe *comply* avek sa demann pou zot enplimant en sistenm *health and safety* e osi kontrakter-

Nevyenm se kontrakter i lib pou partisip dan nenport ki proze semen peron, *bus shelter, litter bin*, kabinen piblik, lans larivyer ek lanmar pou ogmant zot sans ganny okenn- zot sans gannye. Akoz parfwa letan zot tonm dan en sel kategori zot mank sans ganny en Kontra.

E netwayaz *bin site* pe ganny transfer avek en lot group kontrakter, sa i dizyenm pwen.

Onzyenm pwen se kontrakter pou menm ganny formasyon lo lafason ki zot zer zot biznes ek bann zesyon finansyel pou kapab fer en pli bon *management* finansyel zot loperasyon.

E douzyenm se ki lazans in etabli bann kriter pou aksepte *bid* e lo lafason ki zot selekte bann pri, akoz dan lepase nou'n war ki i annan bokou bann ka kot bann *bid* ki tro ba in ganny aksepte. E la lazans in travay avek en

konsiltan pou annan bann *internal cost estimate* e ki aprezan zot a kapab pli byen evalye bann *bid* ki ganny soumet pou sa bann *tender*.

Tou le 12 sanzman ki mon'n mansyonnen Mr Speaker, in ganny prezante dan en *Position Papers*, lo en papye e sa papye i *available* lo *website LWMA*. Mersi.

MR SPEAKER

Mersi Minis. Ou siplemanter Onorab Aglae.

HON EGBERT AGLAE

Minis, mersi pou ou larepons, menm si i en pe bref. Minis, ou'n site ki Kontra ki sorti 414 pou vin 243 *ok*. Sa 243 si mon pa mal *ok*, sa i fer ki i annan omwen 171 sou-kontrakter ki pou al perdi travay la. *Ok?*

Mon ti a kontan petet demann ou ki bann rezon prensipal, ki zot pe tonm lo sa desizyon pou *award* sa kantite Kontra, dan plas parey i ti ete ki fer osi ki bann grander travay ki annan pou byensir agrandi - pou vin pli gran, petet ki rezon prensipal ki zot in tonm lo sa desizyon?

E dezyenmman Minis, eski i korek, ou a eksplik mwan si i korek ouswa non, ki zot pe met osi bann *ceiling* lo bann *bid*, ki ou napa drwa sot pli o ouswa *go* pli ba sa bann *bid*, eski sa i korek? Mersi.

MR SPEAKER

Mersi. Minis?

MINISTER JOUBERT

FLAVIEN

Mersi Mr Speaker. Mersi Onorab pou sa 2 pwen. Mr Speaker, mon pou osi envit *CEO LWMA* pou reponn sa kestyon.

Me Onorab, i enportan pou konpran ki menm si Kontra pe sorti 414 pou vin 243, la kantite travay pa pe sanze li, i annan en ta travay ki bezwen ganny fer e nou pa pe redwir kantite travay ki bezwen fer lo lans, semen eksetera.

Alor i pou annan travay pou dimoun fer, me pa tou dimoun, i pou en kontrakter. Akoz ozordi difikilte ki ou war, se ki i annan bokou dimoun ki sipoze en kontrakter, me letan ou get son Kontra i pe zis ganny en saler avek *LWMA*, setou, e i pa kapab siport lezot keksoz otour sa ki i apel en biznes.

Alor i pa en biznes, i en dimoun salarye ki pe travay avek *LWMA* i pa kapab fonksyonnen, i pa kapab investir, i pa kapab annan en transpor pou li fer son bann travay ouswa sirkile parey pli boner nou ti pe koz lo tir fey bodanmyen anba pye dibwa. Si en dimoun tousel ki pe ganny zis en saler tousel avek lazans i pou napa en transpor

pou li kapab al tir sa bann salte pou al zete.

Alor, i enportan ki nou pa ankouraz dimoun pou zot form en aktyel biznes ki fonksyonnen parey en biznes. Ou annan anplwaye, ou annan fasilite, ou annan lekipman e ou kapab vreman delivre lo sa nivo ki ekspekte avek ou.

Mon ava envit *CEO* pou koz lo la e osi pou reponn lo sa size *ceiling* lo *bid*. Mersi.

MR SPEAKER

Mersi. *CEO*.

CEO LWMA SHANE EMILIE

Mr Speaker mersi. Onorab mersi pou o kestyon. Zis pou mwan tous en pe lo sa premye kestyon Onorab se ki i menm bann konplent lazans in resevwar pou plizyer lannen an term performans kontrakter, i annan pou fer osi avek dan lepase sakenn in ganny en pti bout pou li netwaye.

E ler in ganny sa pti bout par ler i annan bann kalite zwe ki arive la deor lo *site*, kot parey non vwar me i annan bann akt malisye ki'n enpakte *site* en lot kontrakter ou konpran?

So, ler nou pe regarde nou'n dir be pou nou fer sir ki nou fer en travay pli profesyonnel, pli elarzi pli striktire, pli stratezik, annou

fer sir ki bann *site* ki parey kot nou war kot larivyer *or* lanmar i baliz avek en lans ki mannyer nou kapab met li ansanm, ki *at the end of the day* Gouvernman osi i bezwen mazine ki mannyer i kapab pli byen depans larzan *tax*, ou ganny mwan?

Fer sir ki bann resours i ganny servi byen? So, baze lo sa bann konplent e ler mwan mon pran pozisyon an Out 2023 nou'n fer analiz, nou'n kalkile nou bezwen balans *everything*, fer sir ki tou keksoz i annord.

E parey Minister in fer resorti e *eventually* menm sa bann kontrakter ki petet pa pe ganny Kontra apre sa *tender*, i ava vin en loportinite pou li ganny anplwaye par enn sa-anplove par enn sa bann kontrakter. Ou konpran? So louvraz i pou la, me i depan lo sa bann kontrakter la deor osi pou kapab fer konnen ki zot pe rod travayer. Sa premye.

Dezyenm, parey mon ti fer resorti osi tou nou ti fer en kriter, en kriter ki nou, nou'n met ater konpare avek tou bann lezot antite, parey Minister Ledikasyon, mon konnen avek Minister Lasante pe *wrap up* avek zot *national tender* la, ki nou'n dir poudir i annan sa *internal cost estimate*, i annan en poursantaz ki ou ale par lao, i

annan en poursantaz ki ou ale par anba.

So, nou'n fini fer kalkilasyon sa konsiltan in fini *factor in* tousala, nou'n fini prezant avek Minister Finans.

So, la i annan zis pou nou fer sir ki ler Komite Evalyasyon ki endepandan avek LWMA i fer son evalyasyon lo sa kriter avek sa *cost estimate*, ki i fer sir ki i pran *the bet bid* ki pros o bor *cost estimate either* par anba ouswa en pti gin par lao. Ok Onorab? Mersi bokou Mr Speaker.

MR SPEAKER

Mersi. Mon pa pou kapab pran siplemanter lezot Manm lo la. Nou pou pran poz la. Mon pou remersye bann zofisye pou zot partisipasyon, nou a rebran 11er 20. Mersi.

(BREAK)

MR SPEAKER

Mon a dir bonzour e byenveni nou nouvo *panel*. Mr Tony Imaduwa Sekreter Prensipal pou *Climate Change* e Ms Annie Simeon *Project Coordinator* dan son departman.

Nou a kontinyen avek kestryon. Nou'n ariv lo 156, Onorab François Adelaide.

HON FRANCOIS ADELAIDE

Mersi Mr Speaker. Bonzour Minis, avek ou delegasyon ankor enn fwa. Bonzour tou bann MNA ki pe- ki a lekout, ki isi dan Lasanble Nasyonal e tou dimoun a lekout. Mon kestryon pou Minis i al koumsa: -

Eski Minis i kapab donn detay sa Lasanble lo bann demars ki pe ganny fer pour kontrol linondasyon dan plato Anse a La Mouche Baie Lazare? Mersi.

MR SPEAKER

Mersi. Minis?

MINISTER JOUBERT

FLAVIEN

Mersi Mr Speaker. Mersi Onorab. Mr Speaker, sa pou en kontinyasyon *update* ki nou'n deza donner dan en repons oparavan avek Onorab kot i konsern sityasyon Anse a La Mouche.

An bref, pli boner sa lannen letan nou ti donn en *update* nou ti mansyonnen ki proze drenaz lo proze Anse a La Mouche ki ti ganny enplimante e konplete par Departman Transpor lo Later ti fini an 2022, ti osi annan en nouvo pon ki ti ganny konstrir par Lazans Lenfrastriktir dan plato - Santa Maria e sa ti ganny fer an 2023.

E ansuit en nouvo pon dan rezyon *Blue Lagoon* ki ti pe ganny fer e ki ti ganny

konplete an Out 2024. Sa i bann proze ki nou'n donn en *update* lo la dan lepace ki'n fini ganny fer aprezan.

Dernyen keksoz ki reste pou nou fer ,ki nou ti mansyonnen dan nou bann lenformasyon nou ti donn Lasanble se ki nou ti pou fer *desilting* ouswa pou fouy lanmar dan sa lanmar ki pas deryer *Blue Lagoon* e sa ti pou ganny fer apre ki en *survey* tipografi i fini konplete.

Mon kontan pou konfirman ek Onorab e osi avek Lasanble ki sa letid in aprezan ganny konplete e i pe ganny servi pou defini lafason ki *desilting* pou ganny fer dan sa lanmar. Enn fwa ki sa i konplete nou pou al- nou pou bouz ver *tendering* e nou espekte ki nou a kapab fini sa travay avan gro lapli an Desanm.

E sa Onorab, i preski bann dernyen travay ki nou ti'n deza komet pou fer dan rezyon Anse a La Mouche pou nou kapab met anba kontrol sa sityasyon inondasyon ki arive parfwa letan ou annan gro lapli. Mersi.

MR SPEAKER

Mersi Minis. Siplemanter Onorab.

HON FRANCOIS ADELAIDE

Mersi Minis. Mersi pou larepons. Minis, mon konpran

ki zot stratezi, me solman i annan 2 pti keksoz ki mon anvi met a zot latansyon pou kapab kontinyen ranforsi pour ki keksoz pa vin pli grav.

Nou vwar poudir sa lanmar, sirtou Anse a La Mouche la, i annan bokou *overgrown vegetation* kot par ler li osi i tant pou ferm sa lespas ki sa lanmar i ganny pran. Apre nou annan bokou parey mon ti dir, nou annan enn de bann konstriksyon ilegal ki pe ganny fer.

E mon war pli-z-anpli i kontinyen e pa vwar poudir i annan lentervansyon pour ki sa bann *practice* koumsa i arete. E sa i pou ede definitivman fer ki ler delo pou desann pou vini delo pou kontinyen monte dan sa rezyon.

Eski nou annan en program kot nou pe ale pou al verifie e menm pou *enforce* bann Lalwa ki annan kont konblaz lanmar ilegal e sa i a fer ki petet i ava ede en pe lo sa problem inondasyon dan Anse a La Mouche? Mersi.

MR SPEAKER

Mersi. Minis, ou adrese.

MINISTER FLAVIEN JOUBERT

Mersi Mr Speaker. Mersi Onorab pou sa 2 pwen.

Mr Speaker, sa premye pwen kot i konsern *overgrown*

vegetation dan lanmar. Parey nou'n dir travay *desilting* pou ganny fer byento e normalman letan travay *desilting* i ganny fer i annan en konponan ki annan pou fer avek kontrol vezetasyon ki potansyelman pe blok lanmar e sa i ava ganny fer konzwentman dan sa proze.

Kot i konsern restriksyon ilegal. Mon dakor avek ou ki i annan parfwa bann dimoun ki dousman, dousman zot antre dan lespas ki ganny okipe par lanmar e sa i kre en problemm restriksyon lespas e ki avek letan nou ganny problemm linondasyon.

Avek permisyon Mr Speaker, mon a envit PS Imaduwa pou eksplik en pe ki bann *case* i zot in war e ki bann aksyon ki zot pe anvizaze lo sa kote. Mersi.

MR SPEAKER

Mersi. PS, ou annan laparol.

PS CLIMATE CHANGE TONY IMADUWA

Mersi Minis. Zis pou konfirman i annan serten lensidan nou'n arive e sa nou pe diskite ansanm avek Departman EAPS kot lanvironnman ki travay konzwentman avek *Planning* pou nou regard en pe dan sa bann *cases* kot i annan bann aktivite ki pa *comply to the*

requirement lo kote fer restriksyon lenfrastruktir o bor lanmar.

MR SPEAKER

Mersi PS. Bon, prosen kestyon 157 Onorab Kelly Samynadin.

HON KELLY SAMYNADIN

Mersi Mr Speaker. Bonzour Minister, PS, *panel* an zeneral e tou dimoun a lekout. Kestyon 157 i lir *comme* swivan: -

Eski Minis i kapab eksplik Lasanble detay lo proze reabilitasyon kotyer dan distrik Au Cap, prenan kont sa alokasyon R2.7milyon ki'n ganny vote pour sa tel proze? Mersi.

MR SPEAKER

Mersi. Minis?

MINISTER FLAVIEN JOUBERT

Mersi Mr Speaker. Mersi Onorab pou ou kestyon.

Mr Speaker, Minister in angaze pou travay ansanm avek Lazans Lenfrastruktir, Lazans Transpor lo Later ek Minister Gouvernman Lokal pou rod solisyon- pardon pa Minister Gouvernman Lokal, Minister Transpor, pou rod solisyon pou Au Cap pou ede redwir bann lefe sanzman klima parey lerozyon lakot ki pe afekte pa zis nou lakot, me osi bann propriyete ki ganny

trouve o bor lakot e bann lenfrastriktir semen.

Swivan plizyer antretyen avek bann zofisye teknik dan sa 4 Antite, nou'n idantifye bann landrwa priyorite e vilnerab. Sa proze an zeneral i pou anpes delo sale mont lo semen, redwir lefe lerozyon lo lakot e fer restorasyon semen ek lakot.

Bann konponan travay ki pou ganny- ki pou relye direkteman avek lakot pou ganny enplimante par Departman Sanzman Klima atraver Lazans Lenfrastriktir. E bann konponan ki pou relye avek semen piblik pou ganny enplimante par Lazans Transpor lo Later e osi Departman Transpor.

Aksyon prensipal pou konpri konstriksyon en miray apepre 320 met longer lo sa seksyon *opposite* Lobster Bay avek en *bullnose* devan pou ede deflekte laroul e anpese ki i mont lo semen. Sa proze pou osi enkli konstriksyon 2 *groyne* ki pou kapab ede retenir disab lo sa bann lans dan sa rezyon.

I pou osi annan en konponan reparasyon sa lanbousir ki ede retir delo antye deryer kot Takamaka Bay. I annan restorasyon semen ek miray ki'n ganny andomaze dan rezyon kot *DA office* ki pou ganny enplimante par Lazans Transpor lo Later.

E finalman, kot langar pirog pou annan louvraz restorasyon lo sa miray e lo sa lakot.

Sa bann proze pe espekte komanse dan trwazyenm kar lannen 2025. Mon oule osi fer resorti ki premye fa sa letid kolekte *data* dan rezyon Au Cap par lenstalasyon lekipman *Aquadopp* pou konpran dinamik mouvman laroul ek disab e in fini konplete. Rezilta sa letid pe ede determin kalite ek oter bann lentervansyon e osi konfirm sa bann proze ki mon'n mansyonnen.

An plis ki sa, i osi annan propozisyon pou ogmant larzer sa morso semen Pointe Au Sel kot laroul i tanzantan mont lo semen, sa propozisyon li i pa ankor ganny finalize ek Minister pour ki distrik enformen an mezir ki nou fer progre.

Au Cap nou konnen ki i osi annan problem linondasyon ki i afekte bann propriyete ek tousala pe ganny pran kont dan bann lentervansyon. Pou annan plizyer provizyon pou drenaz ek louvertir bann lanbousir ki pou ganny enkli dan bann proze letan semen i ganny modifye ki pou ede pou retir delo dan bann moman gro lapli. Mersi Mr Speaker.

MR SPEAKER

Mersi Minis. Siplemanter Onorab.

HON KELLY SAMYNADIN

Mersi Mr Speaker. Minis, ou'n dir ki sa proze i ekspekte konmanse ver trwazyenm kar lannen 2025. Petet, kan ki zot in prozekte ki sa proze pou konplete?

E dezyenmman, nou konnen ki prosedir *wayleave* in deza konmanse. Sirtou pour rezyon *Lobster Bay* la dan zanmerant Pointe Au Sel.

Me selman mon ti ava kontan konnen – e ou'n osi dir ki i annan sa *Environmental Impact Assessment* ki zot in fer. Eski zot pe mazin zwenn avek zabitan pou prezant zot lo sa proze li menm, e petet son bann lenplikasyon osi ki pou annan, so ki pou kapab en pe - rezoud en pe bann konsern ki zabitan i kapab annan lo la? Mersi.

MR SPEAKER

Mersi. Minis, repons?

MINISTER FLAVIEN JOUBERT

Yes. Mersi Mr Speaker. Onorab in demann mwan 3 pwen. Premye se kan proze i ekspekte konplete?

Sa proze parey mon'n ekplike, i annan plizyer faz. I pou annan plizyer konponan. E mon pa pou kapab donn en dat egzakt kan i pou konplete.

Mon kapab dir ou kan nou pe anvizaze komanse.

Akoz i annan bann proze-apre i annan diferan lazans ki fer diferan morso. I pou annan bann bout ki Lanvironnman ansanm ek *SIA* pou fer.

Me i osi annan bann bout ki pou ganny entegre dan bann proze ki annan pou fer avek lenfrastruktir semen. E sa osi i bezwen tonm anliny avek Program *SLTA*.

Alor i posib ki nou pou vwar serten faz pe ganny fer a serten moman. Me selman nou annan en plan konplet ki kouver sa *zone* antye.

Kot i konsern *wayleave*. *Wayleave* i annan bann diskisyon ki nou bann teknisyen normalman zot fer letan zot annan sa bann travay pou enplimante. Parey bann dimoun semen. Sirtou zot vreman eksperyanse lo la.

E nou konnen poudir i annan en pe travay ki'n deza komans fer. E nou ava kapab les ou konnen koman distrik, okenn detay kot nou bezwen annan en korporasyon ouswa en serten kolaborasyon pour nou ganny bann *wayleave* pou fer sir keksoz i mars byen e i pa blok proze dan okenn fason.

Kot i konsern zabitan, nou annan en skebatik, en plan ki'n pare. E nou bann zofisye - *PS* avek zofisye ki akote mwan, i pare a okenn

moman pou prezant avek zabitan detay sa proze e eksplik zot egzakteman kwa ki pou ganny fer.

Mon konnen i pou annan serten ki annan serten konsern. Sirtou avek bann fasilite ki zot ekspekte annan o bor kot zot.

Par egzanp, bann ki pou rezourd problemn inondasyon. Zot a kapab ganny lenformasyon lo la. E menm petet kontribye avek bann lenformasyon ki zot, zot konnen dan bann landrwa, bann sityasyon ki zot kapab eksplik bann zofisye pou pran kont.

Me, zis pou reasir ou Onorab ki bann zofisye ki'n travay lo sa proze, zot in anmas tou bann lenformasyon resan lo bann sityasyon dan rezyon Au Cap.

Linondasyon, laroul mont lo semen, blokaz, drenaz, bann louvertir lanmar, eksetera. E zot in sey fer en fason pour zot *capture* tousala dan sa nouvo proze ki pe ganny propoze ozordi. Mersi.

MR SPEAKER

Mersi Minis. Mon a pran kestyon Onorab Esparon.

HON REGINA ESPARON

Mersi Mr Speaker. Mr Speaker, mon ti anvii demann avek Minis, en pe parey sa proze Au Cap ki dan Bidze sa

lannen, si i annan lezot distrik ki annan sa larzan dan Bidze sa lannen, ki son proze pou demare dan trwazyenm kar sa lannen? Mon pe mazin lo kote North East Point. Mersi Mr Speaker.

MR SPEAKER

Mersi. Minis? *Panel?* Vitman silvouple.

MINISTER FLAVIEN JOUBERT

Mersi Mr Speaker. Mon ava pas laparol avek PS ek son lekip.

MR SPEAKER

Tre byen. PS?

PS CLIMATE CHANGE TONY IMADUWA

Mersi Minis. Mersi Onorab pour ou kestyon. Wi, nou annan bann lezot proze dan bann lezot distrik ki pou demare sa lannen menm *itself*.

Me parey pour Nort East Point parey ou konnen, i annan sa miray ki nou - fer lo kote lanmer pou anpes disab mont lo semen. Sa i lo kote *Planning*, diskisyon. Nou'n fini fer *design* avek SLTA.

Aprè i annan osi sa *proposal* pour sa drenaz dan - pou debous sa lanmar deryer. So sa i bann proze ki nou annan.

E parey nou'n fer Au Cap, lafason ki nou pe sey

sanz en pe nou lapros se anmenn tou sa bann diferan proze pti, pti ansanm. *Combine* li avek bann lezot finansman ki nou war i tonm anba parey *SLTA, SIA, Local Government* pou *try and* – ki mannyer ou kapab dir sa?

Enplimant sa bann proze *ordistically*. Konmsi ansanm. E i ede pour nou *make* pli bon *use of* sa bann resours ki ganny met dan nou dispozisyon. So *yes*, i annan pour North East Point osi.

MR SPEAKER

Mersi *PS*. Mon a pran en kestyon sa kote. Onorab Larsen?

HON CECILE LARSEN

Mersi Mr Speaker. Minis, ler ou pe koz lo proze, mon pe tyeke si sa *pavement* kot lanbousir Pointe Au Sel, spesifikman anba zanmalak, si pa kapab antre ladan silvouple?

Akoz *Lobster Bay* pa tonm Pointe Au Sel. I tonm La Plaine St Andre. Mersi Mr Speaker.

MR SPEAKER

Minis, ou annan en repons?

MINISTER FLAVIEN JOUBERT

Mersi Mr Speaker. Mersi Onorab. Mr Speaker, mon pa pou kapab donn en

commitment lo *pavement* anba zanmalak.

Me selman, nou le reasir Onorab ki nou Minister i an kontak regilye avek Departman Transpor. Ek Minis Transpor li menm, kot nou zwenn pour nou diskite sa bann proze lakot, sirtou ki annan pou fer avek semen ek proteksyon lenfrastruktir lo lakot.

Alor i enn bann keksoz ki nou ava al met devan zot, e apre zot ava kapab determinen ki mannyer zot pou met sa dan zot bann proze kontinyel pou amelyor fasilite semen ek *pavement* dan pei. Mersi.

MR SPEAKER

Mersi. Mon ava avans lo 158, Onorab Georges Romain.

HON GEORGES ROMAIN

Mersi Mr Speaker. Minis, bonzour avek ou delegasyon. Mon kestyon;

Eski Minis i kapab donn detay lo progre ki son Minister in fer pou lenstalasyon en laponp delo, anler Danm La Gogue, pou kapab asiste fermye avek delo pour zot laferm? Mersi Mr Speaker.

MR SPEAKER

Mersi. Minis?

MINISTER FLAVIEN JOUBERT

Mersi Mr Speaker. Mersi Onorab. Mr Speaker, mon pou reponn sa kestyon. Be selman zis pou notifie ki sa i en kestyon ki konserne lekipe Lagrikiltir-

MR SPEAKER

Eskiz mwan.

MINISTER FLAVIEN JOUBERT

E zot pa ankor antre dan lasal.

MR SPEAKER

Hold on-hold on. Minis, i mwan lafot. Eskiz mwan. Mon bezwen dir orevwar sa delegasyon ki la pou kapab apel lot delegasyon. Minis, nou ava atann en pti moman silvouple. Mersi e bon depar.

Bon, bonzour e byenveni nou dernyen delegasyon ki pou antre ozordi. Bonzour Mr. Keven Nancy, Sekreter Prensipal pour Lagrikiltir. Ms. Linetta Joubert, *Chief Officer* dan sa Departman, e Mr Rodney Philo, *Chief Animal Officer*.

Onorab Romain, mon a demann ou repet ou kestyon pou fer li ofisyel.

HON GEORGES ROMAIN

Mersi Mr Speaker. Byenveni nouvo delegasyon.

Eski Minis i kapab donn detay lo progre ki son Minister in fer pou lenstalasyon en laponp delo, anler Danm La

Gogue, pou kapab asiste fermye avek delo pour zot laferm? Mersi Mr Speaker.

MR SPEAKER

Mersi Onorab. Minis, nou annord prezan.

MINISTER FLAVIEN JOUBERT

Mersi Mr Speaker. Mersi Onorab pour kestyon.

Mr Speaker, orizinalman sa proze ti konpri konstriksyon en baraz, en *gabion* avek lenstalasyon en laponp *submersible*. E sa i ti pou *capture overflow* sorti Danm La Gogue, byensir avek permisyon *PUC*.

Bi sa proze sete pou annan en – plis delo pou siplemant delo dan baraz egzistan ki ti deservi bann fermye, pou asiste bann fermye, sirtou pandan letan sek dan sa rezyon.

Sa proze ti ganny inisye boner lannen pase. Departman konzwentman avek Lazans Lenfrastriktir e *PUC* ti fer *site visit* pou diskite lo detay sa proze an Avril 2024.

Swivan sa *visit*, bann zofisye Lazans Lenfrastriktir ti komans travay lo plan pour sa proze. Antretan lo son kote, departman ti komans inisye prosedir pou fer vini sa laponp ek bann pyes nesaser. E rekomande par *PUC*. E mon

kapab asir Lasanble ki tou sa bann lekipman in fini antre dan pei.

Resaman, nou'n fer en diskisyon avek *PUC* e nou'n vwar ki nou kapab senplifye sa proze an retiran sa baraz e an metan en senp laranzman laponp ek laliny tiyo sorti kot Danm La Gogue. Par anba Danm La Gogue li menm.

Avek sa bann sanzman, departman i ekspekte ki nou kapab al pli vit e nou kapab konplet sa proze avan lafen sa lannen.

Parey mon'n eksplike, i annan serten konponan ki nou pou retire ki pou retir serten kou. E osi senplifye sa proze. E *PUC* in dakor avek nou ki nou kapab enstal sa laponp *submersible* zis par anba Danm La Gogue kot bann delo pe sorti dan danm. Mersi.

MR SPEAKER

Onorab Romain, siplemanter?

HON GEORGES ROMAIN

Mersi Mr Speaker. Minis, mersi pour ou larepons. Mon vreman kontan ki tou sa bann lekipman ki pou enstale in fini arive dan pei.

Me parey ou konnen Minis, nou dan en letan ase sek e enn de fermye pe poz zot konsern. Ou'n dir ki sa proze pou posibleman terminen – i

konmanse. I terminen avan sa lannen i fini.

Minis, si ou ti kapab vreman en pti pe pli spesifikman, kan vreman nou kapab vwar sa proze konmans demare? Kekfwa son dirasyon mon pa konnen.

Me selman kan i kapab konmans demare, pou *at least* bann fermye kapab ganny en pti pe rekour? Mersi, Mr Speaker.

MR SPEAKER

Mersi. Minis?

MINISTER

FLAVIEN

JOUBERT

Mersi Mr Speaker. Mersi Onorab pour ou Kestyon Siplemanter.

Mr Speaker, letan mon'n diskrit avek *PUC* sa proze, i pa paret mwan i en proze ki tro konplike. Nou'n deza angaz nou avek *CEO PUC* ek *PS* e nou'n fer diskisyon lo lafason ki nou pou fer sa proze ganny enplimante. I pa en proze ki pou pran bokou letan pou enstale.

E nou'n deza annan bann teknisyen ki pe prepar bann detay sa bann lekipman e zot *alignment* kot zot pou pase pou zot ariv dan sa baraz.

Alor, i en keksoz ki nou pou kapab fer li vitman. E mwan mon ti a swete ki petet menm avan finisyon sa kar

lannen - petet avan Septanm, nou merit kapab fini fer li.

Sirtou, parey ou'n fer remarke, nou dan en peryod sek. E nou ekspekte ki peryod sek i pou ale ziska petet Oktob, Novanm. Menm Desanm. E ti a bon si nou kapab konplet li vitman pour nou kapab anmenn en pe plis delo dan baraz pour bann ferme.

Alor nou a fer nou mye, ansanm ek *PUC*, pour nou demar sa proze vitman. E parey mon'n dir, i pa en proze tro konplike, la ki nou'n senplifye son fason ki i pou ganny fer. Mersi.

MR SPEAKER

Mersi Minis. Prosen keston 159, Onorab Louise Tamboo.

HON LOUISETTE TAMBOO

Mersi Mr Speaker. Bonzour Minis avek ou panel.

Eski Minis i kapab dir avek sa Lasanble si Gouvernman pe konsider donn sibvansyon ouswa *incentives* bann ferme ki fer elevaz poul lavyann lokal e poul ponn afen ki zot kapab redwir pri poul e dizef i reste stab pour bann konsonmater? Mersi Mr Speaker.

MR SPEAKER

Mersi Onorab. Minis?

MINISTER JOUBERT

FLAVIEN

Mersi Mr Speaker. Mersi Onorab, pour ou keston.

Mr Speaker, i annan en seri mezir ki deza an plas pou siport bann ferme ki pe fer levaz poul, lavyann e osi poul ponn.

Sa i enkli konsesyon lo sak pti poul. Savedir en pri *day old chicks* i reste lo R12.50 pour poul lavyann. E R19.50 poul ponn.

E sa ki menm si pri i monte, Gouvernman i *still* kontribye sa sonm avek bann ferme letan zot pe aste pti poul kot *Hatchery* ouswa zot pe fer vini pti poul.

I annan konsesyon lo Servis Veteriner ek latizann. E osi Servis Laboratwar ki gratwit.

I annan sibvansyon lo zannimo ki ganny touye kot laboratwar. Sa i apel *slaughter fees*. Gouvernman i pey R4 pour sak *kilo* poul lavyann.

E osi i annan konsesyon lo lavyann sorti laboratwar. E Gouvernman i donn en sibvansyon kot ferme i resewar R2.30 pour sak *kilo* lavyann poul ki sorti laboratwar. Savedir, antre ou ganny R4 par *kilo*. Sorti, ou ganny R2.30 par *kilo*.

Sibvansyon lo transportasyon manze zannimo pour bann zil parey

Praslin avek La Digue. E sa i R25 par bal.

Fermye i osi benefisyé avek konsesyon lo *tax* ek lenportasyon lekipman agrikol. I annan *vat refund* pour bann prodwi ki fermye i aste lokalman ki plis ki mil rounpi. E i osi annan akse avek finansman a en to lentere ba avek Labank Devlopman Sesel.

Aktyelman Mr Speaker, napa sibvansyon lo manze zannimo. Me i enportan pou fer resorti ki pandan letan kot manze zannimo ti pe ganny sibvansyonnen, pa ti annan okenn rediksyon notab dan pri manze lo marse.

Se zis apre ki Gouvernman ti entervenir direktman atraver *STC* an Septanm 2023 pou vann manze zannimo - pou enport ek vann manze zannimo a en pri konpetitiv, ki lezot fournisir ti redwir zot pri. E sa ti finalman anmenn en vre rediksyon dan pri lo marse.

An se moman, pri i stab e i annan lentere par lezot dimoun pou antre dan biznes fourni manze zannimo lo marse lokal.

Mr Speaker, konsernan pri dizef. Sa bann fakter i pe ede pou stabiliz pri dizef dan pei. Plis investiser pe antre dan sa biznes elevaz poul ponn, ki pe fer ki i annan plis dizef lo marse.

Ozordi prodiksyon dizef, dapre nou bann zofisyé ki'n evalye, i 98mil dizef par zour avek en pri mwayenn ant 4 a R5. E avek bann poul ki pe komans ponn, nou ekspekte ki dan mwan Oktob prodiksyon pou ariv 110mil dizef par zour.

Nou konnen ki kalite manze i kritik pour prodiksyon dizef. Departman in fini ganny Lakor avek en laboratwar etranze pou teste kalite manze zannimo ki lo marse, pou asire ki i satisfè standà enternasyonal.

E nou a rapel ki lannen pase Desanm ti annan en rediksyon mazer dan prodiksyon dizef, akòz sa size kalite manze ki pe ganny fourni lo marse lokal.

Manze i annan en lefe mazer lo prodiksyon poul lavyann osi. Alor, ki nou pe fer se ogmant fournisir e kree plis opsyon pour fermye.

Ozordi i annan en nouvo fournisir manze zannimo ki departman pe fasilite prosedir pour zot ganny later pou fer *warehouse*. E osi, i annan nouvo propozisyon pour faktori pou fer manze zannimo dan pei.

Pour bann lezot kou dan prodiksyon, en tim zofisyé Lagrikiltir i fek sorti *Madagascar* pou fer sa ki apel en *PRA* - en *Pest Risk Assessment* pou *explore* loportinite pour nou enport

manze zannimo. E osi *day old chicks*.

E an plis, a en pri pli rezonnab – a en pri pli rezonnab. Me san konpri – san konpromi, pardon – san konpromi kalite ek kondisyon Biosekirite. Eskize pour sa.

Departman i osi an diskisyon avek bann partener parey nou bann koleg kot *International Solar Alliance*, *GEF Small Grant*, ek *DBS*, *Smart Farming Scheme*, pour ki ferme i kapab adopte *SMART* teknolozi pou redwir kou lenerzi ki nou konnen i en kou mazer pour ferme, ki i ava ede abes pri kou prodiksyon dan pei.

Pour nou kontinyen siport bann prodikter, nou bezwen kontinyen reste azour avek lenformasyon lo prodiksyon dan pei.

Swivan bann rezilta resansman lagrikiltir ki son analiz ek son rapor pe ganny fer la konmela, i annan en travay analiz konpreansiv ki pou ganny fer avek sipor bann partener parey *FAO*, pou evalye bann mezir sipor, sirtou finansyel, ki i merit ganny met an plas pou siport prodiksyon dan pei.

Lobzektif, se pou asire ki resours piblik i target pli byen bann lenpak ki nou pe – ki nou ti a kontan vwar. Ki ava anmenn rezilta pozitiv pour

fermye. Me osi pour konsonmater dan pei. Mersi.

MR SPEAKER

Onorab Tamboo, ou siplemanter?

HON LOUISETTE TAMBOO

Mersi Mr Speaker. Minis, dapre sa ki ou'n eksplik nou la, mwan mon ti a kontan konnen si ou'n asiz avek bann ferme ou'n ganny en dialog avek zot, ou'n diskrit en pe si tou sa ki ou'n enplimante i pe vreman marse pour zot e si i fezab? Akoz, problem i reste e i pe menm aggrave.

E osi mon ti a kontan Minis konnen kan ki nou pou ganny sa bann dizef R1? Mersi Mr Speaker.

(Interruptions)

MR SPEAKER

R1? Minis – Minis, ou repons?

(Interruptions)

MINISTER FLAVIEN JOUBERT

Mersi Mr Speaker. Mersi. Mersi Onorab pour sa kestyon konsernan dizef R1.

Mr Speaker, kou prodiksyon dizef Sesel, dapre analiz ki nou bann zofisye in fer i R2.70. So, i R2.70 en dizef son kou prodiksyon. Alor, i annan dizef R1, me selman i bann ka spesyal.

Mr Speaker, kot i konsern konversasyon avek bann fermye, nou bann zofisye i kontinyelman reste an kontak avek bann fermye.

Me selman, avek ou permisyon mon a envit PS Lagrikiltir pou koz en pe lo lafason ki zot pe anmenn konversasyon avek bann fermye pou konpran zot bann sityasyon prodiksyon. Mersi.

MR SPEAKER

Mersi. PS, wi?

PS CLIMATE CHANGE TONY IMADUWA

Mersi Mr Speaker. Mersi Onorab. An relasyon avek konversasyon ek nou bann fermye, dan nou dernyen papye ki nou'n ekrir, nou'n *set up* sa *Livestock Committee*, kot i annan fermye ki lo la.

E nou'n met en lalis fermye lo la pour nou kapab konn zot bezwen e vwar. Akoz ler nou travay lo bann diferan fason fer, nou bezwen enkli fermye ladan. E se pour kwa zot *include* lo la. Mersi.

MR SPEAKER

Mersi. Minis, ou le azoute, wi?

MINISTER FLAVIEN JOUBERT

Wi, Mr Speaker. Mersi. Mon ti a kontan osi profite pou - Onorab in lev en pwen la. Mon

krwar i enportan pour nou get byen.

Letan mwan mon ti antre dan sa biro, ti annan en regroupman fermye ki ti zwenn avek nou regilyerman. Zwenn avek mwan regilyerman. Ti ganny konversasyon lo tou bann size otour lagrikiltir.

I annan serten *issue* ki'n arive. Akoz bann fermye antre zot, zot pa'n tonm dakor e finalman sa groupman i pa'n marse.

Alor, nou laport i reste ouver pou konverse avek fermye. E nou pe zwenn regilyerman avek bann pti group bann lasosyasyon endividyel - nenport ki moman ki lasosyasyon endividyel i bezwen nou, nou al Praslin, lasosyasyon endividyel i le zwenn nou, nou zwenn ek zot. Nou al La Digue. Nou al Baie Lazare. Nou al partou. Bann lasosyasyon sakenn antre zot, zot demande pou zwenn e nou zwenn.

Me nou pa ankor kapab arive retrouv nou avek tou bann fermye dan en regroupman Nasyonal kot nou kapab fer en diskisyon avek zot. Akoz in annan dezakor.

E ti a byen si tou dimoun, enkli bann Manm Lasanble, enkli bann dimoun ki asosye avek bann lasosyasyon, zot osi met latet ansanm lo ki fason ki nou kapab vini devan e ganny

sa konversasyon antye san ki nou ganny dispit antre nou.

Alor, nou laport i reste ouver. Mwan mon laport i reste ouver e mon ti a kontan ganny sa konversasyon avek bann fermye. Me i pa toultan fasil. Mersi.

MR SPEAKER

Mersi. Mon a pran kestyon Onorab Henrie.

HON GERVAIS HENRIE

Mersi Mr Speaker. Bonzour tou dimoun. Espesyalman *panel*. *Welcome* dan Lasanble.

Mr Speaker, kestyon i demande, si Gouvènmman pe konsider donn sibvansyon ouswa *incentives*?

Menm ler Gouvènmman ki donnen, me esansyelman se *taxpayers* ki peye sa sibvansyon. Sa larzan se ou, mwan e nou ki peye. Solman, nou menm nou ki al aste akòz nou konsonmater. So menm ler nou donn sibvansyon, nou *still* fer fas avek pri ki o.

Kestyon mon le demande se, eski Gouvènmman in fer en letid pou vwar lenpak sa bann sibvansyon, akòz pri i kontinyen reste o?

Eski i pe *meet* son bann *target* e a lavenir koman en pti pei avek en lekonomi ptipti, ki mannyer nou *tackle* sa size?

Akòz sa i repann menm dan lapes. Nou donn sibvansyon *fuel*. Me pri

pwason in kontinyen reste en konsern.

Alor ki mannyer nou *tackle* sa size sibvansyon. Eski Gouvènmman in fer en letid profon ladan? Mersi.

MR SPEAKER

Mersi. Minis?

MINISTER

FLAVIEN

JOUBERT

Mersi, Mr Speaker. Mersi Onorab pour sa kestyon tre enportan. Se, nou pe kontinyen depans larzan lo sibvansyon. E ki lefe i pe annan pour konsonmater?

Annefe Mr Speaker, mon'n mansyonn sa bout lo kote manze zannimo. Letan nou ti pe donn sibvansyon, nou pa'n war en rediksyon dan pri.

Nou ti bezwen entervenir dan marse manze zannimo pour nou war en rediksyon dan pri.

Dizef osi nou ti fer en laranzman vit avek *STC*. E nou ti fer zot konmans kontakte bann fermye direkteman. E la ki nou ti war pri ti ganny pez en pe, e dizef ti konmans apros R5 lo *market*.

Parey mon'n dir, en dizef i R2.70 estimen son pri prodiksyon. E nou war ki dimoun pe vann plis ki 200poursan lo *market* ozordi.

An 2023 letan nou ti'n ariv 88milyon ki nou ti pe

donnen konman sibvansyon, nou ti demann Minister Finans pou fer en odit nou.

Nou dir zot ale, eksplik nou egzakt – non. Servi zot ekspertiz. E pour nou ganny en leksplikasyon byen kler, ki lefe sa sibvansyon pe fer? Ki nou pe sibvansyonnen aktyelman e ki lefe i pe annan lo prodwir final?

Nou'n ganny en kantite difikilte avek sa zefor aköz – e mon annan bann rikord pou montre ki plizyer bann founniser ti dir nou non, mon lenformasyon i prive e mon pa kapab donn ou okenn lenformasyon lo kou.

Par egzanp, konbyen en bal manze i koute pour mwan debark li Lasose *New Port*? E alor, enn bann rezon ki nou pa'n ankouraze pour nou kontinyen avek sibvansyon se ki nou pa kler lo kwa ki nou pe sibvansyonnen. E si nou pe byen servi larzan piblik pou sibvansyonnen.

Me selman nou *still* enterese pour nou konnen egzaktman ki bann pwèn ki nou bezwen touse pour nou fer en pli bon lefe.

Pour nou se pa en kestyon sibvansyon ouswa pa sibvansyon, me set en kestyon, si nou pe met resours piblik dan en sekter, nou devret war en rezilta mazer ki sorti lo lot kote.

I kapab sibvansyon. I kapab en sipor pour fermye direktman. I kapab en sipor lo kote fasilite. Me selman, son rezilta i devret ganny tradwir dan en rezilta pour sa ki pe konsonnen lo finisyon sa laliny.

E pour nou se sa – se sa ki nou pe sey travay lo la. E parey mon'n dir, letan nou pou konplet sa analiz bann lenformasyon lo bann *farming entities* fermye dan pei atraver sa *survey*, sa *census*, nou pe al direktman lo analiz finansyel sityasyon; lo kondisyon finans bann ki enplike dan sekter. Bann difikilte. Bann diferan problem ek bann fasilite ki zot merit gannnen.

E prezan, *finetune* nou sistenn sibvansyon ek sipor pour ki nou vremen annan en lenpak lo prodiksyon e kou pour konsonmater.

Aküz i pa kler poudir ou laverite, ki sa kantite sibvansyon ki nou pe donner, eski i pe tradwir par en lefe mazer e en benefis mazer pour konsonmater? Mersi.

MR SPEAKER

Mersi Minis. Kestyon 160, Onorab Egbert Aglae.

HON EGBERT AGLAE

Mersi Mr Speaker. Bonzour Minis ek ou *panel*. Kestyon i lir konm swivan;

Eski Minis i kapab dir ek sa Lasanble swivan vizit avek zofisye lagrikiltir boner sa lannen, ki plan son Minister pou amelyor sa akse semen pou bann ferme Des Arpents simityer ki al ziska ver lafanmir Valentin? Mersi.

MR SPEAKER

Mersi. Minis?

MINISTER FLAVIEN JOUBERT

Mersi, Mr Speaker. Mersi Onorab pour ou keston.

Mr Speaker, anefe i annan en kominote laferm anrezistre. En Kominote 10 laferm anrezistre dan sa rezyon ki Onorab pe fer referans avek.

Parey in ganny mansyonnen, i deza annan en semen koltar ki an se moman pe donn akse 6 sa bann laferm. Sa semen apre i kontinyen koman en semen later rouz, ki osi donn akse 3 lezot laferm. Me kondisyon sa morso semen i pa favorab.

I annan en dizyenm laferm ki li i pli o e ki akse i en pli gro defi pour li. E i pe servi santye aktyelman.

Departman in fini komans son travay an kolaborasyon avek Minister Later e en *survey* inisyal in fini ganny fer. E nou annan en *drawing* avek nou ki montre

en *layout* preliminar sa semen, lafason ki pou ganny fer.

E sa travay se pou ofisyelman fer demarkasyon sa semen e son koridor pour li pas ladan, pou idantifye meyer semen pour sa dernyen ferme ki pe pas lo later prive dan en santye ki konekte avek semen Des Arpents.

Savedir i pa pe pas kote simityer. I pe pas kote ki vir avek *Mahe Beach*. E an menm tan, pou ofisyelman demark 2 bout later ki'n deza dan prodiksyon ki pa ankor ganny *survey*.

Minister Later ek Labita in fini propoz en plan demarkasyon ki Departman Lagrikiltir in fini donn son laprouvasyon.

Enn fwa ki *survey* i aprouve, departman e Gouvernman pou fer le nesesser pou fasilite konstriksyon akse pour bann ferme.

Me i bon note Onorab, e mon krwar sa i enportan pour nou pran *notes*. Se ki semen ki nou pou konstir anba Bidze departman, pou semen ki pou servi bann ferme. E si i annan okenn bezwen e bann ki pe okip later lagrikiltir dan sa rezyon. Parey mon'n dir i annan 10.

Si i annan okenn bezwen pou fer fasilite pou deservi bann prive ek bann lafanmir o bor, i pou en diskisyon ki

bezwen ganny fer adisyonnèl avek distrik kapab azout avek sa proze. E prezan i ava permet en akse semen pour bann dimoun ki dan sa rezyon.

Alor, se sa kot nou ete ozordi. E nou ekspekte ki en fwa ki nou'n ganny *cost estimate*, nou ava pran sa proze nou ava met li dan nou bann seri proze pour Lagrikiltir dan sa lannen ki pe vini. Mersi.

MR SPEAKER

Mersi. Onorab wi, ou siplemanter?

HON EGBERT AGLAE

Minis, mersi pour larepons. Minis, zis pour lenformasyon. Lafanmir Valentin zot annan zot semen zot. So, i fermye ki servi sa semen kot lafanmir Valentin. So, se sa ki nou pe demann sa keston.

Minis, etandonnen ki in annan plizyer diskisyon, en. Sa semen i enn. Eski – ou'n dir pou dir pou annan en plan ki zot pe travay lo la. E mon konsènen avek laliny Bidze.

Akoz menm Bidze sa lannen mon pa'n war larzan ganny mete pou kapab fer serten semen ki trouve dan distrik Port Glaud ki ankor an demann.

Etandonnen ki sa rezyon was i en rezyon agrikiltir. E mon krwar priyorite i merit

kapab met resours dan sa bann landrwa swivan, aköz pa tou distrik ki annan later lagrikiltir ki pe devlope.

So Minis, eski ki nou kapab annan en komikman ki i ava ganny etale si fodre, swa lannen prosen 2026, ouswa 2027, ki nou a kapab war serten sa bann proze materyalize, ki sa bann fermye i ava kapab ganny en *proper access* pour zot akse zot later? Pour zot kontinyen devlope e agrandi. Mersi.

MR SPEAKER

Mersi. Minis?

MINISTER

FLAVIEN

JOUBERT

Mersi, Mr Speaker. Mersi Onorab. Onorab, wi. I – nou war li koman priyorite pour nou fasilite lavi bann fermye e asire ki zot kapab ganny akse pour zot kapab amelyor zot prodiksyon.

Akoz bokou zot pe soufer ozordi, aköz zot pa kapab vreman ogmant zot laferm lafason ki i prodwi aköz napa akse.

Sa semen ki pe ganny propoze i 955 met longer. I annan en brans i 26 met – 262 met ankor azoute avek. Alor i en semen ase long. E nou ekspekte ki son Bidze pou osi en Bidze ki ase enportan. Me nou ava rode ki mannyer nou

kapab entegre li dan nou lalis proze an 2026, an montan.

Me lot keksoz i bon note se ki nou annan 3 semen ki'n ganny propoze dan distrik Port Glaud. E la prezan nou pou bezwen osi get an term priyorite dan distrik Port Glaud e priyorite dan lezot distrik osi lekel ki nou pou fer.

Mon pa asire si nou pou kapab fer 3 semen deswit Port Glaud. Me nou pou bezwen swazir, ansanm ek departman, ansanm ek distrik. Vwar lekel ki pou annan pli gran lenpak e lekel ki dan pli gro bezwen aktyelman.

Dan lepase nou'n koz par egzant, dan rezyon Port Launay. Kot li i pa zis en kestyon semen. I annan en pon ki nou bezwen al fer. E sa osi i pou koute.

Alor nou pou bezwen met tousala ansanm e balanse. Me parey mon'n dir, nou pou met li dan nou Bidze 2026 e nou ava gete ki zistans nou kapab arive avek en fasilite pou ed sa bann fermye dan sa rezyon. Mersi.

MR SPEAKER

Mersi. Onorab Sultan, ou siplemanter?

HON VALDANA SULTAN

Mersi Mr Speaker. Bonzour *panel* – Minis ek ou *panel*.

Mr Speaker, etandonnen ki nou pe koz lo *visit* ki'n ganny fer pour bann semen laferm, nou annan osi – mon mazine sa enn Port Launay ki ou'n mansyonnen dan sa 3 semen i sa ki al lo laferm kot Mr Ralph Jouanneau.

E nou osi annan semen ki al lo laferm Mr Roland Sauzier ki'n deza ganny vizite. Be nou ti a kontan konnen ki zistans zot proze i ete zot osi?

E, eski Minister i annan en dele letan petet ki in mete pour li kapab petet zwenn sa bann fermye kot semen in fini ganny vizite, petet kapab donn zot en kontrandi lo komansman semen oubyen bann difikilte an fas sa proze?

Ki kekfw a fer zot en pti pe pli soulaze ler zot konnen kwa ki pe arive. Mersi.

MR SPEAKER

Mersi. Minis?

MINISTER

FLAVIEN

JOUBERT

Mersi, Mr Speaker. Mr Speaker, Onorab in nonm 2 proze dan distrik Port Glaud. Kot sa proze Sauzier, nou'n fini met dan lanmen Lazans Lenfrastriktir pou vin avek son desen pour nou demare.

Apre i annan – e li i en ptipti - en pti travay li. I pa en tro gro proze. En pti keksoz ki nou krwar nou kapab dil avek ase vitman.

Semen Port Launay nou'n fer plizyer lesey. Mwan menm mon mon'n al lo *site*. Nou'n get par anba kot sa bann *flat* ki vir avek *Ephelia*. Nou'n get dan diferan pozisyon.

Finalman, nou pe konpran ki nou pou bezwen rod en fason ou en lot fer en pon pour nou traverse pour al dan sa landrwa.

Me keksoz ki ankourazan se ki nou bann zofisye in al fer *visit* apepre en mwan pase. Zot in osi war poudir i annan potansyel pour nou ouver nouvo bout later, ki i ava fer sa semen vo lapenn prezan pour nou investir ladan.

Alor la aprezan, nou bann zofisye enzenyer, eksetera in mont lo *site* e zot pe konmans travay lo en desen. Be selman nou bezwen fer travay lo en propozisyon ki son kou i rezonnab.

Akoz pour nou koup en larivyer, parey sa larivyer ki sorti anler Mare Aux Cochons, i pou kout en pe. E nou bezwen fer en proze ki dapre nou Bidze.

Me selman i annan en travay pe ganny fer lo la e nou bann zofisye i an kontak avek sa bann dimoun. E si neser, nou ava re osi re enform zot ankor lenformasyon lo kote nou ete. E pour zot konnen.

Me, mwan personnelman mon'n al dan sa rezyon Port

Glaud apepre en 2 mwan pase e mon'n koze avek serten ferme. E zot konnen kote nou pe – ki direksyon nou pe fer an term proze. Mersi.

MR SPEAKER

Mersi. Prosen kestyon 161, Onorab Kelly Samynadin.

HON KELLY SAMYNADIN

Mersi Mr Speaker. Kestyon nimeron 161 i lir konm swivan;

Eski Minis i kapab donn Lasanble en kontrandi lo lakantite alokasyon later lagrikiltir ki'n ganny atribye pandan sa dernyen 4 an dan distrik Au Cap? Mersi.

MR SPEAKER

Mersi. Minis?

MINISTER FLAVIEN JOUBERT

Mersi, Mr Speaker. Mersi Onorab pour ou kestyon. Pandan sa dernyen 4 an in annan en total 9 bout later, ki ekivalan 2.3 ektar ki'n ganny *allocate* dan distrik Au Cap.

3 parmi sa bann morso later dan vizinite Reef Estate i atribye avek Proze *La Semence*. E in ganny donner avek bann zenn ferme pour prodiksyon legim avek fri.

Dan menm rezyon i osi annan 4 alokasyon avek bann zenn antreprenner pou fer *hi-tech farming*. Savedir, kiltivasyon dan en fason

entansif pou ankouraz modernizasyon an servan nouvo teknolozi, ki enn parmi bann stratezi nou Minister.

Sa i enkli bann proze tel ki; *Hydrochronic Farming* e osi prodiksyon langre e osi *Aquaponics*. I bon note ki serten sa bann proze pe komanse e departman pe kontinyen donn sipor e swiv sa bann ferme de pre.

E parey ou a okouran Onorab, i annan en semen ek akse ki deza pe ganny lanse pour fasilite larantre lo sa bann sit.

An adisyon, i annan osi sa konversasyon ki nou'n deza gannye lo bann gran *parcel* an montan Montanny Poze par anba prizon. Ti annan 9 *parcel*.

Nou ti'n ganny en pe diskisyon avek *Planning Authority*. E nou ti'n ganny *released* 3 sa bann *parcel* ki nou pe *allocate*.

Nou pe revwar sa lezot 6 *parcel* e nou ekspekte ki nou a kapab tonm lo en laranzman ek en konprenezon avek *Planning* lo sa larestan *parcel*. E nou a kapab *allocate* larestan pour bann aktivite ki relye avek *agroforestry*. E osi elevaz mous dimyel. Mersi.

MR SPEAKER

Siplemanter Onorab?

HON KELLY SAMYNADIN

Mersi Minis. Minis, ou'n nonm sipor an term resours lenfrastruktir. Me selman mon ti ava kontan konnen, an sa ki konsern *monitoring* e *enforcement*.

Petet ki bann – dan sa direksyon, ki zot pe fer pou asire ki later dan distrik Au Cap e dan pei an zeneral i ganny byen zere? Mersi.

MINISTER FLAVIEN JOUBERT

Ok.

MR SPEAKER

Mersi. Minis, wi?

MINISTER FLAVIEN JOUBERT

Mersi Onorab. Mersi, Mr Speaker. Onorab, nou bann lekip *extension service* pe vreman entansifye zot travay avek bann diferan ferme dan bann rezyon.

Ozordi i annan bann group. Par egzanp, i annan bann group *WhatsApp* ki'n formen e nou bann zofisye pe tanzantan prodwir rapor lo performans bann ferme.

Byensir, i pa pou toutafe aparant deswit, bann lenpak ki sa i annan. Me nou war ki bokou ka i annan sanzman dan performans ferme.

E pa tou zot ki pa anvi travay. I annan serten parmi zot petet zot pa tro konnen bann teknik ek bann lapros ki

zot bezwen pran pour zot kapab servi zot later pli byen.

Alor nou bann zofisye *extension* pe vreman travay ase dir lo teren. I annan bann *training* osi ki zot pe fer avek en antite. Par egzanp, Moris ki pe travay avek nou lo la, pour nou asire ki bann dimoun i servi pli byen zot later.

Me bann ki pa servi zot later, i annan prosedir ki ganny aplike. E i annan en prosedir ki nou pe *tighten* en pe bann zefor ki nou - bann mezir ki nou pran pour nou fer sir ki dimoun i pli kapab *comply* avek bann lenstriksyon ki nou donnen. E ki zot pas zot letan lo later san ki zot servi pour prodiksyon aktiv.

Aprè ozordi Onorab, ou bezwen konpran poudir i annan osi en bon pe konfli ki egziste ant serten *unit* prodiksyon ek bann *zone* rezidansyel.

E sa osi i koz en pe fristrasyon e koz en pe problem pou bann ferme. E sa osi nou pe travay lo la.

Parfwa nou ganny bann konversasyon avek *Planning* pour nou asire ki bann dimoun pa ganny anbarase dan zot travay.

Zot kontinyen kapab devlop zot landrwa antyerman. Par egzanp, letan en dimoun i met fimyen, i ganny problem avek vwazen.

E sa i kree en problem pou li. Mersi Mr Speaker.

MR SPEAKER

Mersi. Onorab Sandy Arissol?

HON SANDY ARISSOL

Mersi Mr Speaker. Mon ti a kontan kontiny mon kestyon lo laliny ki Onorab Kelly in demande.

Mon ti a kontan re demann Minis ankor, letan ou'n koz an relasyon avek bann ferme dan distrik Au Cap, eski Minis, ou Minister zot satisfè poudir tou bann dimoun ki'n ganny *allocate* avek en bout later dan distrik Au Cap pe prodwir parey Minister ti a voudre? Premye kestyon

Dezyenmman Minis, taler Onorab Kelly menm in demann kestyon an relasyon avek reabilitasyon kotyer. E sa i en problem ki nou gannyen Au Cap. E madanm – lafanmir Poussou i enn bann fanmir ki'n ganny afekte en kantite.

Me mon ti a kontan demann ou, an rezilta avek bann difikilte ki bann ferme pe fer fas avek. E reabilitasyon kotyer i enn; kot parfwa nou annan sanzman klima, vol, akse semen. Kapasite pour zot devlop zot later.

Ki ou Minister i annan pou siport sa bann ferme, pou asire ki tou sa bann difikilte ki zot fer fas avek, zot

kapab ganny en soulazman pour ki nou prodiksyon ki nou koz lo la i ogmante? Mersi bokou Mr Speaker.

MR SPEAKER

Mersi Onorab. Minis?

MINISTER FLAVIEN JOUBERT

Mersi Mr Speaker. Mersi Onorab. Mr Speaker, mon napa tou statistik lo kote distrik Au Cap. Me selman, dapre lenformasyon ki mon annan, i annan bokou bann proze ki nou'n *allocate* ki pa ankor komanse.

Me selman i pa toultan lafot sa bann fermye. Akoz par egzanp, dan rezyon kote Reef Estate, i annan mankman akse ki pa ti ankor ganny fer.

E la prezan nou pe lans sa proze pou fer akse. E sa prezan i pou permet bann dimoun antre dan zot sit e komans travay.

Me nou ekspekte ki letan nou donn zot sa sit, zot pou kapab komanse aköz landrwa i pa difisil pour zot devlope.

Lezot fermye nou war ki zot pe prodwir. I annan enn parmi ki mon konnen i pa pe prodwir ase. E sa i annan bann aksyon pe ganny pran. E larestan nou war zot pe prodwi ase. Me i annan serten *challenge*. Sirtou lo plato ozordi.

E nou konsyan e nou konsernen ki enn bann keksoz ki nou pou war deplizanpli lo bann plato, se penetrasyon disel. Penetrasyon delo sale, ki pe kree en pe problem pour bann fermye lo kote zot prodiksyon lo bed ater.

Ki fer ki evantyelman bokou zot pou bezwen transform zot laferm dan lezot fason prodiksyon ki pa – ki napa kontak avek ater.

E sa i annan bann demars ki nou pe fer. Nou ti a kontan ganny bann *partner*. Nou pe rod bann – nou fer bann demars avek bann *partner* ki pou kapab ed nou ek bann teknik.

Aküz i annan bann teknik ki kapab ganny adopte ki nou kapab ankouraz sa bann fermye pour zot fer sa bann teknik. E sorti en pe dan sa bann lanvironnman ki konmans vin en pe ostil pour prodiksyon.

Me an menm tan nou bezwen konsyan ki i en kestyon nouvo investisman. E nou bezwen rod bann fasilite sipor pour nou ed zot refer sa bann lenvestisman.

Me bann sipor ki nou pe donn fermye Onorab. Nou donn sipor *extension* parey mon'n dir. *Extension service*. Mon'n deza koz lo nou fasilite bann *inputs*.

Ozordi mon kapab asir ou ki nou bann *inputs* nou pe

ogmant varyete *inputs* ki nou pe ofer bann fermye - An term pestisid, langre. tou sort kalite bann materyo. Parey menm laponp ek bann lekipman pour poul ek koson ki nou pe fer vini ozordi.

E nou lavant total pour en lannen i apepre 5.3milyon. Ziska la konmela 5.3milyon nou'n vann an 2023. An 2025, pardon. E nou'n aste pour apepre 4.5milyon ki nou'n met lo *store*. E nou ankor annan *container* materyo ki pe antre. E nou pe ogmant varyete prodwi ki nou pe fer antre dan pei.

E dan lepase in annan konplent, par egzanp lo kote *micro sprinklers*. Nou *container micro sprinklers* in fini arive. I annan en kantite sa bann prodwi ki'n pare.

E menm nou *manager store* pe dir mwan poudir serten prodwi nou bezwen fer lanons spesyal pour nou fer dimoun vin aste, aköz nou annan prodwi ki pa pe bouze ozordi lo *store*.

Nou osi annan bann sipor finansyel. Nou annan en lekip ki travay ek bann fermye pour nou kapab gid zot lo bann fasilite finansyel.

I annan *DBS* ki deza annan fasilite *Agricultural Development Fund*. E nou'n diskite avek zot resaman, parey mon'n enform Lasanble, pour nou sanz bann

kondisyon e fer li vin pli favorab.

I annan ankor pour nou fer. Me ozordi i annan sa fasilite ki la e ki fermye i kapab akse pour zot fer zot bann lenvestisman.

E i osi annan plizyer lezot sipor. Par egzanp, kot Sant Resers Lagrikiltir ek nou bann partener ki annan bann proze. Nou pe entegre bokou bann proze ki annan pou fer ek lanvironnman dan lagrikiltir. Pour ki nou kapab vreman donn sipor bann dimoun pou fer adaptasyon klima ek sanzman klimatik.

Nou'n menm demande ki Proze *Small Grant* i target spesifikman prodiksyon lagrikiltir dan pei. E zot donn sipor bann ki ti a voudre vin avek bann nouvo lapros pour zot adapte, ouswa pou entrodwir nouvo metod dan prodiksyon manze dan pei.

Alor i annan plizyer keksoz ki nou pe fer lo kote fermye. Me nou konnen poudir sak fermye osi i annan son bann bezwen spesifik. E dan Au Cap, i annan serten ki nou bezwen target zot direkteman pour nou kapab travay avek zot e anmenn serten solisyon pour zot.

Mon konnen inondasyon par egzanp i enn. Kot serten fermye spesifik dan moman gro lapli zot ganny afekte. Nou

bezwen kit en lizye spesifikman lo zot.

Me nou pe fer sa. E nou reste an kontak avek fermye pour nou konnen egzakteman ki zot leta e pour nou kapab entervenir kot i nesese. Mersi.

MR SPEAKER

Mersi Minis. Nou a pran kestyon 162, Onorab Doyace Porice.

HON DOYACE PORICE

Mersi Mr Speaker. Mr Speaker, Minis ek ou delegasyon e tou mon bann koleg MNAs, en bonn apre midi. Kestyon 162 i lir koumsa;

Eski Minis i kapab enform Lasanble ki pe arive avek later lagrikiltir ki ankor lib (*vacant*) lo Praslin, konbyen morso later lib ki reste e konbyen fermye i annan lo lalis pour later? Mersi.

MR SPEAKER

Mersi. Minis?

MINISTER FLAVIEN JOUBERT

Mersi Mr Speaker. Mersi Onorab. Mr Speaker, dapre dernyen lenformasyon i annan en total 4 morso later lib lo Praslin ki anba ziridiksyon Departman Lagrikiltir. 2 ladan i bann later Grand Anse Praslin ki'n ganny rebran avek en fermye dan rezyon Amitie.

E en dezyenm later i trouve Cap Samy. Sa bann later in ganny pran aköz prodiksyon pa ti lo – pa ti alaoter kot i sipoze ete.

Sa bann morso later pe ganny re evalye pour zot ganny *reallocate* avek nouvo fermye ki lo *waiting list*.

Sa lot morso later i trouve Cote D'Or. I pe ganny *allocate* avek en fermye ki nou pe bezwen bouze sorti dan en lot landrwa.

Adisyonnelman, i annan 8 nouvo morso later Amitie ki'n ganny demarke tre resaman. E sa i dan prosedir alokasyon pour bann aktivite *agroforestry* e kiltivasyon fri.

Kot i konsern kantite dimoun ki lo *waiting list* Praslin; an se moman i annan 34 aplikan lo *waiting list*. E parey mon'n dir, zis serten parmi ki nou kapab tire. Aköz nou napa bokou later pour nou *allocate* avek zot lo Praslin. Mersi.

MR SPEAKER

Siplemanter Onorab?

HON DOYACE PORICE

Mersi Minis pour ou repons. Minis, vi ki nou konnen poudir i annan 34 dimoun lo lalis e nou annan zis 8 morso later an plis – ki pou la an plis, eski ou Minister pe mazin revwar lezot bout later pou akomod bann leres ki lo lalis? Mersi.

MR SPEAKER

Mersi. Minis?

MINISTER FLAVIEN JOUBERT

Mersi Mr Speaker. Mersi Onorab. Mr Speaker, lo Praslin i annan enn de landrwa kot nou pe konsider nouvo kare later.

Parey mon'n deza mansyonnen dan lepase. Nou annan *Zone Livestock* ki nou ti pe al ouver. Kot i annan en kantite ale vini lo la. Me nou, nou ti a kontan deblok sa landrwa, pour ki nou kapab *allocate* avek en adisyonnel 8 dimoun.

E letan nou met li akote sa aplikan. E letan nou met li akote sa bann ki nou'n deza koupe dan *Zone Agroforestry*, i ava tir omwen en kenzenn aplikan lo sa lalis 34.

Nou ti a kontan fer sa ase vit pour ki nou kapab osi ogmant prodiksyon lo Praslin. Pa zis pou koup sa lalis. Nou lentansyon se pa prensipalman pou fer desann sa lalis. Me se pou fer monte prodiksyon.

I annan ankor lezot landrwa kot nou pe sey eksplote. Me bokou sa bann landrwa i an konfli avek lezot *land use*. E nou bezwen fer sir ki nou pe fer. E lafason ki nou pe – kalite aktivite ki nou pe

ankouraze fer lo sa bann landrwa.

Me nou konnen poudir Praslin i osi en zil touristik kot i annan bokou konpetisyon pour later. E parfwa i annan serten problem i kapab leve si nou entrodwir serten aktivite dan serten landrwa.

Finalman Mr Speaker, i osi annan serten kare later ozordi ki dan bann sityasyon en pe delika. Akoz sa bann problem *acquisition*, ki sa osi i pe met en fren avek lakantite later ki nou annan *available*.

Akoz nou bezwen osi konsider sa bann propriyete ki ti dan lepase ganny konsidere konman agrikol.

Me ki la prezan nou pe espere pour nou konnen ki vreman zot pou vini an term *land use e ownership* osi. Si i pou kapab reste *available* pour nou kapab servi pour bann ferme. Mersi.

MR SPEAKER

Mersi. Bon, kekyon Onorab Gill?

HON CHURCHILL GILL

Mersi Mr Speaker. Bonzour Minis ek ou *panel*. Minis, lo sa 8 bout later ki ou'n mansyonnen Grand Anse, sa kalite prodiksyon ki pe al fer lo la nou konnen ki i annan pou pran letan.

Apre i annan bann lot group ferme ki zot, zot fer

bann plantasyon bann legim ki 6 mwan oubyen 3 mwan in fini pare pour zot vann.

E prezan Praslin nou annan bann dimoun ki zot, zot annan later laferm e zot pe fer bon prodiksyon.

Apre nou annan bout ki dan sa 4 ki ou'n dir, i annan 2 Grand Anse Praslin apre 2 Baie Sainte Anne, ki si ou kapab eksplik Lasanble, an menm tan pour benefis sa bann dimoun.

Sa dimoun ki pe prodwi plis ki 80poursan. Apre nou annan dimoun ki lo lalis li i en ferme, me selman i pa kapab konmanse li, akòz i napa later.

Prezan sey eksplike dan sirkonstans koumsa lekel ki ganny priyorite lo kanmarad? Eski sa enn ki pe pran prodiksyon i 80poursan, prezan i pe rod en lot bout later pour li kontinyen?

Oubyen pour sirkonstans koumsa i al pour sa enn ki li i en ferme, li osi i annan fanmir i anvi al debourye, me selman li i napa later i lo lalis? Ki mannyer sa nou dil avek?

MR SPEAKER

Mersi. Minis, nou a sey al bref silvouple. Nou pe *run out of time*.

MINISTER
JOUBERT

FLAVIEN

Mersi Mr Speaker. I en pwen vreman enteresan. Mon konnen sak dimoun i annan son lopinyon lo la.

Me selman Mr Speaker, en lobzervasyon ki nou'n fer se ki, si tou dimoun ki ti pe antre dan lagrikiltir zot ti annan menm lanbisyon ek menm lenerzi, nou ti pou war ki tou later lagrikiltir i ganny donnen, i ganny konverti an en laferm vitman. E ou ti pou war prodiksyon lo la dan 6 mwan a lan petet.

Ki nou vwar se ki dan bokou ka, sa ki'n deza etabli letan nou'n donn zot lespas an plis, tre vitman zot ranpli sa lespas e zot prodwir.

Nou'n war sa Praslin. Nou'n war sa lo La Digue, nou war sa dan bann ka lo Mahe, kot nou donn en dimoun en later adisyonnèl. Son laferm in plen. In sot 80poursan.

E nou donn li later an plis e nou war deswit i ranpli e i kontinyen. Akòz in fini etabli li. I fini konn son louvraz. I fini konnen mannyer pou travay sa kalite later dan sa landrwa. E i kapab prodwir tre vit.

Alor, parfwà dan serten ka, depandan ki mannyer sityasyon i ete e ki mannyer later i ete. Nou osi war li koman en priyorite pour nou ed sa dimoun ki'n deza dan prodiksyon pour li ogmant son prodiksyon plis. Akòz nou war son potansyel.

Me i pa dan tou ka. Dan plizyer ka, letan nou annan later ki lo zot menm, e kot nou pe koup bann nouvo kare, nou donnen bann nouvo dimoun.

Me mon pou dir parfwa i regretab. I regretab kot en dimoun i vin avek – devan nou avek bokou bann zoli plan; bann zoli demonstrasyon ki manner i pou devlop son proze.

Me letan i pas 3 mwan, mwan, 6 mwan, 1 an ou espere, ou pa war naryen ki arive. E finalman ou bezwen pran ou en prosedir plizyer lannen ankor pour ou kapab rebran sa later e re lans li, re fer en lot dimoun re lans en travay lagrikiltir lo la.

Alor mon pa pou dir ki nou donn priorite enn ouswa lot. Me nou evalye potansyel sa dimoun. Nou gete ki kalite proze i pe vin avek. Nou get difikilte sa landrwa ki manner i ete.

E nou osi get sityasyon proksimite avek laferm. Akoz bokou bann dimoun ki pe demann nou landrwa an plis se senpleman zot pe debord an plis lo later Leta ki o bor zot deza.

E bokou ka, i pa posibil pou etabli en nouvo laferm lo sa bout an plis. Plito ou *allocate* avek sa enn ki deza la e ou donn li en posibilite pour li agrandi.

E nou, nou pou dir ki – *I mean*, mwan mon pou dir ki dan bokou ka mon tre satisfè avek bann later an plis ki nou'n donn bann dimoun ki'n deza etabli.

Me i annan bann nouvo ki'n komanse, ki'n fer byen. Me i annan osi en bon pe bann nouvo ki parfwa zot dezapwente. Zot dezapwentan lo performans letan ou konpar sa ki ou war lo teren, e sa ki zot prezant devan ou koman bann propozisyon proze. Mersi.

MR SPEAKER

Mersi. Nou ava al lo kestyon 163, Onorab Norbert Loizeau.

HON NORBERT LOIZEAU

Mersi Mr Speaker. Bonzour Minis ek ou delegasyon ankor enn fwa. Mr Speaker, mon kestyon i al koumsa; Eski Minis i kapab enform nou Lasanble konbyen morso later ki'n ganny demarke pou fer lagrikiltir dan distrik Bel Air? Mersi.

MR SPEAKER

Mersi. Minis?

MINISTER FLAVIEN JOUBERT

Mersi Mr Speaker. Mersi Onorab pour kestyon. Mr Speaker, distrik Bel Air i annan aktyelman 11 dimoun

prive ki pe fer aktivite agrikol lo zot prop later.

An se moman i annan 2 morso later ki'n ganny formelman demarke pour lagrikiltir e ki tonm anba ziridiksyon sa departman.

Par kont, Minister an kolaborasyon avek Minister responsab pour later Leta pe aktyelman travay pou idantifye lezot morso later dan sa distrik - sirtou dan Sans Souci, avek bi pou satisfè demann bann zabitan Bel Air ki lo nou lalis *waiting list* parey nou dir.

Ziska prezan, i annan 4 dimoun sorti dan sa distrik ki lo sa lalis pour alokasyon later lagrikiltir. Mersi.

MR SPEAKER

Siplemanter Onorab?

HON NORBERT LOIZEAU

Mersi Mr Speaker. Mr Speaker, vi ki parey Minis in dir, later dan distrik Bel Air i en pti pe limite. Vi ki nou topografi mannyer i ete.

Minis, vi ki mon'n tann dan lezot distrik i annan plizyer bann morso, Eski sa bann morso i bezwen al spesifikman pour zabitan dan sa distrik spesifik?

Ouswa, serten zabitan Bel Air osi ki anvi fer lagrikiltir i osi kapab *apply* pou ganny en morso dan en lot distrik?

E osi Minis, dan en *visit* ki nou ti fer ansanm ek Minis Later - mon krwar ou rapel. Ti annan sa konversasyon kot nou pou vwar en pe bann *forest reserve*, parey nou'n koz lo la, eski i annan okenn travay ki'n ganny fer pou war potansyel ladan, ouswa pou fer pli tar? Mersi.

MR SPEAKER

Mersi. Minis, wi?

MINISTER **JOUBERT**

FLAVIEN

Mersi Mr Speaker. Mersi Onorab. Onorab sa bann later ki'n ganny idantifye dan diferan distrik la, i pa neseserman ganny donnen avek dimoun sa distrik spesifikman.

Akoz nou konnen i annan distrik ki napa later lagrikiltir. I annan ki annan plis. Alor, nou *allocate* dapre nou lalis *waiting list* e dapre priyorite ki nou annan.

Par egzanp si nou annan en landrwa kot nou konnen i apropiye pour *livestock*, nou gete lekel bann ki'n demann pou fer koson, poul, kabri, bef eksetera, e nou liste zot. E nou fer zot ganny akse avek later pou fer sa landrwa. Akoz parfwa, pa tou landrwa ki apropiye pour serten kalite aktivite.

Alor, i pa toultan ki ou pou war en ferme etabli dan

en distrik ki en dimoun sorti dan sa distrik li menm. Me en ferme ki reponn bann kriter lo kote kalite aktivite. E lo kote groser son aktivite ki pe propoze. E osi letan ki in lo *waiting list*.

Forest reserve F1 ki lo *land use plan*. Eski nou pe konsider serten propozisyon pour nou *convert* zot an later lagrikiltir?

I annan legzersis ki nou'n fer dan distrik Bel Air, par egzanp, nou pe get sa bout later dan rezyon Kan Tobrouk. I annan diskisyon ki nou'n fer avek Minister Later e i annan propozisyon pou etabli omwen 2 dimoun lo sa later, akòz i ase gran.

E i annan osi lezot aktivite ki pe ganny propoze dan sa landrwa. Akòz i osi annan en pe fore ki kapab ganny entegre avek serten aktivite. Par egzanp, prodiksyon fri, mous dimyel. Ouswa lavanniy, eksetera.

Alor i annan sa demars ki nou'n deza fer e diskisyon ki nou pe deza kontinyen fer avek Lanvironnman, Lagrikiltir ek Minister Later.

E menm dan distrik Bel Air ti annan propozisyon. Nou kontinyen konversasyon avek ou menm e avek distrik. E pour ki nou kapab omwen ofe solisyon pour bann ki annan – ki annan bezwen pou ofe prodiksyon dan sa distrik.

Me osi, nou bezwen konpran ki i annan serten landrwa ki annan bann later prive osi. Ti a byen si nou kapab ouve diskisyon osi avek bann propriyete prive dan distrik Bel Air.

Nou konnen i annan en bon pe ki annan later ki petet ozordi i kapab ganny fer laferm avek. Nou ti a enterese osi pou ganny en konversasyon avek zot lo sa size. Mersi.

MR SPEAKER

Mersi. Nou ava avans lo prosen kestyon, 164 Onorab Francois Adelaide.

HON FRANCOIS ADELAIDE

Thank you, Mr Speaker. Minis ankor, bonzour avek ou delegasyon. Mon kestyon i al koumsa;

Eski Minis, i kapab eksplik Lasanble lo bann demars e bann aksyon ki pe ganny pran avek bann endividi ki'n ganny asiste avek en bout later lagrikiltir, me ki pa pe devlop zot later annakor avek bann kondisyon ki'n ganny mete? Mersi.

MR SPEAKER

Mersi. Minis?

MINISTER FLAVIEN JOUBERT

Mersi Mr Speaker. Ler later lagrikiltir i ganny – e mersi Onorab pour ou kestyon.

Mr Speaker, ler later lagrikiltir i ganny donnen, fermye i ganny donnen dokiman neser ki liste bann kondisyon ki bezwen ganny respekite anlany avek bann diferan regilasyon. E i permet sa fermye pou antre e develop sa later dapre son plan developman.

Dapre son leta lokasyon, ki en premye dokiman, e son *lease* ouswa son *buy* ki en dezyenm dokiman. Zot annan en dele 6 mwan pou komans zot aktivite. Apre sa, i zot responsabilite pou asire ki prodiksyon i reste par lao 80poursan.

Me malerezman pour diferan rezon, pa tou laferm ki kapab komans zot proze dan sa peryod 6 mwan, pour *crop* e 18 mwan pour *livestock*, e mentenir sa nivo prodiksyon ki ganny rekomande.

Bann zofisye ekstansyon dan sak rezyon i *visit* bann laferm e travay avek bann fermye, pou regilyerman anmas lenformasyon laferm pou fer sir ki bann kondisyon spesifye lo *lease* i ganny swiv, pou asiste e gid fermye ver bann servis ki zot bezwen pou zot amelyor zot prodiksyon.

E osi pli enportan, pou akonpanny fermye e donn zot lenformasyon e propoz solisyon pour zot bann defi.

An ka ki prodiksyon i kontinyen reste anba sa nivo,

e sa i dapre rapor bann zofisye, bann fermye i ganny met lo en premye probasyon 3 mwan. Pandan sa letan zot ankor ganny akse ek bann servis lagrikiltir. E zot kontinyelman ganny *monitored*.

Apre sa - apre ki sa premye probasyon i terminen, laferm si i pa amelyore i ganny mete lo en dezyenm probasyon 3 mwan. Dan sa ka, Seksyon Later dan departman ansanm avek bann zofisye ekstansyon i *monitor* pli pros sa fermye.

E ler dernyen probasyon i fini, sa bann ka spesifik i ganny anvoye kot Komite Alokasyon Later ki reget bann rapor prodiksyon. Bann difikilte ki fermye i fer fas avek. E menm kapab zwenn ek sa fermye si neser, avan ki i ganny *refer* kot Seksyon Later pou fer *retraction*.

Alor Mr Speaker, i annan en prosedir ki ganny aplike pou dil avek bann fermye ki pa pe servi byen later. E me selman, nou annan en kantite konplikasyon lo kote letan. E lo kote osi bann posibilite pour zot fer *appeal* apre. E an menm tan, nou annan sa sityasyon kot i annan plizyer dimoun ki'n deza fini etabli lo later lagrikiltir. *And* apre, dapre rikord ki mon annan i annan 50 – i annan apepre 50. Mon krwar 50 ka, non? Apepre

50 ka bann ki'n deza fini etabli lo later lagrikiltir.

Ki prezan menm si ou pou fer *retraction*, i annan en lot konplikasyon ki vin avek. Akoz sa bann dimoun ek zot fanmir ek zot bann pti zanfan ek desandan, in fini war li etabli la. E ou pou bezwen fer *eviction* prezan.

E *eviction* i en lot konplikasyon vreman serye, akoz i enplik tir dimoun dan lakaz ki zot in grandi ladan. Alor i annan prosedir ki aplike kot ou ariv lo nivo *retraction* avek Komite Alokasyon Later.

Me apre sa, son prosedir i vreman ralanti e i vreman difisil pour nou kapab konplete. Me kantmenm, departman pe travay lo plizyer ka.

E nou ti a voudre ki nou kapab ganny sipor adisyonnèl pour nou kapab fer keksoz al pli vit. E osi klarifye atraver bann *lease*, bann kondisyon ki pli sever dan bann *lease* ki nou donnen dan le fitir. Mersi.

MR SPEAKER

Wi, ou siplemanter Onorab Adelaide?

HON FRANCOIS ADELAIDE

Mersi Minis. Mersi pour ou larepons detaye. Mon vreman apresye travay ki zot pe fer. Be solman mon konpran zot bann lezot problem zot gannnen.

E parey nou, nou la, tou kou parey mon dir bann Minis, Lasanble i la pou reviz tou bann Lalwa, ki i fer ki nou pei i benefisye.

E Minis, petet mon pe demann ou - mon konnen nou manda pe al fini la, nou pe vini ankor apre sa manda, eski zot pe travay lo bann Lalwa ki pour nou kapab – pour sa Lasanble kapab ed Minister, pour ki bann dimoun ki vreman merite ganny later lagrikiltir zot debourye, zot kapab gannnen?

E petet Minis, *in regard* nou pe dir ki later lagrikiltir i en pe *short*, nou trouve ki i annan bann dimoun ki pe antre lo later lagrikiltir parey Baie Lazare, zot in fini sot en laz letan. 60 an, 70 an, an montan - zot pe ganny later lagrikiltir.

E petet, ki mannyer zot kapab ganny sa bann sans koumsa e akoz ki distrik pa ganny met okouran lo bann *tenant* ki pe vin dan distrik ki pe vin ganny later lagrikiltir?

E petet akoz nou pa pe konsider ankor bann zil, pour nou kapab ed bann dimoun ki napa en bout later lagrikiltir pour zot benefisye? Mersi.

MR SPEAKER

Mersi. Minis?

MINISTER JOUBERT

FLAVIEN

Ok, mersi Mr Speaker. Premye pwen ki Onorab in leve se konsernan bann lareg pli serye pour nou *manage* later lagrikiltir.

Nou annan en Lalwa ki nou'n propoze ki apel *Agriculture Act*, ki i en Lalwa ki ti ganny premye fwa – non pardon - en Lalwa ki egziste depi 1964 mon krwar. E i pa'n ankor ganny revize ziska konmela.

Nou'n fer en travay avek Atorni Zeneral. Me malerezman, mon pa krwar i pou ariv devan Lasanble avan Lasanble i fermen an Out. Me nou ti a voudre ki sa Lalwa i kapab pase.

Akoz, anba la i annan bann provizyon kot i konsern bann *lease* - kot i konsern bann later. Proteksyon later lagrikiltir parey nou ti ganny donnen koman en *target* par Gouvernman.

E osi i donn nou bann posibilite pour nou fer bann kondisyon spesyal pour later, pour diferan kalite purpose. E i donn nou plis posibilite pour nou antre e fer bann aksyon konsernan bann dimoun ki lo sa bann landrwa.

Dezyenm pwen ki Onorab in leve i konsern bann dimoun laz lo later bann – laz bann dimoun ki'n ganny later lagrikiltir.

Ou konnen, enn bann kondisyon ki nou – enn bann

kriter ki nou gete letan nou pe *allocate* ouswa nou pe konsider en dimoun pour later lagrikiltir, se nou bezwen demande si sa dimoun i annan en lakaz.

Akoz ozordi nou vwar ki bokou dimoun, ouswa serten zot pe demann later lagrikiltir, pa neserman pou vin plante ouswa pou vin fer prodiksyon, me pour zot ganny en landrwa reste.

Alor enn bann kriter ozordi ki nou demande se, eski ou annan en landrwa reste avan ou vin demann later?

Akoz nou konnen ki en fwa ki ou etabli, i pou vin difisil pou tir ou. E nou pou menm tay kot nou *MNA* pour nou al fer konplent kont sa zofisye lagrikiltir ki dir, ou pe vin tir mwan dan mon lakaz, kote mon pou ale?

Alor enn bann kriter ozordi ki nou aplike se, eski ou annan en lakaz? Eski ou annan en landrwa reste? Eski ou'n lo en *scheme* avek Gouvernman, par egzamp pour ou ganny en landrwa reste avan ki ou vin demann later lagrikiltir?

E parfwa sa bann dimoun ozordi ki menm si son laz in avanse, nou pa kapab diskrimin kont li. Si nou konnen i annan son landrwa reste e i en dimoun ki eksperyanse, i kapab travay,

nou pa pou kapab diskrimin kont li e dir li pa vin la.

Me selman si nou konn – nou konn tre byen si nou met en dimoun 60 an ki napa en landrwa reste lo en later lagrikiltir, nou pou *end up* avek en problemn.

Alor nou fer byen sa diferans ant serten dimoun. E nou esey rod fason pour nou fer sir ki i pa vin en problemn pli tar dan le fitir.

Me selman parey mon'n fer kler, nou'n fer en resansman an 2021 - nou ti fer en travay. E nou annan en lalis dimoun ki ozordi nou'n an diskisyon avek Minister Later pour nou vreman konpran ki nou pou fer avek zot.

I annan serten ki dan sa bann pti lakaz ki nou apel *demountable*. Savedir bann lakaz parey lakaz tol, eksetera. Ki – aköz ou napa drwa konstrir en lakaz blok lo later lagrikiltir.

E nou bezwen tonm dakor lo ki fasilite nou pou donn sa bann dimoun pour zot kapab aranz zot lavi. Me osi liber sa bann landrwa, pour ki lezot i a kapab ganny posibilite pou prodwir.

E an menm tan i annan bann fanmir ki zot bann pti zanfan ouswa zanfan in fini etabli. Sa osi nou bezwen tonm dakor ek Minister Later

ki vreman nou pou fer pou travay avek zot lo la.

An plis ki sa Mr Speaker, nou annan *Land Policy* ki nou'n fini travay lo la. Me nou ti a voudre ki i osi sorti ansanm avek nou Lalwa *Agriculture Act*, ki parey mon'n dir i preski pare.

Atorni Zeneral ti dir nou poudir i pou delivre sa an Out. Me mon pa konnen si – mon krwar pa si i pou arive avan dat fermtir Lasanble sa lannen.

Me alor – me selman i la. E nou'n pare pour nou met li devan koman enn bann zouti ki nou a kapab servi pou *manage* later lagrikiltir dan pei. Mersi. Zil, pardon.

MR SPEAKER

Mersi. Mon a pran kestyon Onorab Bijoux.

HON GERARD BIJOUX

Mersi Mr Speaker. Bonn apre midi Minis avek ou delegasyon.

Annefe Minis, vi ki nou pe koz lo bann later lagrikiltir ki pa pe ganny devlope - mwan mon annan enn – en zenn Anse Royale ki'n ganny later - in ganny *allocate* en bout later Val Den Dor, e son rezon aköz i pa pe devlope se ki napa semen pou ariv kot sa later.

Eski Minis i kapab dir sa Lasanble si dan zot plan pou fer semen, pour ki sa bann

zenn i kapab ariv kot zot later pou devlope?

MR SPEAKER

Mersi. Minis, briyevman silvouple?

MINISTER FLAVIEN JOUBERT

Mersi Mr Speaker. Mersi Onorab. Nou ava get byen sa ka spesifik. Me selman laplipar ditan se en kestyon Bidze.

Nou annan en serten sonm ki nou servi tou le lannen pour swa met koltar, swa fer nouvo semen. Me sa Bidze i pa telman gro ki nou kapab fer tou proze an menm tan.

E sirtou si i pe deservi en fermye tousel. Akoz laplipar ditan nou sey bann proze ki pou deservi plizyer. Parey nou'n nonm sa enn Port Glaud kot i pou deservi 10 laferm.

E nou sey fer en proze ki pou deservi plizyer fermye an menm tan. Me nou ava get sa enn ka spesifik, nou ava trouve akoz ki i pa pe kapab devlop son proze.

Me i annan en lot pti keksoz Onorab. Se ki resaman dan nou Lagreman avek DBS nou'n tonm dakor ki letan en dimoun pe pran son *loan*, i osi kapab pran en bout pour li fer akse avek.

Akoz dan lepase, sa *loan DBS* pa ti permet pour ou

kapab fer, par egzanp en bout semen beton pou ariv kot ou, ti dir ou, ou kapab fer kazo poul, o-u kapab fer fasilite prodiksyon, Me ou pa kapab servi pou fer bann keksoz, par egzanp amelyor sekirite otour laferm. Ouswa fer semen beton, eksetera.

Alor, la nou'n demande ki i ganny sanze. E sa i dan nouvo Lagreman. E alor sa posibilite pour la pour sa dimoun letan i fer son proze, i osi kapab azout bann lenfrastriktir nesese pour li devlop son proze. Mersi.

MR SPEAKER

Mersi. Kestyon 165, Onorab Waven William.

HON WAVEN WILLIAM

Mersi Mr Speaker. Eski Minis i kapab eksplik Lasanble lo sa Proze *Red Meat* ki pou fer dan distrik Grand Anse Mahe? Mersi.

MR SPEAKER

Minis, repons?

MINISTER FLAVIEN JOUBERT

Mersi Mr Speaker. Mersi Onorab pour kestyon. Apre bann defi ki departman in fer fas avek pou kapab ganny en lokasyon apropiye pou konstrir sa Laboratwar *Red Meat*, nou ti pran desizyon an konsiltasyon avek bann

partener kle pou enstal sa nouvo fasilite lo en later dan distrik Grand Anse, Mahe.

Ki reste en landrwa pli santral ki aksesib pour bann fermye ki fer elevaz koson dan rezyon was.

Sa nouvo Laboratwar Lavyann Rouz, ouswa *red meat* parey nou dir, pou annan bann lekipman modern ki pou satisfè bann norm ek standar lokal ek enternasyonal.

E osi met annan fasilite pour valer azoute e fer provizyon pour tretman bann desarz ek bann prodwi ki sorti dan sa landrwa.

En laboratwar modern ki satisfè tou bann norm enternasyonal, nou ekspekte pou ed nou amelyor Lendistri Prodiksyon Lavyann lokalman.

Akoz nou konnen leta nou bann laboratwar ozordi ki pe kree en gro baryer pour *access* avek marse par bann prodikter lokal.

Sa laboratwar pou asire ki tou konsonmater, enkli bann ki dan Lendistri Touris par egzanp, i kapab benefisye avek lavyann fre e a en kalite eleve.

Sa fasilite i pou enn ki modern. E nou pe fer li parey nou pe *design* li dan sa fason pou asir ki lasante piblik, *welfare* bann zannimo e osi soustenabilite ekonomik i ganny garanti.

I pou osi annan en bon zesyon bann dese. Bann *waste* ki sorti kot sa fasilite, aköz nou pe met lanfaz lo teknolozi pou minimiz risk polisyon lanvironnman.

Nou a rapel ki sa fasilite ti'n ganny propoze Providence. E nou ti pe fer li lo en o nivo pour ki i napa okenn nwizans ki sorti an deor sa fasilite. E nou pe retenir menm *design* pour Grand Anse.

En lekip in ganny met an plas pou prepar en rapor lo tou bann paramet ki pou bezwen ganny met an plas pou asir proteksyon lanvironnman e osi amenazman sa fasilite.

An se moman, plan in fini ganny prepare e i pe ganny re evalye par nou arsitek. Pou fer ki i apropiye e i *fit* byen dan sa nouvo lokasyon Grand Anse, Mahe. Mersi.

MR SPEAKER

Siplemanter Onorab?

HON WAVEN WILLIAM

Mersi Mr Speaker. Minis, eski ou kapab dir avek Lasanble kan apepre ki zot krwar ki sa pou demare?

E *once* ki sa proze i konplete, ki prosedir zot pou met an plas vizavi loperasyon sa fasilite? Mersi.

MR SPEAKER

Minis, repons?

MINISTER FLAVIEN JOUBERT

Mersi Mr Speaker. Mersi Onorab. Pour en premye, se kan i pou komanse? Parey mon'n dir, plan pe finalize la e nou ti a kontan antre lo sa sit avan lafen lannen ki konmans fer bann travay preliminar.

Lot keksoz. *Assuming* ki *Planning* ek tou bann prosedir i ganny konplete ek bann dokiman i pare. Me nou nou'n pare pou fer sa proze. Napa okenn baryer ki pou anpes nou lans li.

Lot se prosedir pou fer loperasyon fasilite. Gouvernman pa pou *run* sa fasilite li. Gouvernman deswit konman nou konstrir, nou pou met li a laporte bann ki enterese pou fer li fonksyonnen.

Parey mon'n dir, pou annan en fasilite laboratwar, labataz. Me osi en fasilite *value addition* avek ek *storage* ki en dimoun i kapab servi koman en biznes, *basically*, pour li kapab prodwir e vann bann prodwi lavyann.

Alor pour nou, i en kestyon fer sir ki nou annan en bon Kontra ek en bon kondisyon ki ganny aplike lo sa enn ki pou vin *operate* sa fasilite.

E ki osi i swiv bann gidans ki sorti dan bann rapor konsernan *management* sa sit e son lantouraz. Mersi.

MR SPEAKER

Mersi Minis. Kestyon 166, Onorab Georges Romain.

HON GEORGES ROMAIN

Mersi Mr Speaker. Eski Minis i kapab dir nou kote travay ki ti pe ganny antreprann par Minister Lagrikiltir pou donn akse semen sa 2 fermye anler La Gogue in arive? Mersi.

MR SPEAKER

Mersi Onorab. Minis?

MINISTER FLAVIEN JOUBERT

Mersi Mr Speaker. Mersi Onorab.

An relasyon avek propozisyon pour en semen pou akse en later lagrikiltir lo *Parcel H13610*, Minister i oule konfirmer ki *survey* topografi pou idantifye en semen pli favorab pou akse sa later in fini ganny fer par en arpanter prive. Ki'n ganny peye anba Bidze Departman Lagrikiltir.

Sa propozisyon in montre ki sa semen pou pas atraver 2 lezot later lagrikiltir ki'n deza annan en *lease* avek Gouvernman - ki deza annan en *lease* avek 2 fermye, pardon.

Sa fermye in deza montre lentere pour li komans tras en bout sa semen li menm. Sa

enn ki pou ganny deservi par sa semen.

An se moman, departman pe finaliz negosyasyon avek enn sa laferm ki sa semen pou pas lo la avan ki nou donn permisyon final.

I annan osi demann pour en semen pou deservi laferm ki lo later *H11683*. La osi departman in fini fer *survey* topografi.

Sa propozisyon in ganny refer kot Lazans Lenfrastriktir pou evalye sa plan e propoz en *scope* avek en *BOQ* pour nou fer estimasyon lo konbyen pou koute pou konstrir sa semen.

Parey in deza ganny mansyonnen oparavan, Minister i oule fer sorti ki Departman Lagrikiltir pa neseserman annan Bidze pou *allocate* spesifikman pou konstrir semen pou en laferm endividyel.

Me apre ki nou resevwar estimasyon e nou konn kou sa semen, departman i ava fer provizyon dapre - a fer provizyon pour konstriksyon dapre lalis priyorite ki nou annan devan nou a sa letan.

Nou ekspekte ki sa pou ganny fer dan bann lalis proze ki nou pou devlope pour 2026 an montan. Mersi.

MR SPEAKER

Siplemanter, Onorab Romain?

HON GEORGES ROMAIN

Mersi Mr Speaker. Minis, mersi pour larepons. Minis, mon annan 2 pti kestyon ase vit.

Anvi ki i annan enn sa fermye, Mr Cedras, ki nou konnen ler ti pou fer sa semen i ti kapab devlop lezot posibilite teren, pou kapab donn lezot dimoun ki anvii fer lagrikiltir. Savedir pou'n en benefis pour kote Minister.

E mon dezyenm kestyon Minis, anvii ki mon konnen i annan bann semen, parey ou'n fer resorti, ki'n deza fini ganny fer lo bann later bann fermye.

Selman par kont, bann lezot fermye ki a kote pa pe kapab itiliz sa bann semen, aköz sa bann semen in ganny fer par bann fermye zot menm.

Me selman, mon santi sa kekfwa dan le fitir Minis, si nou ti kapab koz ek sa bann fermye ki nou pa bezwen fer plizyer semen pou ariv lo later lagrikiltir. Ki sa menm semen ti kapab ganny itilize. Me selman apre sa 2 brans lo diferan later lagrikiltir.

E prezan i fer ki Minister Lagrikiltir pou bezwen fer lezot semen pour lezot fermye. Alors, mon ti a kontan ganny pwennvi Minis lo la. Mersi Mr Speaker.

MR SPEAKER

Mersi. Minis?

**MINISTER FLAVIEN
JOUBERT**

Mersi Mr Speaker. Mersi Onorab. Mon krwar i en pwen ase enportan. I annan de ka kot ferme in vini avan in etabli son laferm. In fer en semen e ki pas tou longer sa bout later ki an deor son laferm. E apre sa, letan ou pou etabli en nouvo laferm, ou pou bezwen al negosye ek li.

E pour nou se en keston negosyasyon kot sa ferme i bezwen war en benefis avek sa larzan ki li in depanse. E i kapab prezan permet ki sa lot ferme i servi. E sa semen finalman i vin en bout i vin en semen komen ant sa bann laferm.

Me dan bann ka parey, nou antre an negosyasyon ek sa ferme e nou tonm dakor lo en laranzman ki benefisye li osi pour li kapab osi tir son larzan ki in mete dan sa fasilite.

Dan ka bann ptipti semen ki al lo laferm. Normalman letan nou fer semen nou fer ki akse i ariv o bor laferm e ferme i fer akse anndan laferm.

Alor, laplipar ka nou pa ganny problem. Me selman nou konnen poudir parfw a i annan laferm ki enn par deryer lot. E la prezan i kree en pe *issue* kot nou bezwen

retournen an aryer e aziste en pe avek sa bann ferme.

Laplipar ka nou pa ganny problem. Me i annan de ka kot nou ganny en pe problem. E la nou bezwen vremen pouse pour nou kapab vin ek en solisyon. E i annan ferme ki en pe difisil parfw.

E petet pour en bon rezon. Akoz petet serten dimoun i dir ou; mon pa pou les sa semen pase la akoz voler. Akoz nou konnen i annan dimoun i pa oule akse pas o bor kot li akoz i kree en louvertir pour li ganny – dimoun i vin fer destriksyon lo son laferm.

Alor, pa toultan ki son bann rezon i pa rezonnab. Me nou, nou bezwen travay avek zot pour nou trouv solisyon. E apre osi i montre zot ki zot kapab benefisye dan en lot fason sa bann ka parey.

Me nou konsyan sa Onorab. E dan bann ka kot i annan difikilte nou, nou parey pou antre an negosyasyon ek bann ferme e trouv bann solisyon akse, pour ki tou dimoun i kapab ariv omwen o bor son laferm. Mersi.

MR SPEAKER

Mersi Minis. Avek sa nou'n ariv a lafen seri keston. Mon remersye Minis ek son *panel*.

Me selman avan nou disperse, permet mwan fer 2 pti lanons - plito *reminder*.

Enn nou – apre midi nou annan Mosyon. E parey nou'n etabli dan *ABC*, nou pou komans avek Mosyon anmennen par Onorab Clifford Andre. Nou'n sanz lord en pti pe anba *Order 25(2)(1)* pou permet sa Mosyon avanse.

E osi Manm i konnen poudir 4er apre midi nou annan en rankont isi dan Lasanble ki en kozri par en konsiltan, en Manm Kongre mon krwar, Ameriken, ki pe adres Lasanble lo serten size ki ase pertinan pour nou.

Donk, sa kozri pe ganny fer dan letan *Sitting*. Alor, tou bann Manm i ganny demande pour zot la.

Savedir, nou sesyon apre midi nou pou konmans li 2er edmi, vi ki nou'n ganny sa retar. E nou pou termin li 3er edmi.

Mersi pour zot konprenezon. Mersi ankor Minis e zot delegasyon. Bon depar e bonn kontinyasyon. Lasanble a repran 2er edmi.

(BREAK)

MR SPEAKER

Bonn apre midi tou dimoun, tou Manm Lasanble, nou bann zofisye. Bon, apre midi nou al lo size Mosyon.

Premye. Mon ti'n enform bann *Leaders* Lasanble pou fer zot nominasyon pour

Komite ki ti ganny rezoli dan Lasanble semenn pase.

E sa i lo *Ownership Maison du Peuple*. Mon ti a kontan ganny bann nominasyon an se moman. Lo kote *LDS*, Onorab Arissol Sandy?

HON SANDY ARISSOL

Bonn apre midi, Mr Speaker. Ou pe koz an relasyon avek *Select Committee* Mosyon ki Onorab Georges ti anmennen? Mr Speaker?

MR SPEAKER

Yes.

HON SANDY ARISSOL

Yes, ok.

MR SPEAKER

Yes, ok. *Thank you.*

HON SANDY ARISSOL

Ok, lo nou kote - mersi Mr Speaker. Lo nou kote, nou prezant 5 Manm parey nou toultan konstitye nou lekòr.

I annan Onorab Bernard Georges, Onorab Philip Monthy, Onorab John Hoareau, Onorab Gervais Henrie e Onorab Anne Bistoquet. Nou 5 Manm ki nou prezant avek Lasanble Nasyonal.

MR SPEAKER

Mersi. Lo kote *US*?

HON SYLVANNE LEMIEL

Bonn apre midi, Mr Speaker. US pou napa Manm lo sa Komite. Mersi.

MR SPEAKER

Tre byen. Bann Manm LDS i a konstitye sa Komite e Madanm Clerk i ava apel premye *meeting*. E zot a prosede avek prosedir anba *National Assembly Procedures* pou elekte zot *Chairman* e pou desid zot *Terms of Reference*. Mersi.

Bon, parey mon'n anonse bomaten, dan size Mosyon nou pou pran apre midi Mosyon anmennen par Onorab Clifford Andre. E sa i koncern lot Komite ki Lasanble ti deside lo la. Mon ava apel Onorab Andre pour soumet son Mosyon premye.

HON CLIFFORD ANDRE

Mersi Mr Speaker. Mr Speaker, Mosyon i ganny anmennen lo lapar Komite ki'n ganny formen, - ki *Chairman* sa Komite. I lir koumsa;

Sa Lasanble i demande ki *Terms of Reference (TOR)* pou *Select Committee Declarations of Assets*, ki pe ganny soumet avek sa Mosyon, i ganny aprouve par sa Lasanble pour ki sa Komite i kapab fer son travay e soumet son rapor dan sa dele letan 30 zour ki'n ganny demande pou konplet son travay.

MR SPEAKER

Mersi.

HON CLIFFORD ANDRE

Mon ti a kontan soumet sa. Mersi.

MR SPEAKER

Mon a ganny segonnman pour sa Mosyon. Onorab Naidu?

HON SATHYA NAIDU

Yes, Mr Speaker, mon le segonn Mosyon anmennen par Onorab Andre.

MR SPEAKER

Mersi. Onorab Andre, ou kapab adres ou Mosyon.

HON CLIFFORD ANDRE

Mersi Mr Speaker. Mr Speaker, swivan laprouvasyon Lasanble parey mon'n dir, sa Komite in ganny konstitye.

E mon ti ganny privelez pour mwan ganny apwente konman – vote konman *Chairperson*. E Vis-Chairperson i Onorab Naidu.

E bann lezot Manm Komite i Onorab Esparon, Onorab Romain e Onorab Phillip Arissol ki fer sa 5 Manm lo Komite ki nou annan.

Nou'n fer rankont Mr Speaker, pandan ki bann pozisyon ti ganny konfirman par Madanm Clerk. E swivan sa, mwan mon ti *take over*

pour mwan fer pour Vis-Chairperson.

Nou'n asize e sey vwar en pti pe Mr Speaker, lo ki mannyer nou kapab perform sa travay dan tou transparans ek senserite, pour nou fer sir ki nou kapab rann en rapor avek Lasanble lo nou travay an referans avek sa.

Nou'n esey detay en *Terms of Reference* ki nou pe soumet avek Lasanble pour zot vwar e dir nou kote ki i annan lamannman ki zot santi i bezwen ganny fer. Ou si non sa, pour zot aprouv sa *Terms of Reference*.

Mon pou pas lo sa *Terms of Reference* pour benefis piblik ki a lekout. *Terms of Reference of the Committee on Declaration of Assets by Members of the National Assembly*.

Role and Purpose of the Committee.

'Purpose of the Committee'; *"The Declaration of Assets Committee is a Select Committee constituted by resolution of the National Assembly, following the approval of a Motion in the House.*

The Committee has been mandated to investigate issues to non-compliance by Members of the National Assembly (MNAs) with the legal requirements for the declaration of assets.

The Committee has been given a period of 30 days from the date of approval of its TOR to complete its work and submit a report to the House".

An prenon kont sa purpose of the Committee Mr Speaker, e nou nou'n vwar ki poudir nou kapab fer sa travay dan en dele letan ki mwens annefe ki 30 zour.

Si nou donn notis sa bann dimoun ki pou vini e nou fer sa travay, nou kapab rann rapor avan ki Lasanble i termin son travay an Out.

"Tasks of the Committee".
"The Committee shall undertake the following tasks;

- Investigate whether any Member of the National Assembly has failed to declare their assets in accordance with the Declaration of Assets laws;*
- Examine any actions that have been taken in response to such instances of non-compliance, if any;*
- Formulate and present recommendations, where appropriate, to ensure compliance by Members of the National Assembly with asset declaration requirements.*

Further to the information received, the Committee shall;

- Determine any implications to the National Assembly in terms of its image and reputation, and on its privileges and the privileges of its Members.*

- *Request, received and consider any statement from any Member in relation to any violation.*

- *Determine what measures, if any, may be taken under the authority of the National Assembly.*

The Committee shall be composed of 7 Members.

- *Five Members from the majority party and*

- *Two Members from the Opposition, US”.*

Me selman i nesaser ki nou fer resorti, parey sa enn Komite ki fek ganny nominen, nou bann koleg US zot in swazir pour zot pa partisip dan sa Komite. Alors, nou Komite i konstitye avek 5 Manm.

Be selman par lefe ki i annan 2 lezot pozisyon, nou pe konsidere pour nou fer nou travay en pti pe pli vit. Nou ava pran sa lot 2 plas ki *vacant*, so nou ava met ankor 2 Manm LDS lo la e *Chief Whip* i ava fer sa nominasyon, mon mazin en apre ki nou fini la.

‘Quorum’.

“The quorum shall be four (4) Members”. So nou'n kit *quorum* parey striktir i donn nou dan ki mannyer Komite i devret ganny formen e fonksyonnen.

‘Decisions and report’.
“Decisions shall be by consensus as far as possible, or in the case of a lack of consensus, by majority vote.

Conclusions of the Committee shall be contained in its report.

So sa rapor nou pou donn Lasanble apre.

‘Other matters’.

“Any other point of procedure shall be according to the NAS Rules of Procedure for Committees”.

Mr Speaker, se sa TOR ki mon pe soumet avek Lasanble. Mon ava aret la e mon ava permet lezot Manm ki annan kontribisyon pou fer. Apre dan mon *summing up* mon ava fer mon konklizyon. Mersi Mr Speaker.

MR SPEAKER

Mersi. Onorab Phillip Arissol in lev lanmen pou entervenir?

HON PHILLIP ARISSOL

Mersi Mr Speaker. Bonn apre midi Mr Speaker, tou mon bann koleg Onorab.

Mr Speaker, mon pran laparol ozordi pou demann tou Manm Lasanble zot aprouvasyon Term Referans pour sa Komite Selektif lo Deklarasyon Bann Byen par bann Manm sa Lasanble.

Mr Speaker, ozordi nou pe koz lo en zafer ki depas ordiner. Enn ki al o fondasyon menm konfyans piblik lo ki nou bann Lenstitisyon Demokratik i baze. I konsern responsabilite, senserite ki Lepep in met dan nou.

Notaman, pou fer Lalwa pou gid avek bon gouvènanans e pou demontre bann valè ki nou swete lezot i swiv.

Ler en sitwayen i elekte nou, zot pa zis donn nou pouvwar. Zot donn nou konfyans pou reprezant zot e zot lèntèrè avek dinyite, lèntegritè.

Sa konfyans pa en keksoz ki nou kapab pran li a la lezer. I devret ganny prezève avek respe e ranforsi par bann aksyon ki montre ki nou bann prensip demokratik i ganny met an pratik.

Se par sa konfyans ki demokrasi i vivan. E se par li ki nou bann desizyon i ganny lezitimite. Se atèrè transparans, responsabiltè ek *leadership* ki baze lo legzanp, ki nou pou kapab mentèni sa konfyans solid ki Lepep i annan dan nou.

Tou aksyon ki nou pran dan Lasanble i devret reflekte sa nivo lèntegritè ki sitwayen i ekspekte. Nou pa zis ansar pou fer Lalwa. Me nou reprezant bann valè ki fer demokrasi fonksyonnen. Se par nou prop konpòtman ki nou pou montre si nou mèrit sa konfyans.

Sa Komite propoze pa pe ganny formen pou target person. Oubyen pou fer lezot mazin mal lo zot. In ganny formen pou asir respe Lalwa.

Lalwa ki nou koman Manm Lasanble nou oblize respekte.

E Mr Speaker, deklarasyon nou bann byen i pa en senbol. I en lobligasyon legal. E pli enportan ankòr, enn moral. I enn ki deklarasyon lèntegritè, transparans e rann kont.

Bann Term Referans devan zot ozordi i kler e i konsantre Komite pou fer lenvestigasyon si okenn Manm Lasanble Nasyonal pa'n deklar zot bann byen dapre Lalwa Deklarasyon Byen.

Egzamin bann aksyon ki'n ganny pran an repons avek sa bann ka kot zot pa'n swiv Lalwa si i annan.

Formil e prezant bann rekomandasyon kot i apòpriye, pou asirè ki bann Manm Lasanble i respekte zot lobligasyon pou deklar zot byen.

An plis, Komite pou osi evalye bann lefe pli larz ki bann vyolasyon i kapab annan lo zimaz Lasanble. Lo bann privèlèz nou annan e lo konfyans piblik dan nou travay.

Komite pou konpoze par 7 Manm; 5 sorti dan Parti Mazoriter e 2 sorti dan Lopozisyon, pou asirè reprezantasyon ek balans. I pou fonksyonnen avek lazistis, gide par konsansis kot i posib. E par desizyon mazoriter kot i nesèser. I pou remet son rapor

dan Lasanble dan en dele 30 zour.

Ler nou reste silansye oubyen pa pran okenn aksyon dan ka kot Manm pa'n respekte son lobligasyon, setadir deklarasyon zot byen, nou pe anvoy en mesaz ki i kapab annan move lefe lo lafason ki sitwayen i war nou.

Si silans i kapab fer dimoun krwar ki bann Manm Lasanble i krwar zot par lao Lalwa, e ki zot pa pare pou met zot prop lekòr dan menm standar ki zot met lezot, i kapab kree dout dan lespri Lepep e redwir konfyans ki zot in mete dan nou.

Bann Manm Onorab, sa i pa zis en kesyon legal. i en kesyon moral. I konsern dinyite menm nou lenstitisyon. Alor, nou pa kapab les sa kalite mesaz pase san repons.

Nou bezwen montre par aksyon klèman ki nou responsab pou rann kont i aplik pou tou dimoun egalman, enkli nou menm.

Par aprouv sa Term Referans, nou afirm nou lobligasyon pou transparans. E nou montre ki sa Lasanble i kapab fer respekte li menm avek dinyite ek lazistis. Alors, mon demann tou Manm pou rapòrt zot sipòr pou aprouv sa Term Referans. Mersi.

MR SPEAKER

Mersi Onorab. Segonder Mosyon, Onorab Naidu pou adres Mosyon li?

HON SATHYA NAIDU

Mersi Mr Speaker. An referans avek Mosyon anmennen par Onorab Andre, i swiv Mosyon ki Onorab Gervais Henrie ti'n anmennen pa tro bokou letan pase, kot Lasanble, lo sa kote latab in donn son laprouvasyon pou fer sir ki nou fer sa swivi ki Mosyon in demande.

E zisteman sa se pour nou regard lo en nivo pli profon an sa ki konsern sa size deklarasyon bann byen ki pa'n ganny fer par serten Manm.

E pour nou kapab regarde ki mannyer eski nou kapab etabli pli meyer standar posib koman en lenstitisyon.

E pour nou kapab pran en pe leson baze lo travay, zisteman ki sa Komite pou fer atraver son TOR, ki Loter Mosyon Onorab Andre in donn tou detay neser.

Pou fer sir ki piblik Seselwa osi ki pe swiv de pre bann devlopman an sa ki konsern Lasanble, i okouran vizavi manda ki sa Komite pou annan. E pour li kapab deservi son responsab pandan 30 zour.

Zisteman konpozisyon Komite i 5 Manm. In annan en demann vizavi lo kote bann

Manm Lopozişyon pou form par sa prosesis.

Me zisteman zot, zot in eksprim zot pozisyon vizavi kreasyon sa Komite depi o komansman ler Mosyon inisyal ki ti'n ganny anmennen dan sa size, lo sa size ti'n ganny prezante.

E zisteman, i reste pour nou – nou'n deza konmans sa travay pour nou fer bann diskisyon inisyal pour nou kapab regarde anba ki gidans eski nou, nou pou travay.

E normalman bann Komite ler i pe deservi son fonksyon, i vin avek son *TOR*. So, vi ki Loter Mosyon in pas an detay mo, par mo, *bullet point after bullet point* pou kapab fer sir ki Lepep Seselwa i okouran vizavi manda sa Komite, mon krwar le lesansyel in ganny fer.

E mon swe se ki atraver sa travay nou ava etabli pli meyer standar posib konman en lenstitisyon, pour nou fer sir ki nou konman en lorganizasyon e nou konman bann Manm Lasanble, ler nou pe deservi nou responsabilite, espesyalman ler nou pe pas bann Lalwa konman Brans Lezislatif, nou osi nou respekte Lalwa e nou fer le lesansyel. Mersi Mr Speaker.

MR SPEAKER

Mersi. Napa lot Manm ki'n lev lanmen. Onorab Pillay, wi?

HON SEBASTIEN PILLAY

Mersi Mr Speaker e bonn apre midi. E bonn apre midi tou koleg Onorab ki isi prezan. E bonn apre midi tou dimoun ki pe swiv Lasanble Nasyonal ozordi apre midi.

Mr Speaker i – ozordi apre midi, e malgre nou'n ganny en lensidan trazik Dimans.

Mon ti a kontan premyerman par sezi loportinite pou remersi – remersye lo mon par e lo lapar nou parti, tou nou bann siporter aktivis e tou lezot dimoun ki'n desann pou zwenn nou dan nou gran manifestasyon Dimans le 20 Zilyet kot *Mini Stadium*.

E an byen, ki mal, me eseye en pti pe pli gran ki en *court*. So, nou'n kapab anmenn en gran group Seselwa ansanm, reini avek en sel bi. En sel lespwar. E sa se pou retir *LDS* o pouvwar dan eleksyon ki pe vini le 27 Septanm, 2025.

Avek sa, mon ti a kontan demann mon bann koleg isi pou aklanm tou nou bann siporter ki'n vini e remersi zot.

(APPLAUSE)

HON SEBASTIEN PILLAY

Mon le osi Mr Speaker, remersi tou dimoun ki'n swiv nou –

MR SPEAKER

Avans lo Mosyon silvouple Onorab.

(Interruptions)

HON SEBASTIEN PILLAY

Be ou, ou napa naryen pou dir.

MR SPEAKER

Avans lo Mosyon. Lasanble pa en landrwa pou kontiny en *rally*. Lasanble i annan son biznes devan li.

(Interruptions)

MR SPEAKER

Avans lo Mosyon.

(Interruptions)

MR SPEAKER

Mon permet – mon permet en komanter koumsa ant, akòz sa i en size – i en Lasanble politik. I en *forum* politik.

So en komanter koumsa mon kapab permet, parey ou'n fer dan konmansman. Me selman i annan Mosyon lo latib, e sa ki ou bezwen adrese.

(Interruptions)

HON SEBASTIEN PILLAY

Mon swiv ou konsey Mr Speaker. Mon ti pe al zis remersi tou bann dimoun ki'n

swiv lo rezo sosyal. E in annan plizyer milye zot. E in ariv plis ki 40mil dimoun ki'n *actually* swiv. Alor se -

(APPLAUSE)

HON SEBASTIEN PILLAY

I tre, tre byen. E aneife i annan en *speech* ki Onorab Lemiel ti pe fer. I annan 48mil dimoun ki'n -

MR SPEAKER

Onorab, si ou pa avans lo Mosyon mon pe pran mikro. Nou pe kontinyen.

(Interruptions)

HON SEBASTIEN PILLAY

Mersi Mr Speaker. I pa mon lentansyon fer personn ankoler.

Bon, lo Mosyon mon ti a kontan ki konman en Lasanble Nasyonal, nou reflesir vreman lo sa ki nou pe fer ozordi apre midi. E konsider kot nou'n arive ozordi konman en Lasanble.

Deor devan laport Lasanble nou annan en *statement* ki'n mete par lao nou larantre. E nou'n dir “*Serving a Modern Democracy*”.

E en *modern democracy* i mars on the rule of law. E *what is the rule of law? The rule of law as established* - konman in ganny etabli anba bann

premier egal e Lalwa. Atraver bann determinasyon ki Lakour in donnen e ki mannyer nou bezwen swiv.

Akoz Lasanble Nasyonal apre tou i napa drwa pour li *act* an deor son manda ki li in gannye anba Konstitisyon.

Ler mon regard sa Mosyon pour sa TOR Mr Speaker – e i en gran koensidans. E mon koleg Onorab Andre ki pe *Chair* sa menm Komite.

Mon mazin Komite Anti Viktimizasyon ki ti formen dan 6enm Lasanble Nasyonal. E ler mon regard son TOR e son premis, i menm zafer. Menm keksoz. Menm kalite standar.

E la mon retourn kot en zizman Lakour Siprenm. En Lakour Konstitisyonnel ki ti deklar Komite Anti Viktimizasyon Anti-Konstitisyonnel.

(APPLAUSE)

HON SEBASTIEN PILLAY

Me, Lasanble Nasyonal dan son gran sazes li in konpletman disregard sa zizman Lakour Konstitisyonnel lo Komite Anti Viktimizasyon ki mon koleg Onorab Andre ti *Chair*.

E in vin ek en menm Mosyon. ou ava koriz mwan - Ou ti *Vice-Chair*, oubyen ou ti *Chair*. Me selman ou ti

involved. Ou ava koriz mwan Onorab.

E dan son gran sazes Lasanble Nasyonal li, i retourn avek en *Terms of Reference*. E la ou a permet mwan Mr Speaker, aköz mon annan sa 2 *Terms of Reference* mon pe regarde. Ekrir par *no less than* nou Speaker Lasanble Nasyonal, ki'n ganny donnen avek sa Komite. E i lir preski parey.

Sa i enteresan pour Lepep ki la deor konpran sa. Se Speaker ki'n labaz *Terms of Reference* Komite lo *Declaration of Assets*. Speaker Lasanble.

Prezan nou – mwan mon bezwen demann mon lekor. Ler mon pe dir - pa ou. Mon pa *mean* Mr Mancienne - mon *mean* Speaker.

Mon bezwen demann mon lekor be; i menm dimoun ki'n osi donn mwan resi pour peyman aktivite LDS ki'n ganny *sponsor* par *Friedrich Naumann Foundation*.

E sel kestyon ki vin dan mon lespri se; ki degre transparan, ki degre non-partizan en Komite ki *former Leader LDS*, ki mon krwar i *current Leader LDS* in donn li son *Terms of Reference*?

Ki'n ganny war par en Lakour Presedaman an relasyon ek en menm Komite Lasanble ki ti pe pran en pouvwar krwaz zidisyer, ilegal

anver Konstitisyon. E *still* nou'n *proceed* pou fer sa Komite.

Prezan, nou vin lo ki sa Komite i sipoze fer konman son determinasyon. E la i anmenn nou pou regard Lalwa Komisyon Anti-Koripsyon e son Komisyoner. Ki li menm li i vin Komisyoner pour Deklarasyon Asset.

E Lalwa pour Deklarasyon Asset ki kler ki sa antite i annan pouvwar legal anba son Lalwa pour li determinen si en dimoun in komet fot an relasyon ek sa deklarasyon. Ki fot...?

Nou pa'n ganny okenn let oubyen dokimantasyon ofisyel sorti kot sa Komisyon ki'n vin devan Lasanble, ki annan pouvwar legal pou fer en tel lenvestigasyon. Me selman Lasanble Nasyonal pe al fer en lenvestigasyon.

E sa ki pli enteresan ankor se ki anba son Lalwa, sa Komisyon i sipoze *act* dan en fason konpletman endepandan san kontrol oubyen direksyon okenn antite.

So kestyon ki mon demann mon lekor se; eski Speaker Lasanble Nasyonal atraver sa Komite ki i pe kree i le al kontrol Komisyon-Anti Koripsyon?

Eski Speaker Lasanble Nasyonal atraver son *Caucus* dan Lasanble Nasyonal i le al

kontrol Komisyoner Deklarasyon Asset?

Akoz ler nou regard bann propo ki'n ganny mete dan sa *Terms of Reference*, ok, i pou al rod *relevant and available information from the Anti-Corruption Commission*. Sa i en *breach*! I en *breach* Lalwa *Anti-Corruption Commission*.

It is illegal for the Assembly to compel documents an relasyon ek en investigation of the Anti-Corruption Commission. Akoz, *Anti-Corruption Commission* i annan *judicial power*. I annan pouvwar pour *secretarial*, *sorry*.

Ki drwa ki nou, nou annan pour nou fer sa? Ki mannyer nou, nou kapab kas Lalwa Komisyon Anti-Koripsyon ki dir ki sa Komisyon pou *act* endepandan dan son fonksyon e nou ki pou al fer son fonksyon?

Be *then* annou pran rol Anti-Koripsyon. E annou konmans fer bann lenvestigasyon Anti-Koripsyon. Premye propo, nou tonbe.

Prezan get kot i enteresan. Si ou retourn anler i dir ou; Konpozisyon Komite *shall be*". I devret! I devret 7! E ki i devret dan sa 7? I devret 4 Manm *LDS*. I devret 4 Manm *LDS*. *Sorry*, 5 Manm *LDS* e i devret 2 Manm *US*. I devret 2 Manm *US*.

Ki sa zistwar ki *LDS* pou konpoz Komite avek 2 Manm ki pou ranplas 2 Manm *US*, kan li son prop *Terms of Reference* i dir ki i devret?

Ankor enn fwa zot kas – zot fer Lalwa e zot kas zot prop Lalwa. I pa mon ki dir. I devret. I “*shall*”! Tou Komite Lasanble i devret par son konpozisyon ganny konpoze par lafors politik. Si nou, nou pa le pran par, zot *go ahead* avek zot 5.

Eski ou konman Speaker ki sipoze protez *Standing Order* ou pa anvi protez *Standing Order* e protez nou minorite?

Ou pa *care* si *Standing Order* i ganny vyole akòz ou anvi war en Manm *US* koupab, pou fer politik bon marse avek? *Is that what this Assembly has come down to?*

Nou pe ganny *dragged into* en – dan en rigol. E sa pe ganny les arive par menm bann dimoun ki *Chair* Lasanble ozordi e personn pa le dir zot naryen.

MR SPEAKER

Onorab, mon pa anvi war okenn Manm koupab. Lasanble in fer son – Komite in fer son *Terms of Reference* e i pa ankor war okenn Manm koupab. E mwan mon pa anvi war okenn Manm koupab. Alor, pa akiz Speaker. Pa akiz Speaker.

(Interruptions)

HON SEBASTIEN PILLAY

Mersi. Piblik i a note ki kantite fwa mon mikro i ganny koupe –

MR SPEAKER

Wi. akòz – akòz sa ki ou dir pa annord.

(Interruptions)

HON SEBASTIEN PILLAY

Nou a war nou. Dimoun ki ekoute deor i konnen li. Zot pou remarke zot.

E mon pou kontinyen prezan akòz mon pou pas dan sak morso sa *Terms of Reference* ki zot in met devan nou, pou eksplik Lepep Seselwa egzakteman ki zot, zot le fer. Egzakteman!

Now, ler Lakour ti determinen ki Komite Anti-Viktimizasyon Lasanble Nasyonal napa drwa pou pran pouvwar krwaz zidisyer, ti annan en rezon akòz i ti dir sa.

Se ki, pouvwar Lasanble Nasyonal i ganny *enshrine* dan Konstitisyon. E menm si i konpoz bann Komite e i annan drwa, sa bann Komite i annan drwa pou pran pou *compel recital documents*.

I napa drwa pour li fer determinasyon si en Lalwa in fini donn en antite pouvwar pou fer sa determinasyon. Ou

pa bezwen en Avoka pou vin konpran sa.

Nou'n toultan ganny dir pou dir Komisyon Anti-Koripsyon i travay san lenterferans personn. Eski zot pe dir nou ozordi dan sa Lasanble - *LDS*, Mazorite *LDS* ki zot enterfer dan travay Komisyon Anti-Koripsyon?

E eski zot pe dir nou se sa kalite Sesel ki zot oule kot zot anvi enterfer dan lenstitisyon Leta ki egziste? Be si sa i leka, *then* nou annan en problem serye dan Lasanble. Nou annan en problem serye dan nou pei Mr Speaker.

Nou deba ozordi i baze lo en *Terms of Reference* ki nou lo sa kote latab nou santi i ilegal vizavi sa ki'n ganny determinen an relasyon ek travay ki nou sipoze fer.

Si Lasanble Nasyonal ti serye dan sa domenn, *then* i ti ava'n fer sir poudir i rod son lenformasyon ek ACCS. Ou pa'n zanmen konman Speaker – e la mon pa pe met okenn propo mal, propo mal ki pa apropiye kont ou.

Ou pa'n zanmen *provide* nou avek levidans ki i annan sa kantite Manm. Oubyen sa bann Manm pa'n deklar zot *asset*. Ou pa'n zanmen *provide* nou ek sa.

Akoz ou'n dir pou dir ler en Mosyon i pas tes admisibilite, ou bezwen *provide* lenformasyon sa

Mosyon. Mwan ou'n deza demann mwan pou *provide* lenformasyon pour mon Mosyon.

Ou deza demann mwan lenformasyon pour kestyon ki mon anmennen dan Lasanble. Savedir sa i aplik zis pour mwan, i pa aplik pour kote *LDS*?

E prezan sel keksoz ki zot pou vin dir zot pou vin dir tousala lo la? Get ki zot dir zot pou fer?

To undertake – ler ou ti dir ou ti dir “*to undertake the above, the Committee shall seek relevant and available information from the Anti-Corruption Commission*”.

Under what law? Anba ki Lalwa ou pou sipoze *seek* sa lenformasyon? Menm si Konstitisyon i donn serten Komite Lasanble pouvwar zidisyer pou *compel the – documents*.

National Assembly (Privileges and Immunities) Act i dir ki kalite dokiman nou kapab *compel receipt of*. Anba *what law?* Si sa Komisyon i annan pouvwar anba son Lalwa pou *act independently*.

E ki zot bann lenformasyon ki ou ti le rode ou? Ou, ou *Terms of Reference* ki ou ti ekrir sa ki'n vin la baz sa enn.

“Whether any Members have been or are in violation, if any, which Members the extent

of any violations". Prezan sa ki enteresan, ou dir "*if any, if Members*". Selman Mosyon ti dir pou dir i annan 4 Manm ki pa'n deklar *asset*.

Ki mannyer "*if any, if Members*", selman Mosyon ti dir 4 Manm? Mon pa ganny en konpran ki mannyer zot aziste le 2 la.

E ou al pli lwen. "*any actions which have been taken by any Member to address non-compliance*". This is a violation of the Members privilege anba Lalwa. Lalwa ki a determinen si in pran son aksyon oubyen non. Pa nou.

E Komisyon Anti-Koripsyon i ava amenn son aksyon kont li anba son Lalwa, *as it is the case. As the case should be* si i fer en fot.

Nou pa kapab pran rol en antite ki'n ganny son rol anba Lalwa, son manda legal anba Lalwa pou pran son aksyon e ekspekte poudir sa i normal. Pa akòz zot annan en mazorite ki sa i permet zot pou fer sa. I pou mal Mr Speaker.

E ler mon regard sa 2 versyon, i paret sa ki ou ou'n prepare in vin versyon ki'n vin ganny prezante dan Lasanble labaz. So, teknikman se Speaker ki'n ekrir *Terms of Reference* pour sa Komite.

"Determine" – annou retournen. "*further information received, the Committee shall request, receive* lenformasyon.

"Determine any implications to the National Assembly in terms of its image and reputation, and on its privileges and the privileges of its Members.

Sa Komite pou al determinen ki fot sa bann Manm in fer. Me kan i annan Manm ki'n fer fot dan sa Lasanble ki'n ganny met lo rikord. Sa ou pa'n pare pou dil avek? Sa nou les pase akòz i konsern Manm ki involve, LDS?

This is a political witch hunt dan sa Lasanble *aided and abetted by* sa Lasanble Nasyonal, zisteman pou fer ditor Manm lo sa kote lata. b.

Akòz? Akòz nou ti anmenn en Mosyon pou *challenge* zot lo desizyon ki zot ti pran pou retir deklarasyon *asset* bann spouse e zanfan bann politisyen. Ki ozordi zot pe zwir e kasyet anba la. Sa rezon sa in arive.

E zot pou vin fer nou krwar lizour pour aswar. E fer nou krwar poudir sa ki zot pe fer ozordi i dan lentere Lasanble Nasyonal. Dan lentere limaz Lasanble Nasyonal.

I annan dimoun i al fer *commitment* lo non Lasanble Nasyonal. *Tarnish the image and the reputation of* Lasanble Nasyonal. Ou still pa pare pou dil avek. Zanmen i vre. Zanmen in arive.

Ou, ou a ganny sispann si ou dir en keksoz la anndan. Zot a dir sa ki zot anvi. Fer sa ki zot anvi. Sispann pa aplikab pour zot. Zot annan en problem dan sa Lasanble. En problem serye ki nou bezwen adrese.

Prezan i kontinyen i dir; *“Determine what measures, if any, may be taken under the authority of the National Assembly, and propose any action which may be appropriate.” Who are you?*

You are not – zot pa *the Commissioner*. Zot pa sa dimoun ki ansarz en *Public Officers’ Ethics Commission*. I pa zot responsabilite. Zot menm ki ti pas Lalwa an mazorite pou donn sa madanm sa bann pouvwar ki in ganny ozordi.

Zot pas Lalwa e zot vir par deryer zot kas zot menm Lalwa. Apre vin dir nou koumsa poudir nou bezwen form par en *charade* kont nou Manm. En *witch hunt* kont nou Manm, zis aköz zot anvi fer *political persecution* dan sa Lasanble.

Be si zot dir pou dir i annan ki ti met zot dan prizon lontan. *You are no much worse* ki sa bann dimoun. Zot egzakteman parey ozordi sa ki zot pe fer ek nou bann Manm!

(APPLAUSE)

HON SEBASTIEN PILLAY

In fact, si listwar in montre nou en keksoz se ki souvandfwa dimoun ki plenny zot lekor konman viktim, zot vin bann *perpetrators of* bann aksyon ki zot menm zot, zot in anvi fer kont dimoun.

I montre revanz e i montre ki kalite pei nou annan ozordi. Malis. Aköz, nou anvi fer dimoun ditor pour sa ki'n arive, mon pa konnen depi kan. Non, be les li, nou a pey lepokase. Nou a peye, i *ok*. Nou ledo i larz nou, i *ok*.

Be selman i pa vedir ki nou reste trankil e les zot fer sa ki zot anvi, san ki nou dir zot sa ki nou, nou panse. E nou, nou krwar poudir sa ki pe arive ozordi apre midi i en *travesty*. I en vyolasyon sa ki nou reprezante konman en Lasanble Nasyonal.

Semenn pase nou ti ganny en Mosyon lo *Maison Du Peuple*. E ankör enn fwa, mon'n war bomaten e la taler zot in koz lo konpozisyon en tel Komite.

Irespektiv tou sa ki'n ganny dir atraver sa Mosyon, mon demann zot pou anmenn ankör enn parey. Aköz *next* aktivite ki nou pou fer ler zot anmenn zot menm Mosyon, i pou ed nou ankör anmenn plis dimoun dan nou bann aktivite.

(APPLAUSE)

HON SEBASTIEN PILLAY

Akoz sa i montre kouler e degre - konpasyon e degre – ki mannyer ou kapab dir sa? Degre demokratik zot ete ozordi konman en parti. Sa i montre nou sa Mr Speaker.

E avek tou sa ki pe arive otour nou ozordi, se sa ki nou le al pas sa bann letan ki Lasanble Nasyonal i annan ki reste nou pour nou fer. *Political witch hunt* zis pour nou kapab pini nou bann oponan. Be sa i mal. Nou annan en problem.

E nou, nou sipoze konman en parti dan sa Lasanble, malgre nou an minorite, zis les zot fer sa ki zot anvi. Mars lo nou.

Be mwan mon annan en nouvel pour zot, en. Ozordi se nou minorite ki reprezant mazorite Seselwa!

(APPLAUSE)

HON SEBASTIEN PILLAY

Se nou ozordi ki pare pou koz lo *sore* Seselwa lo sa ki pe arive. Par egzanp – mon a donn ou en legzanp Mr Speaker.

La dan labe Beau Vallon zot le fouy disab. Zot le met *aquaculture*, eski nou'n tann MNA LDS koz lo la? Non!

(APPLAUSE)

HON SEBASTIEN PILLAY

Mwan ki pe koz lo la ozordi pou dir, pa detri *livelihood* sa bann *dive centre*. Pa detri *livelihood* sa bann peser dan sa rezyon. Eski i pe koz lo la? Non! Zot in per pou *challenge* zot prop Gouvernman Mr Speaker.

Prezan zot a vin koz nou - zot a vin koz nou la demokrasi. Zot a vin koz nou laliberte. Sa ki nou pe fer apre midi ozordi Mr Speaker i reprezant en regresyon dan la demokrasi Sesel.

(APPLAUSE)

HON SEBASTIEN PILLAY

I reprezant en regresyon dan lafason ki Sesel ti'n devlope an sa ki konsern politik.

Sa lenterferans direk ki zot pe fer la, atraver bann lenstitisyon Leta la, pou kout zot ser sa. I pou kout zot ser. Akoz Seselwa in realize poudir zot pa pare zot pou fer sa ki byen.

Dan plas annou koz lo donn travayer PUC son bonous, zot pa kapab vin fer sa. Dan plas annou koz lo travayer STC son bonous, zot pa kapab vin fer sa. Dan plas annou koz lo donn *teachers* zot *long service*. Zot pa kapab vin fer sa.

Non. Ki zot le fer? *Witch hunt* pou war lekel Manm ki pa'n deklar isi, ki pa'n deklar

laba, kan i annan en antite ki sipoze fer son louveraz lo sa size. *This is what you want to do.*

Nou pa kapab pran nou priyorite. Nou priyorite se dil avek sa ki Seselwa pe rankontre. Pa nou'n dir nou met larzan dan pos Seselwa. Annou met larzan. *In fact*, annou rann Seselwa son pos ki zot in pran depi 2020.

(APPLAUSE)

HON SEBASTIEN PILLAY

Annou arete zis vin fer politik bon marse *for the sake of politics*, kan nou annan lezot keksoz ki pe fer –

Get Mosyon. E sa i enteresan Mr Speaker. Piblik i bezwen konnen sa. Sa Mosyon in pas par devan Mosyon Onorab Uranie, ki ti lir koumsa;

“Lasanble Nasyonal Sesel, i demann Gouvernman pou met an plas en program reabilitasyon konpreansiv pou ede tir nou lafors travayer zenn dan adiksyon e sa i ava soulaz lafanmir Seselwa”.

Nou'n vwar poudir sa en Mosyon pa sitan enportan ki sa enn ki la. E nou'n met sa enn avan li. Sa i degre lenportans ki *LDS* i atase avek zot pep Seselwa la deor.

Sa i degre lenportans ki *LDS* i atase avek *sore* Seselwa la deor. E zot dir nou poudir

zot pe travay pour tou Seselwa? I enkrwayab sa Mr Speaker.

Get lot Mosyon ki annan lo *Order Paper*. Onorab Audrey Vidot; “Nou Lasanble Nasyonal pe demann Gouvernman pou met an plas en striktir kordinasyon Nasyonal, ant bann diferan program egzistan, pou asire ki bann zenn Seselwa, ki kapab, e ki anvi travay, i a kapab fer sa tranzisyon pou antre dan lanplwa menm si zot napa leksperyans”.

Sa i en Mosyon. *First time voter* selman zot konn anmenn *Canopy*. Zot le anmenn sepa ki bor. Zot le anmenn *L'Escale*. Selman zot pa le rod travay pour en *first time voter* Mr Speaker? zot fer onte Mr Speaker!

(APPLAUSE)

HON SEBASTIEN PILLAY

Zot fer onte. Dan plas – dan plas zis vin fer sa bann zenn bwar, manze. Olye koz lo sa *sore* sa bann zenn parey Onorab Vidot i le fer. Ki zot fer? Anmenn sa bann zenn pou zwenn – ki zot in dir? *Meet and great* ek Prezidan! Sanmenm sa Mr Speaker, ki zot problem zot.

(Interruptions)

HON SEBASTIEN PILLAY

Zot napa en plan. Zot pe sey bat latet dimoun depi bomaten ziska aswar. Sa i zot lekspektasyon ki dimoun pa pou war laverite deryer sa ki zot pe fer.

MR SPEAKER

Konklir Onorab.

HON SEBASTIEN PILLAY

Wi, be avan mon konklir dir zot reste trankil.

(Interruptions)

MR SPEAKER

Konklir silvouple.

HON SEBASTIEN PILLAY

Ou pa pou dir zot reste trankil. I *ok* sa?

(Interruption)s

HON SEBASTIEN PILLAY

Mon pe montre piblik ki mannyer ou fer. I neserer sa. Pour nou war konmsi ki mannyer dan sa Lasanble nou, nou ganny trete. E ki mannyer zot, zot ganny trete.

Zot in koze zot. Person lo sa kote pa'n dir naryen. Zis ler nou, nou koze zot fer tapaz.

Mwan mon pe dir Mr Speaker, ki sa Mosyon ki devan Lasanble ozordi ki konsern en *Terms of Reference* ki ou ou'n donn lanmen ekrire, i en Mosyon ki en regresyon pour demokrasi Seselwa.

I en Mosyon ki al ver ilegalite e ki pa respe sa ki Lasanble Nasyonal i reprezante Mr Speaker. E sa se pou *serve en modern democracy*.

(APPLAUSE)

HON SEBASTIEN PILLAY

E mon regrete. Mon regrete Mr Speaker, ki malgre nou lo sa kote latab nou pare pou les listwar ed nou pa repet bann fot lepase. *LDS* in pri dan lepase e pou repet tou fot lepase. Mersi Mr Speaker.

(APPLAUSE)

MR SPEAKER

Mersi. Mon pou donn Manm ki pou koze 10 minit *maximum*. Onorab Woodcock, ou'n demann laparol.

HON WAVEL WOODCOCK

Mersi Mr Speaker. Mr Speaker, si ou war nou konman en Parti *LDS* nou anmenn nou bann zenn *Canopy, L'Escale or Le Duc De Praslin*, se aköz nou valoriz nou bann lenz – nou bann zenn.

Pa parey zot Mr Speaker, kot zot ti anvi anvoy nou bann zenn al netway *bin site* al tir salte. Zot prop parol Mr Speaker. Pa nou parol. Mr Speaker-

MR SPEAKER

Mon a demann ou pou retourn lo Mosyon.

HON WAVEL WOODCOCK

Si ou war en tel – en tel Mosyon devan nou Lasanble ozordi pour nou kree en Komite ki pou *investigate* bann Manm ki pa'n deklar zot *asset* Mr Speaker, se aköz – pou fer lenvestigasyon, se aköz – Aköz, Mr Speaker? Mon a demann sa keston Lopozisyon.

Si zot tou, zot ti admet zot menm, bann ki pa'n deklar zot *asset*. Si zot ti'n deklar zot *asset* Mr Speaker, eski ti pou annan en nesesite pou etabli en tel Komite, Mr Speaker?

Eski nou ti pou bezwen ozordi pe diskite en *Terms of Reference* pour nou *investigate*, fer lenvestigasyon lo bann Manm ki pa'n deklar zot *asset* Mr Speaker?

Mr Speaker, sa ki nou pe war ozordi se lipokrizi dan tou son splander. Lasanble Nasyonal anba nou *Standing Order* e anba nou Konstitisyon i fer provizyon e i prerogativ okenn Lasanble Nasyonal pou etabli okenn Komite.

Nou Lasanble i annan sa lotorite, i annan sa pouvwar pou etabli okenn Komite pou fer okenn lenvestigasyon.

Si ou war ozordi sa travay i bezwen ganny fer dan Lasanble Nasyonal – aköz, get

sa Mr Speaker, Lasanble Nasyonal in *pass Public Persons (Declarations of Assets, Liabilities and Business Interests) Act*. Aköz? Pour tou bann *public persons* deklar zot *asset* Mr Speaker.

E nou ki dil legzanp. Nou ki pas Lalwa Mr Speaker. Nou pe demann bann Ziz, bann MNAs, bann Minis, Prezidan, *Cabinet* pou deklar zot *asset*.

Selman nou Manm Lasanble Nasyonal ki'n pas sa Lalwa Mr Speaker, nou pe kas en Lalwa Mr Speaker. Nou pe *go against* en Lalwa ki nou Lasanble in pase Mr Speaker? Ki kalite legzanp nou pe donnen konman en Lasanble Nasyonal? Mr Speaker, sa i pou anmenn nou *institution to disrepute*.

I nou responsabilite konman Manm Lasanble Nasyonal pour nou obzerv e swiv bann Lalwa ki nou menm konman en Lasanble nou'n etabli Mr Speaker.

E i kler. Sa Lalwa ki nou ti pase Mr Speaker, *Declarations of Assets, Public Persons (Declarations of Assets)* i kler poudir i annan bann konsekans pour bann dimoun ki kas Lalwa. E sa ki pe arive ozordi Mr Speaker se en lipokrizi e en lakanmizri.

Ladan menm Mr Speaker, *Leader* Lopozisyon in fer *statement* Mr Speaker, kot in dir pou dir; get sa, Komite

Lasanble i sipoze annan 7 Manm. 5 sorti lo kote *LDS* - 2 sorti lo kote *US*. Selman, se zot ki pe refize Mr Speaker, met zot Manm lo sa Komite. Pa nou.

Akoz ki zot pe refize met zot Manm lo Komite Mr Speaker, konman nou *Standing Order* i fer provizyon pour zot nomin 2 Manm. Mr Speaker, sa i senpleman lakanmizri e en mank responsabilite.

Mr Speaker, *we are not above the law*. Zot pe koz *rule of law*. I aplik pour tou dimoun Mr Speaker. Ler zot ti vini zot ti anmenn zot *Private Members Bill* pou amann sa Lalwa zisteman ki nou pe diskite la. *Public (Declarations of Assets)*, Mr Speaker.

Ti annan Manm lo zot kote latib Mr Speaker, ki ti diskite fortman poudir ban zanfan, bann *public person* i merit deklar zot *asset*.

E sa Manm - enn bann Manm ki ti koz lo la ki'n admet poudir i pa'n deklar son *asset* sete pa lot ki Onorab Egbert Aglae Mr Speaker. Ou pe ziz lezot dimoun, me selman ou, ou pe kas en Lalwa ki'n ganny etabli.

Mr Speaker, annou *être serye* dan sa Lasanble Nasyonal. I nou responsabilite konman bann Manm pou fer sir ki nou swiv bann Lalwa ki devan nou. Sa ki pe arive i

selman en lakanmizri Mr Speaker.

Ozordi *US* Mr Speaker, zot koz zis *mini*. Herminie avek *Mini Stadium*. E zot en parti minoriter Mr Speaker. Zot fer *mini rally*. Zot rasanble dan *United Square*, en *mini square*. Tou keksoz ki zot fer i *mini*. E menm en *mini stadium* Mr Speaker, zot pa'n kapab ranpli Mr Speaker.

(APPLAUSE)

MR SPEAKER

Mosyon Onorab. Mosyon.

HON WAVEL WOODCOCK

E zot pou reste dan zot *mini*. Dan zot Herminie. Menm si ozordi zot pe sey pran en Patrick pou met avek en Pillay pou sey fer en lot Patrick Pillay, Mr Speaker, i pa pou marse Mr Speaker.

(laughter)

HON WAVEL WOODCOCK

I pa pou marse Mr Speaker. Lepep Seselwa i war zot dan gran kler.

Mr Speaker, mwan mon ti pou onte ozordi konman *Leader* Lopozisyon mon Manm – mon Manm lo mon kote latib ki sipoze deklar zot *asset* e swiv Lalwa, donn legzanp Lepep Seselwa.

Ozordi mon vini mon vin lager kont en Komite ki pe

investigate en lenzistis ki'n ganny fer. Mr Speaker, be mwan mon ti pou onte.

Mwan ki mon ti pou fer. *Best thing* ki mon ti pou fer mwan mon dan Lopozisyon, mon ti pou fer en *public apology* avek Lepep Seselwa aköz ki mon Manm pa'n deklar zot *asset*.

E sa bann Manm ki pa'n deklar zot *asset*, olye ki sa *Term of Reference* i vin devan nou Lasanble pour nou diskite. Vin devan dir; Lepep Seselwa, Lasanble, mon prezant en *apology*. Mon pa'n swiv Lalwa. Mon pa'n deklar mon *asset*. Mon prezant en *apology*.

Mon al kot *Electoral Commission*, mon fer tou mon bann nesaser. Mon anmenn mon bann dokiman mon soumet. *Sorry*, devan ACCS. Mon soumet mon bann dokiman. E nou fini avek sa Mr Speaker. Sa ki i montre Mr Speaker, vreman klerman ki mannyer *United Seychelles* i ete.

Prezan, ler zot war zot dan mal, zanmen zot en parti ki pare pou aksepte zot tor. Zis parey bann lenzistis ki zot in fer, met zot kanmarad dan prizon ki ozordi zot dir nou pa pli *worse* ki zot.

Mr Speaker, napa enn antre nou la ki met personn dan prizon. Napa enn antre nou la ki'n viktimiz personn.

Napa enn antre nou la ki'n touy personn. Sa i en tas nwar lo zot parti. Pa manz zot bannann, anvoy zot lapo lo nou.

Ozordi nou pei i en pei ki baze lo *rule of law*. E sa Lalwa ki nou Lasanble in pase. In pase dan Lasanble lepase. Nou'n amande sa lannen. Nou bezwen swiv Lalwa ki devan nou.

Akoz nou en pei, nou en Lasanble ki *believe* dan *Rule of Law*. E nou osi en parti ki krwar dan *rule of law* Mr Speaker.

Annou donn legzanp. Pa rod leskiz. Ler nou fer fot, annou admet nou'n fer fot. Nou tou nou fer fot Mr Speaker. Nou admet. Nou vini. E nou aranze nou rod en fason pou koriz nou fot.

Pa vin fer bann politik bon marse. Bann polemik Mr Speaker, pou sey anbet sa pep deor, konman sa pep i war zot dan gran kler.

Avek sa 2 mo Mr Speaker, mon krwar i enportan pour nou fer sa lenvestigasyon pour nou konnen aköz.

E le rezondet aköz ki annan detrwa bann Manm lo kote latab – ki aköz lo nou kote napa enn ki pa'n deklar zot *asset*. Pour nou konnen aköz ki sa bann Manm pa'n deklar zot *asset* e swiv Lalwa ki nou sipoze obzerve konman bann

Manm Lasanble Nasyonal responsab. Avek sa 2 mo mon dir ou mersi Mr Speaker.

(APPLAUSE)

MR SPEAKER

Mersi. Mon annan 2 Manm ki'n lev lanmen. Eski i annan lezot Manm ki pou lev lanmen?

Onorab Georges. *Ok. So, mon annan sa 3 Manm. Mon pou ferm mon lalis e nou a kontinyen. Onorab Loze, ou annan laparol.*

HON JOHAN LOZE

Mersi Mr Speaker. Mr Speaker, nou komans par etabli en senp keksoz.

Premye keksoz nou bezwen etabli se ki apre le 27 Septanm, Lalwa pou ganny amande pour tou *spouse* ek zanfan politisyen, deklar zot *assets*. Sa i kler. Nou pou amann Lalwa.

Now, swivan lamannman Lalwa, la ki nou pou vwar lenvestigasyon. La ki nou pou etabli ki mannyer in fer pour ki papa ki'n pret larzan zanfan pou aste lakaz. Selman lakaz in ganny peye par en *third party*.

La ki lenvestigasyon pou fouy dan sa bann koripsyon e etabli ki mannyer ki kwa in arive. Se sa ki zot pe sey kasyet zot. Kot in annan bann vre bouldersman. Bann vre

tranzaksyon. Me selman, met sa de kote.

Annou *proceed* Mr Speaker. Mwan mon ti prezan. *Bill* limero 13 pour 2025 *Hazardous Chemicals Bill* in vini. Sa pov PS Matatiken in ganny forse pou tir son *Bill*. E ou konnen ki i ti ganny dir Mr Speaker? *Is your Bill pressing?*

MR SPEAKER

Eskiz mwan.

HON JOHAN LOZE

Because if not, withdraw. We have pressing Bills to pass before the Assembly.

MR SPEAKER

Eskiz mwan Onorab.

HON JOHAN LOZE

Mon pe dir ou sa ki'n deroul devan mwan.

MR SPEAKER

Ou pa pe fer okenn referans avek sa ki'n pas dan Komite, non? Be Mr Speaker, letan Onorab Bistoquet i dir Johan Loze in debout la anndan dan Komite, in dir isi, in dir laba. Eski ou ti demann Onorab Bistoquet –

MR SPEAKER

Non, non, non, non.

HON JOHAN LOZE

-si i pe fer referans ek sa ki'n pas dan Komite?

MR SPEAKER

Onorab, ou pa devret-

HON JOHAN LOZE

Onorab Bistoquet i donn mwan lenpresyon ki sa ki pas dan Komite *is free game!* Parske si Loze *i free game*, nou tou nou bezwen *free game!*

MR SPEAKER

Onorab, mon pa pe *argue* avek ou. Mon pe zis dir ou, si en *matter* in pas dan ou Komite, pa fer referans lo la. Si in pas an deor, ou kapab fer referans lo la.

(Interruptions)

HON JOHAN LOZE

So, i annan en standar ki aplik pour Loze. En lot standar ki aplik pour *LDS*. Konman Loze i koze, i dir laverite - e nou *gag* li. I napa drwa dir. I a dir si in pas deor. Be Mr Speaker, napa *Bill* ozordi. Napa *pressing Bill*.

Nou'n fer *PS* Matatiken anlev son Lalwa al avek, pov pti bet. E ozordi, leskiz ki nou ti donn li ki nou annan *pressing Bills* pou pase. Sa semenn antye napa ni en *Bill*. Ni en bren seve en *Bill*. Ni en plim, ni en swa.

So, ki mannyer nou'n fer sa *PS* fout e malkan ek son *Bill*, selman sa semenn nou napa *Bill* pou travay lo la? Akoz zis -

Mr Speaker, Onorab Doyace Porice silvouple.

(laughter)

HON JOHAN LOZE

Mr Speaker - Mon konn non sa msye Afriken mwan Mr Speaker. Mon pa konnen si i konnen mon konn non sa msye Afriken. Akoz mon pou dir lo *mic* mwan.

(Interruptions)

HON JOHAN LOZE

Sa msye Afriken la. Sa msye Afriken ki ti degraf bann keksoz dimoun la.

(Interruptions)

MR SPEAKER

Order!

HON JOHAN LOZE

Mr Speaker!

MR SPEAKER

Ale! Silvouple, reste kalm, reste trankil, annou ekout deba.

HON JOHAN LOZE

Yes, Mr Speaker. *Asset* ki sa Afriken in degrafe ki zot bezwen deklare.

Mr Speaker, ozordi zot in kree lespas pou vin avek en Mosyon viktimizasyon. E pour zot fer sa zot in bezwen tir travay Gouvernman lo doket

pour sa kote pour zot ganny lespas pou anmenn en Mosyon pou viktimiz Manm *United Seychelles*.

I montre ou ki respe ki zot annan pour zot prop Gouvernman, pour travay zot Gouvernman e pour zot *PS* apwente par zot Prezidan. Sa nivo ki zot, zot ete ozordi. E se pa lot ki *LGB* ki ti fer *PS* Matatiken fout e malkan avek son *Bill*.

Mr Speaker, ozordi nou'n ariv en staz dan sa Lasanble kot lenpresyon ki mwan mon annan se ki zot *LDS* zot annan en gro problemm avek Madanm De Silva. Akoz zot pe regilyerman *undermine* li, kas anba li, e kontradir son travay.

Pourtan. Pourtan, zot annan ase lokipasyon dan zot kan zot. Lokipasyon in anfle avek zot!

(laughter)

HON JOHAN LOZE

Parske menm Manm. Menm Manm ki'n vin en *superstar* pornografi lo nou pei, in mont Letyopi in al sali nou repitasyon. Non selman konman en Lasanble. Me konman en pei an antye.

(APPLAUSE)

HON JOHAN LOZE

Si zot ti'n pran ka avek li depi i ti pe fer *film blue* dan Biro

Gouvernman, i pa ti pou'n monte – i pa ti pou'n monte pour li ale fer sa ki in al fer-

MR SPEAKER

Onorab, lo Mosyon silvouple.

(Interruptions)

HON JOHAN LOZE

Ou Mosyon ki ou ou'n ekrir *TOR* Mr Speaker, i koz lo repitasyon Lasanble Nasyonal. I koz lo *findings* lo lafason ki bann Manm ki pa'n deklar zot *assets* in afekte repitasyon Lasanble Nasyonal.

Be Mr Speaker, vi ki sa i lo Mosyon, mon prezimen fer *film blue* dan biro ki ou ou'n vizite, i afekte repitasyon Lasanble Nasyonal.

(APPLAUSE)

HON JOHAN LOZE

Kestyon ki poze prezan. Akoz ler ou Manm pe fer *film blue* dan biro ki ou ou'n donn li, ki ou ou'n al vizite, ou pa'n kapab lev ou marto pou pran ka avek li? E i double prezan akoz-

(Interruptions)

HON JOHAN LOZE

Mr Speaker, mon *mic*, i koup li menm? Batri i *down* ladan, kwa?

MR SPEAKER

Onorab.

HON JOHAN LOZE

I koup trankil?

MR SPEAKER

Pour dernyen fwa, mon pe dir ou si ou pou adrese, adres lo Mosyon.

HON JOHAN LOZE

Mon lo Mosyon, Mr Speaker. Repitasyon Lasanble Nasyonal! I pa repitasyon Lasanble Nasyonal ler ou Manm pe fer film dan biro? Biro ki ou'n donn li?

MR SPEAKER

Mosyon i lo *Declaration of Assets*.

HON JOHAN LOZE

E lafason ki i afekte repitasyon Lasanble Nasyonal. Akoz ou pa le koz lo ou bann Manm ki fer-

MR SPEAKER

Mon pe termin diskour Onorab Loze la.

HON JOHAN LOZE

Akoz ou Manm i fer vis dan biro. I fer *film blue*.

MR SPEAKER

Nou pou *adjourn* Lasanble ziskan demen bomaten. E sa 2 Manm ki'n lev lanmen a ganny laparol. E apre Loter Mosyon i a kapab fer son repons. Nou *adjourn*. Lasanble -

En moman. Lasanble pou repran 9er30 demen bomaten akoz Madanm Clerk ek Clerk i annan en langazman avek Minister Finans ki zot pa kapab evite. 9er edmi demen bomaten. *Adjourn*.

(ADJOURNMENT)